

लूका रचित सुसमाचार

भूमिका

1 बहोत स मनई हमरे बीच होइजाइ वाली घटना क ब्यौरा लिखइ क कोसिस करेन ह।² उहइ बातन हमका उ सबइ मनइयन क जरिये जान पड़िन जउन उ पचे सुरुआत स देखेन अउर जउन सुसमाचार क प्रचार करत रहेन।³ हे मान्यवर थियुफिलुस! काहेकि मई सुरुआत स सब कछू होसियारी स पढ़ेउँ ह। यह बरे मोका इ नीक जान पड़त ह कि तोहरे बरे एक तु एक क बाद एक एक घटना क लिखेउँ।⁴ जेसे तू सब इन बातन क बेफिकिर होइके जान ल्या जउन तोहका सिखाइ ग अहइँ।

जकरयाह अउर इलीसिबा

⁵उ समइया मँ जब यहूदिया प हेरोदेस क राज्य रहा। हुवाँ जकरयाह नाउँ क एक याजक रहत रहा। जउन याजकन क अबिय्याह दल* क रहा अउर ओकर पत्नी इलीसिबा हारून बंस क रही।⁶ उ दुइनउँ परमेस्सर क निगाह मँ धर्मी रहेन। उ पचे बिना केउ दोख क पभू क सबइ हुकुमन अउर बिधानन क पालन करत रहेन।⁷ मुला ओनके कउनो संतान नाहीं रही, काहेकि इलीसिबा बौझ रही अउर उ दुइनउँ बहोत बुढ़वा होइ ग रहेन।

⁸जब जकरयाह क आपन दले क मंदिर मँ याजक क काम खातिर बारी आइ, अउर उ परमेस्सर क समन्वा आराधना बरे हाजिर भवा।⁹ तउ याजकन मँ चली भइ रीति रिवाजे क तरह पर्ची डाइके ओका चुना गवा कि उ पभू क मंदिर मँ जाइके धूप जरावइ।¹⁰ जब धूप जरावइ क समइ आइ तउ बाहेर एकटठा भवा मनई पराथना करत रहेन।¹¹ उहइ समइया जकरयाह क समन्वा एक तु पभू का दूत परगट भवा। उ दूत धूप क वेदी क दाहिने कइँती खड़ा रहा।¹² जकरयाह जइसे उ दूत क निहारेस तउ उ घबराइ गवा अउर डर जइसे ओका जकड़ि लिहस।¹³ फिन सरगदूत ओसे कहेस, “जकरयाह जिन डेराअ, तोहार पराथना सुनि लीन्ह गइ अहइ। यह बरे तोहार पत्नी इलीसिबा एक बेटवा क जनम देई, अउर तू ओकर नाउँ यूहन्ना धर्या।¹⁴ उ तोहका आनंद अउर खुसी देइ, साथे ओकरे जनम स अउर भी बहोत

स मनइयन क खुसी होई।¹⁵ काहेकि उ पभू क निगाहे मँ महान होई। उ कबहुँ कउनो दाखरस या कउनो मदिरा क न पिई। आपन जन्म स पवित्तर आत्मा स भरपूर होई।¹⁶ उ इब्राएल क बहोतन मनइयन क ओनकइ पभू परमेस्सर कइँती लौटइ बरे फेरी।¹⁷ उ एलिय्याह क आत्मा अउर सामर्थ मँ होइके पभू क अगवा अगवा चली। उ बापन क हिरदय ओनके संताने कइँती मोड़ देइ अउर आज्ञा न मानइवालन क मने क बदल देइ जेहसे उ पचे धर्मी मनइयन क नाई सोचइ लागइ। इ सबइ, उ मनइयन क पभू बरे तइयार करइ क करी।”

¹⁸ तबहीं जकरयाह दूत स कहेस, “मई इ कइसे जान लेउँ कि इ सच अहइ? काहेकि मई एक बुढ़वा हउँ अउर मोर पत्नी बुढ़िया होइ ग अहइ।”

¹⁹ तबहीं सरगदूत जवाब देत ओसे कहेस, “मई जिब्राईल हउँ। मई उहइ हउँ जउन परमेस्सर क अगवा खड़ा रहत हउँ। मोका तोसे बात करइ अउर इ सुसमाचार क बतावइ बरे पठवा ग अहइ।²⁰ मुला देखा, काहेकि तू मोरे सब्दन प, जउन निश्चित समइ क आइ प सच सिद्ध होइहीं, बिसवास नाहीं किहा, यह बरे तू गूँगा होइ जाब्या अउर उ दिना तलक नाहीं बोल पउब्या जबहिं ताई इ घटित न होइ जाइ।”

²¹ ओहर बाहेर मनई जकरयाह क इंतजार करत रहेन। ओनका अचरज भवा कि उ एतनी देर मंदिर मँ काहे ठहर गवा अहइ।²² फिन जब उ बाहेर आवा तउ उ ओनसे बोल नाहीं पावत रहा। ओनका इ लाग कि जइसे मंदिर क भीतर कउनो दर्सन होइ गवा अहइ। उ गूँगा होइ ग अउर सिरिफ इसारा करत रहा।²³ अउर फिन अइसा भवा कि जब ओकर आराधना क काम होइ गवा तउ जकरयाह वापस आपन घर लौटि गवा।

²⁴ थोड़े दिना बाद ओकरे पत्नी इलीसिबा गर्भवती भइ। पाँच महीना तलक उ सबन स अलगइ रही। उ कहेस, “²⁵ अब आखिर मँ जाइके इ तरह पभू मोर मदद करेस ह। मनइयन क बीच मोर लाज राखइ बरे उ मोर सुधि लिहस ह।”

कुँवारी मरियम

²⁶⁻²⁷ इलीसिबा क छठा महीना चलत रहा, गलील क एक सहर नासरत मँ परमेस्सर क दूत जिब्राईल क एक कुँवारी कन्या क लगे पठएस जेकर यूसुफ नाउँ क

अबिय्याह क दल यहूदी याजकन 24 दलन मँ बँटा रहा।
देखा इति. 24

एक मनई स गोदी भरि दीन्ह गइ। उ दाऊद क बंस में जनमा रहा अउर उ कुँवारी कन्या क नाउँ मरियम रहा।

²⁸जिब्राईल ओकरे लगे आइ अउर कहेस, “तोह पइ अनुग्रह भइ अहइ, तोहार जय होइ। पभू तोहरे संग बा।”

²⁹इ बचन सुनिके उ बहोत घबरान, उ सोच में पड़ि गइ, “एकर का अरथ होइ सकत ह?”

³⁰तब सरगदूत ओसे कहेस, “मरियम तू जिन डेराअ, तोसे परमेस्सर खुस अहइ। ³¹सुना! तू गोड़वा स भारी होब्या अउर एक पूत क जन्म देबू अउर ओकर नाउँ ईसू रखबिउ। ³²उ महान होई अउर उ सबन त सर्वोच्च (परमेस्सर) क पूत कहवावा जाई। पभू परमेस्सर ओका ओकरे बाप दाऊद क सिंहासन दइ देई। ³³उ अनन्त समइया ताई याकूब क घराने प राज करी। ओकर राज्य क नास कबहुँ न होई।”

³⁴यह पइ मरियम सरगदूत स कहेस, “इ सच कइसे होइ सकत ह? काहेकि मई तउ अबहूँ कुँवारी हउँ।”

³⁵जवाबे में सरगदूत ओसे कहेस, “तोहरे लगे पवित्तर आतिमा आई अउर सर्वोच्च (परमेस्सर) क सक्ती तोहका आपन परिछाहीं में लइ लेई। इ तरह उ जन्म लेइवाला पवित्तर पूत परमेस्सर क पूत कहवावा जाई। ³⁶अउर इ भी सुनि ल्या कि तोहरे कुनबा क इलीसिबा क कुनबे में बुढाँती क गरभ में एक बेटवा अहइ अउर ओकरे कोखी क इ छठा महीना चलत बा। लोग कहत रहेन कि उ बाँझ बा। ³⁷मुला परमेस्सर बरे कछून न होइ सकइ, अइसा नाहीं।”

³⁸मरियम कहेस, “मई पभू क दासी हउँ जइसा तू मोरे बरे कह्या ह, वइसा ही होइ।” अउर तब उ सरगदूत ओकरे लगे स चला गवा।

मरियम क इलीसिबा अउर जकरयाह क लगे जाब

³⁹उहइ समइया मरियम तइयार होइके यहूदिया क पहाड़ी पहुँटा में बसा एक ठु सहर क फउरन चली गइ। ⁴⁰फिन उ जकरयाह क घरे गइ अउर उ इलीसिबा क अभिवादन किहेस। ⁴¹इ भवा कि जबइ इलीसिबा मरियम क अभिवादन सुनेस तउ जउन बचवा ओकरे पेटवा में रहा, उछरि गवा अउर इलीसिबा पवित्तर आतिमा स सराबोर होइ गइ।

⁴²ऊँची आवाजे में चिल्लात भइ उ कहेस, “तू स्त्रियन में सबते जिआदा बड़भागी अहा अउर जउने बचवा क तू जन्म देबू उ धन्य बा। ⁴³मुला इ ऐतनी बड़ी बात मोरे संग काहे घटि गई कि मोरे पभू क महतारी मोरे नियरे आइ। ⁴⁴काहेकि तोहरे पैलगी क सब्द जइसेन मोरे कनवा में आइ, मोरे पेटवा में बचवा खुसी स उछरि गवा। ⁴⁵तू धन्य अहा जउन इ बिसवास किहेस कि पभू जउन कछू कहेस उ होइके रही।”

मरियम क परमेस्सर क स्तुति

⁴⁶तबहीं मरियम कहेस,

⁴⁷“मोर प्रान पभू (परमेस्सर) क स्तुति करत ह; मोर आतिमा मोरे उद्धारकर्ता परमेस्सर में खुस भइ।

⁴⁸उ आपन दीन दास की बिटिया क सुधि लिहेस अउर अब हँ आनु क बाद सबहीं मोका धन्य कइहीं।

⁴⁹काहेकि उ सक्तीवाला मोरे बरे बड़कवा कारज किहेस ह। ओकर नाउँ पवित्तर अहइ। ⁵⁰जउन ओसे डेरत हँ उ ओन पइ पीढ़ी दर पीढ़ी दया करत ह।

⁵¹उ आपन बाँहन क सक्ती देखोइस। उ घमंडी मनइयन क ओनके डींग हाँकइवालन क बिचारन क छितराइ दिहेस।

⁵²उ राजन क सिंहासने स तरखाले उतार दिहस। दीनन क ऊँचा उठाएस

⁵³उ भुखान मनइयन क नीक चीजे स भरपूर कइ देई अउर धनी लोगन क निकांरि देई।

⁵⁴उ आपन नउकरन इम्राएलियन क दया करइ आवा अउर हमरे पूर्वजन क बचन क मुताबिक

⁵⁵ओका इब्राहीम अउर ओकर संताने प सदा दया देखोवइ क याद रही।”

⁵⁶मरियम तीन महीने ताई इलीसिबा क संग ठहरी रही अउर फिन आपन घरवा लौटि आइ।

यहून्ना क जन्म

⁵⁷फिन इलीसिबा क बचवा पइदा करइ क समइ आइ अउर ओकरे एक बेटवा पइदा भवा। ⁵⁸जब ओकर पड़ोसी अउर ओकर नातेदार सुनेन कि पभू ओह प दया देखाइस ह तउ सबइ साथे मिलिके खुसी मनाएन।

⁵⁹अउर फिन अइसा भवा कि अठवें दिन बचवा क खतना खातिर मनइयन हुवाँ आएन। उ पचे ओकरे बाप क नाउँ क मुताबिक ओकर नाउँ जकरयाह धरइ जात रहेन, ⁶⁰तबहीं ओकर महतारी बोल पड़ी, “नाहीं! एकर नाउँ तउ यहून्ना धरे चाहीं।”

⁶¹तब उ पचे ओसे बोलेन, “तोहरे कउनो भी नातेदार का इ नाउँ नाहीं बा।” ⁶²अउर फिन उ पचे इसारन में ओकरे बाप स पूछेन, “उ ओका का नाउँ देइ चाहत ह?”

⁶³एह प जकरयाह ओनसे एक ठु तख्ती माँगिस अउर लिखेस, “एकर नाउँ अहइ यहून्ना।” एह पइ उ सबइ अचरजे में पड़ि गएन। ⁶⁴तबहीं फउरन ओकर मुँह खुलि गवा अउर ओकर बाका फूटि गवा। उ बोलइ लाग अउर परमेस्सर क स्तुति करइ लाग। ⁶⁵एसे सबइ पड़ोसी डेराइ गएन अउर यहूदिया क समूचइ पहाड़ी पहुँटा में

मनइयन एँकरे बारे में बतियाई लागेन। ⁶⁶जउन कउनो भी इ बात सुनेस, अचरजे में पड़िके कहइ लागेन, “इ गदेला का बनी?” काहेकि पभू क हाथ ओह प अहइ।

जकरयाह क स्तुति

⁶⁷तब ओकर बाप जकरयाह पवित्तर आतिमा स सराबोर होइ गवा अउर उ भविस्सबाणी किहेस:

⁶⁸“इझ्राएल क पभू परमेस्सर क आसीस होइ काहेकि उ आपन मनइयन क मदद बरे आवा अउर ओनका आजाद कराएस।

⁶⁹उ हमरे बरे आपन सेवक दाऊद क परिवार स एक उद्धारकर्ता दिहस।

⁷⁰जइसा कि उ बहोत पहिले आपन पवित्तर नबी स बचन देवोंएस।

⁷¹उ हमका हमार दुस्मनन स अउर ओन सब क हथवन स, जउन हम स धिना करत रहेन, हमका छोड़वइ क बचन दिहस।

⁷²हमरे पूर्वजन प दया देखावइ क अउर आपन पवित्तर बचन क याद रखइ क।

⁷³ओकर बचन रहा एक उ सपथ जउन हमरे पूर्वजन इब्राहीम क संग लीन्ह गइ रहिन,

⁷⁴कि हमार दुस्मनन क हथवन स हमार छुटकारा अउर बेडर क पभू क सेवा करइ क हुकुम दीन।

⁷⁵अउर आपन जिन्नगी भर हर रोज ओकरे समन्वा हम पचे पवित्तर अउर धर्मी रहि सकी।

⁷⁶हे बालक! अब तू सर्वोच्च (परमेस्सर) क बड़ा नबी कहा जाइ काहेकि तू पभू क अगवा अगवा चलिके ओकरे बरे राह तइयार करी।

⁷⁷अउर ओकरे मनइयन स कही कि ओनके पापन क छमा स उ ओनके लोगन क उद्धार का गियान देबा।

⁷⁸हमरे परमेस्सर क नरम अनुग्रह स एक नवा दिन क भोर हम पइ ऊपर स उतरी।

⁷⁹ओन प चमकइ बरे जउन मउत क गहरी छाया में जिअत अहई काहेकि हमरे गोड़वन सांति क राहे प सीधा जाईं।”

⁸⁰इ तरह उ लरिका बाइइ लाग अउर ओकर आतिमा मजबूत स मजबूत होइ लाग। उ मनइयन में परगट होइ स पहिले निर्जन जमाहिया में रहत रहा।

ईसू क जनम

(मती 1:18-25)

2 उ दिना औगुस्तुस कैसर कइँसी स एक हुकुम निकरा कि समूचइ रोम क राज्य में जनगणना दर्ज कीन्ह जाइ। ²इ पहली जनगणना रही। जब सीरिया क राज्यपाल

क्विरिनियुस रहा। ³एह बरे जनगणना खातिर हर कउनो आपन सहर आवा।

⁴यूसुफ भी, गलील क नासरत सहर स यहूदिया में दाऊद क सहर बैतलहम क आवा काहेकि उ दाऊद क परिवार अउर बंस क सदस्य रहा। ⁵उ हुवाँ आपन होइवाली स्त्री मरियम क संग, जउन गर्भवती रही, आपन नाउँ लिखावावइ ग रहा। ⁶अबहीं जब उ पचे हुवाँ रहेन, मरियम क बचवा पइदा करइ क समइ आइ गवा। ⁷अउर उ आपन पहिलौटी पूत (ईसू) क जनम दिहस। काहेकि हुवाँ सराय क भीतरे उ पचन क कउनो ठउर नाही मिल पावा। एँह बरे उ ओका ओढ़ना में लपेटिके चरही में लोटाएस।

ईसू क जनम क खबर

⁸तबहीं हुवाँ उ पहँटा में बाहेर खेत में कछू गड़रियन रहेन जउन राति क समइ आपन आपन झूँड क रखवारी करत रहेन। ⁹उहइ समइया पभू क एक दूत परगट भवा अउर ओनकइ चारिहुँ कइँती पभू क तेज फूटइ लाग। उ सबइ सहमि गएन। ¹⁰तबहीं सरगदूत ओनसे कहेस, “डेराअ जिन, माँ सुसमाचार लइ आवा हउँ, जेसे सबइ मनइयन क महान आनंद होई। ¹¹काहेकि आज दाऊद क सहर में तोहार उद्धारकर्ता मसीह पभू क जनम भ अहइ। ¹²तोहार ओका पहिचानइ क चीन्हा होइ कि तू एक ठु बचवा क ओढ़ना में लपेटा भवा, चरही में ओलरा पउब्या।”

¹³उहइ समइया एकाएक उ सरगदूते क संग डेरि क अउर सरगदूतन हुवाँ हाजिर भएन। उ पचे इ कहत भवा परमेस्सर क गुन गावत रहेन:

¹⁴“सरगे में परमेस्सर क महिमा होइ अउर धरती प ओन मनइयन क सांति मिलइ जेसे उ खुस होइ।”

¹⁵अउर जब सरगदूतन ओनका तजिके सरग लौटि गएन तउ उ सबइ गड़रियन आपुस में कहइ लागेन “आवा हम बैतलहम चली अउर जउन घटना भइ अहइ अउर जेकाँ पभू हमका बताएन ह, ओका देखी।”

¹⁶तउ उ पचे जल्दी गयेन अउर हुवाँ मरियम अउर यूसुफ क पाएन अउर निहारेन कि बचवा चरही में लोटा बा। ¹⁷गड़रियन जब ओका निहारेन तउ इ बचवा क बारे में जउन संदेसा ओनका दीन्ह ग रहा, उ पचे ओनका सबइ क बताइ दिहन। ¹⁸जउन कउनो भी ओनका सुनेन, उ पचे गड़रियन क कही बातन प अचरज करइ लागेन। ¹⁹मुला मरियम इ सबइ बातन क आपन मनवा में राखि लिहैस अउर उ ओन प सोचइ बिचारइ लाग। ²⁰अउर ओहेर उ सबइ गड़रियन जउन कछू सुनेन अउर देखे रहेन, ओके बरे परमेस्सर क स्तुति अउर

धन्यवाद देते अपने घरन क लौटि गएन। इ सब अइसेन घटा जइसेन कि ओनका बतावा गवा रहा।

²¹अउर जब बचवा क खतना खातिर अठवाँ दिन आइ तउ ओकर नाउँ ईसू रखेन। ओका इ नाउँ ओकरे गरभ में आवइ स पहिले सरगदूत दइ दिहिन।

ईसू क मंदिर में लइ जाव

²²अउर जब मूसा क व्यवस्था क मुताबिक पइदा भए बचवा क सूतक क दिन पूरा होइ गवा अउर सुद्ध होइ क समइ आइ तउ उ पचे ईसू क पर्भू क अरपन करइ बरे यरूसलेम लइ गएन। ²³पर्भू क लिखे भइ व्यवस्था क मुताबिक, “हर पहिलौटी क बेटवा पर्भू क बरे बिसेस मानी जाई।” * ²⁴अउर पर्भू क व्यवस्था कहत ह, “एक जोड़ी कबूतर या पडुँकी क दुइ नवा बचवा क बलिदान देइ चाही।” * तउ उ पचे पर्भू क व्यवस्था क मुताबिक बलि चढ़ावइ लइ गएन।

समौन क ईसू क दर्सन

²⁵यरूसलेम में समौन नाउँ क एक धर्मी अउर भगत रहा। उ इम्राएल क सुख चइन क बाट जोहत रहा। पवित्रर आत्मा ओकरे साथ रही। ²⁶पवित्रर आत्मा ओका परगट किए रही कि जब तलक उ पर्भू क मसीह क दर्सन नाहीं कइ लेइ, मरी नाहीं। ²⁷उ पवित्रर आत्मा क साथ मंदिर में आवा अउर जब व्यवस्था क मुताबिक कारज बरे बालक ईसू क ओकर महतारी बाप मंदिर में लइ आएन। ²⁸तउ समौन ईसू क आपन गोदी में उठाइके परमेस्सर क स्तुति करत बोला:

²⁹“पर्भू अब तू आपन बचन क मुताबिक मोका आपन दास क सांति क साथ मुक्ती द्या

³⁰काहेकि मई आपन आँखिन स तोहरे उ उद्धार क दर्सन कइ लीन्ह ह।

³¹जेका तू सबहीं मनइयन क उपस्थिति में तइयार किए अहा।

³²इ बचवा गैर यहूदियन बरे तोहरे राहे का देखावय बरे ज्योति क सोता अहइ अउर तोहरे इम्राएल क मनइयन बरे इ महिमा अहइ।”

³³ओकर महतारी बाप ईसू क बारे में कही गइ इ बातन स अचरजे में पड़ि गएन। ³⁴फिन समौन ओनका आसीबाद दिहस अउर ओकर महतारी मरियम स कहेस, “इ बचवा इम्राएल में बहोतन क गिरावइ या उठावइ क कारण बनइ अउर एक अइसा चीन्हा ठहरावा जाइ बरे

“हर ... जाई” निर्ग 13:2

“एक ... चाही” लैव्य 12:8

तय कीन्ह ग अहइ जेकर खिलाफत कीन्ह जाइ। ³⁵अउर मनइयन जेका गूढ समझिहीं, उ लोगन क पता लगि जाई जेहसे तोहरे हिरदय क दुख होइ।”

हन्नाह ईसू क देखत ह

³⁶हुँवँ हन्नाह नाउँ क एक ठु नबिया रही। उ असेर कबीले क फनूएल क बितिया रही। उ बहोत बुढ़िया रही। आपन बियाहे क सिरिफ सात बरिस पाछे तलक उ आपन भतारे क साथे रही। ³⁷अउर फिन चौरासी बरिस तलक उ विधवा रही। उ मंदिर कबहुँ नाहीं तजेस। उपवास अउर पराथना करत भइ उ रात-दिन आराधना करत रही। ³⁸उहइ समइ उ उहाँ खड़ी ही। उ परमेस्सर क धन्यवाद दिहस अउर जउन मनइयन यरूसलेम क छुटकारा क बाट जोहत रहेन, उ ओन सबक छोड़ावइ क बारे में बताएस।

यसुफ अउर मरियम क घर लौटव

³⁹अउर जब उ पचे पर्भू क व्यवस्था क मुताबिक सब कछू पूरा कइ लिहेन तउ उ सबइ गलील में आपन सहर नासरत लौटि आएन। ⁴⁰अउर उ बालक बाढ़इ लाग अउर हिट्ट पुठ होइ लाग। उ बहोत बुद्धिमान रहा अउर ओह प परमेस्सर क अनुग्रह रही।

बालक ईसू

⁴¹फसह क त्यौहार प हर बरिस ओकर महतारी बाप यरूसलेम जात रहेन। ⁴²जब उ बारह बरिस क रहा तउ सदा क नाई उ पचे त्यौहार प गएन। ⁴³जब त्यौहार खतम भवा अउर उ सबइ घरवा लौटत रहेन तउ बालक ईसू यरूसलेम में रुकि गवा मुला महतारी बाप क ँकर जानकारी नाहीं होइ पाइ। ⁴⁴इ बिचारत भए कि उ दले में कहुँ होई, उ सबइ दिन भर जात्रा करत रहेन। फिन उ सबइ ओका आपन नातेदारन अउर नजदीकी मीतन में हेरइ लागेन। ⁴⁵अउर जब उ ओनका नाहीं मिल पावा तउ उ सबइ हेरत हेरत उ पचे यरूसलेम लौटि आएन।

⁴⁶अउर फिन भवा ई कि तीन दिना बाद उ ओहका मंदिर में पाएन। उ उपदेस देइ वालेन क साथ बइठके ओनका सुनत रहा अउर ओनसे सवाल पूछत रहा। ⁴⁷उ सबहिं जउन ओसे सुने रहेन, ओकर समझ बूझ अउर ओकरे सवाले क जवाब स अचरजे में पड़ि गएन। ⁴⁸जब ओकर महतारी बाप ओका निहारेन तउ दंग रहि गएन। ओकर महतारी ओसे पूछेस, “बेटवा, तू हमरे साथ अइसा काहे किहा? तोहार बाप अउर मई तोहका हेरत हेरत बहोतइ फिकिर में रहेन।”

⁴⁹तब ईसू ओनसे कहेस, “तू मोका काहे हेरत रहया? का तू नाहीं जनत्या कि मोका मोरे बाप क चीजन में सामिल होइ चाही?” ⁵⁰मुला ईसू ओनका जउन जवाब दिहस, उ पचे ओकरे बचन क ना समझ सकेन।

⁵¹फिन उ ओनके संग नासरत लौटि आवा अउर ओनकइ हुकुम क मानत रहा। ओकर महतारी इ सब बतियन क आपन मने में राखत जात रही।

⁵²ओह कइँती ईसू बुद्धि में, डील डौल में अउर परमेस्सर अउर मनइयन क पिरेम में बाढ़इ लाग।

यूहन्ना क प्रचार

(मती 3:1-12, मरकुस 1:1-8; यूहन्ना 1:19-28)

3 तिबिरियुस कैसर क राज्य क पन्द्रहवाँ बरिस में जब यूहूदिया क राज्यपाल पुन्तियुस पीलातुस रहा अउर उ पहुँटा क चउथाई भाग क राजन में हेरोदेस गलील क, ओकर भइया फिलिप्पुस इतूरैया अउर त्रखोनीतिस क, अउर लिसानियास अबिलेने क मातहत राजा रहा।

²यूहन्ना अउर काइफा महायाजक रहेन, तबहीं परमेस्सर क बचन जकरयाह क बेटवा यूहन्ना क लगे रेगिस्तान में पहुँचा। तउ यरदन नदी क नगिचे क समूचे पहुँटा में गवा, उ पापन क छमा बरे मनफिराय क खातिर बपतिस्मा क प्रचार करइ लाग। ⁴नबी यसायाह क बचन क किताबे में जइसा लिखा बा :

“कउनो क रेगिस्तान में चिल्लात भवा सब्द:
‘पभूँ क बरे रस्ता तइयार करा अउर ओकरे बरे रस्ता सोझ बनवा।

⁵ हर घाटी भरि दीन्ह जाई अउर हर पहाड़ अउर पहाड़ी सपाट होइ जइहीं टेढ़ में स्थान सीधे अउर ऊबड़ खाबड़ रस्ता चौरस कइ दीन्ह जाई।

⁶ अउर सबइ मनई परमेस्सर क उद्धार क दर्शन करिहीं।”

यसायाह 40:3-5

⁷यूहन्ना बपतिस्मा लेइ आएन मनइयन क भीड़ स कहत रहा, “अरे सँपोला, तू पचन क कउन चेताएस ह कि तू आवइवाले किरोध स बच जा? ⁸फल क जरिये तोहका प्रमाण देइ क होई कि असल में तोहका अपने पापन क पछतावा अहइ। अउर आपुस में इ कहब जिन सुरू करा, ‘इब्राहीम हमार बाप अहइ।’ मैं तोहसे कहत हँ कि परमेस्सर इब्राहीम बरे इन पाथरन स भी बचवन पइदा कइ सकत ह। ⁹बुच्छन क जड़े प कुल्हाड़ा धरा गवा अहइ अउर हर उ बुच्छ जउन नीक फर नहीं पइदा करत, काटिके गिराइ दीन्ह जाई अउर फिन ओका आगी में झोंकि दीन्ह जाई।”

¹⁰तब भीड़ ओसे पूछेस, “तउ हमका का करइ चाही?” ¹¹जवाबे में उ ओनसे कहेस, “जउन कउनो क लगे दुइ कुरता होइ, उ ओनका जेकरे लगे न होइ, ओनके संग बाँटि लेई। अउर जेकरे लगे खइया क होइ, उ भी अइसा ही करइ।”

¹²कछू चुंगी (टिक्स) त उगहिया ओकरे लगे बपतिस्मा बरे आएन अउर फिन उ पचे ओसे पूछेन, “गुरु, हमका का करइ क चाही?”

¹³एह पइ उ ओनसे कहेस, “जेतना चाही ओसे जिआदा जिन वसूला।” ¹⁴कछू सिपाही ओसे पूछेन, “अउर हमका का करइ चाही?”

तउ उ ओनका समझाएस, “जोर अउर दबाव स कउनो स धन जिन ल्या। कउनो प झूठ देख जिन लगावा। आपन पगार स संतोख करा।”

¹⁵लोग बड़की आसा स बाट जोहत रहेन अउर यूहन्ना क बारे में आपन मने में इ विचारत रहेन कि कहुँ, “इ तउ मसीह नाही बा।”

¹⁶तबहीं यूहन्ना इ कहत भवा उ सबन क उत्तर दिहस, “मई तउ तोहका जले स बपतिस्मा देत हँ मुला उ जउन मोसे जिआदा बरियार बा, आवत अहइ। मई ओकरे पनही क फीता तलक खोलइ क जोग नही हँ। उ तोहका पवित्तर आत्मा अउर आगी स बपतिस्मा देइ। ¹⁷ओकरे हाथ में ओसावइ क पाँचा अहइ, जेसे उ दाना क भूसा अलगाइ क आपन खरिहाने में उठाइके धरत ह। मुला उ भूसा क अइसी आगी में झाँकी जउन कबहुँ नाही बुताइवाली अहइ।” ¹⁸इ तरह अइसे ही अउर बहोत स सब्दन स उ ओनका समझावत भवा सुसमाचार सुनावत रहत रहा।

कइसे यूहन्ना क कारज क खतम भवा

¹⁹(पाछे यूहन्ना उ चौथाई पहुँटा क मातहत राजा हेरोदेस क ओकर भाई क पत्नी हेरोदियास क संग ओकर गलत संबंध अउर ओकर दूसर कुकरम बरे डाटेस फटकारेस। ²⁰एह पइ हेरोदेस यूहन्ना क बंदी बनाइके, जउन कछू कुकरम उ किहे रहा, ओहमाँ एक अउर जोर दिहस।)

यूहन्ना क जरिए ईसू क बपतिस्मा

(मती 3:13-17, मरकुस 1:9-11)

²¹अइसा भवा कि जब सब लोग बपतिस्मा लेत रहेन तउ ईसू भी बपतिस्मा लिहिस। अउर जब ईसू पराथना करत रहा, तबहीं अकास खुलि गवा ²²अउर पवित्तर आत्मा एक ठु कबूतरे क देह धइके ओह प तरखाले ओतरा। अउर अकासबाणी भइ, “तू मोर पियारा पूत अहा, मई तोहसे बहोत खुस हँ।”

यूसुफ क बंसज बुच्छ

(मती 1:1-17)

²³ईसू जब आपन सेवा सुरु किहेस तउ उ खुद लगभग तीस बरिस क रहा। अइसा विचारा गवा कि उ यूसुफ क बेटवा था। एली क बेटवा यूसुफ। ²⁴मत्तात क बेटवा एली। लेवी क बेटवा मत्तात। मलकी क बेटवा

लेवी। यन्ना क बेटवा मलकी। यूसुफ क बेटवा यन्ना।
²⁵मत्तित्याह क बेटवा यूसुफ। आमोस क बेटवा मत्तित्याह।
 नहूम क बेटवा आमोस। असल्याह क बेटवा नहूम।
 नोगह क बेटवा असल्याह। ²⁶मात क बेटवा नोगह।
 मत्तित्याह क बेटवा मात। सिमी क बेटवा मत्तित्याह।
 योसेख क बेटवा सिमी। योदाह क बेटवा योसेख।

²⁷योनान क बेटवा योदाह। रेसा क बेटवा योनान।
 जरुब्बाबिल क बेटवा रेसा। सालतियेल क बेटवा
 जरुब्बाबिल। नेरी क बेटवा सालतियेल। ²⁸मलकी क
 बेटवा नेरी। अद्दी क बेटवा मलकी। कोसाम क बेटवा
 अद्दी। इलमोदाम क बेटवा कोसाम। एर क बेटवा
 इलमोदाम। ²⁹येसु क बेटवा एर। एलीएजेर क बेटवा
 येसु। योरीम क बेटवा एलीएजेर। मत्तात क बेटवा योरीम।
 लेवी क बेटवा मत्तात।

³⁰समौन क बेटवा लेवी। यहूदाह क बेटवा समौन।
 यूसुफ क बेटवा यहूदाह। योनान क बेटवा यूसुफ।
 एलियाकीम क बेटवा योनान। ³¹मलेआह क बेटवा
 एलियाकीम। मिन्नाह क बेटवा मलेआह। मत्तात क
 बेटवा मिन्नाह। नातान क बेटवा मत्तात। दाऊद क
 बेटवा नातान। ³²यिसै क बेटवा दाऊद। ओबेद क
 बेटवा यिसै। बोअज क बेटवा ओबेद। सलमोन क बेटवा
 बोअज। नहसोन क बेटवा सलमोन।

³³अम्मीनादाब क बेटवा नहसोन। आदमीन क बेटवा
 अम्मीनादाब। अरनी क बेटवा आदमीन। हिप्पोन क
 बेटवा अरनी। फिरिस क बेटवा हिप्पोन। यहूदाह क
 बेटवा फिरिस। ³⁴याकूब क बेटवा यहूदाह। इसहाक क
 बेटवा याकूब। इब्राहीम क बेटवा इसहाक। तिरह क
 बेटवा इब्राहीम। नाहोर क बेटवा तिरह। ³⁵सरूग क
 बेटवा नाहोर। रऊ क बेटवा सरूग। फिलिग क बेटवा
 रऊ। एबिर क बेटवा फिलिग। सेलाह क बेटवा एबिर।

³⁶केनान क बेटवा सेलाह। अरफक्षद क बेटवा
 केनान। सेम क बेटवा अरफक्षद। नूह क बेटवा सेम।
 लिमिक क बेटवा नूह। ³⁷मथूसिलह क बेटवा लिमिक।
 हनोक क बेटवा मथूसिलह। यिरिद क बेटवा हनोक।
 महललेल क बेटवा यिरिद। केनान क बेटवा महललेल।
³⁸एनोस क बेटवा केनान। सेत क बेटवा एनोस। आदम
 क बेटवा सेत। अउर परमेस्सर क पूत आदम था।

ईसू क परीच्छा

(मती 4:1-11, मरकुस 1:12-13)

4 पवित्तर आतिमा स भरा भवा ईसू यरदन नदी स
 लौटि आवा। आतिमा ओका ऊरारे में राह देखॉवत
 रही। ²हुवाँ सइतान चालीस दिना ताई ओकर परीच्छा
 लिहस। ओ दिनन में ईसू बे खइया क खाए रहा। फिन
 जब समइ पूर भवा तउ ईसू भुखान।

³यह बरे सइतान ओसे कहेस, “जदि तू परमेस्सर क
 पूत अहा तउ इ पथरे स रोटी बनइ बरे कहा।”

⁴एहँ पइ ईसू जवाब दिहस, “पवित्तर सास्तरन में
 लिखा बा:

“मनई सिरिफ रोटी प नाहीं जिअत।”

व्यवस्था विवरण 8:3

⁵फिन सइतान ओका बहोत ऊँच लइ गवा अउर
 छिन भर में समूचे संसार क राज्य ओका देखॉवत बोला,
⁶अउर सइतान ने ओसे कहेस, “मई इन राज्यन क
 तोहक हुकूमत अउर धन दौलत दइ देइहउँ अउर मई
 जेका चाहउँ ओका दइ सकत हउँ। “यह बरे यदि तू मोर
 आराधना करव्या तउ इ सब तोहार होइ जाई।”

⁸ईसू ओका जवाब देत भवा बोला, “पवित्तर सास्तरन
 में लिखा बा:

“तोहका सिरिफ आपन पर्भू परमेस्सर क ही
 आराधना चाही। तोहका सिरिफ उहइ क सेवा
 करइ चाही।”

व्यवस्था विवरण 6:13

⁹तब उ ओका यरूसलेम लइ गवा अउर हुवाँ मंदिर
 क सबते ऊँची चोटी प लइ जाइके खड़ा कइ दिहस।
 अउर उ ओसे बोला, “जदि तू परमेस्सर क पूत अहा तउ
 हिआँ स अपने आपक तरखाले गिरावा। ¹⁰पवित्तर
 सास्तर में लिखा अहइ :

“उ आपन सरगदूतन क तोहरे बारे में हुकुम देई
 कि उ पचे तोहार रच्छा करई।”

भजन संहिता 91:11

¹¹अउर लिखा अहइ :

“उ पचे तोहका आपन बाँहें में अइसे उठइहीं कि
 तोहार गोड़ कउनो पाथर स न टकराई।”

भजन संहिता 91:12

¹²ईसू जवाब देत भवा कहेस, “पवित्तर सास्तरन में
 इ भी लिखा बा:

“तोहका आपन पर्भू परमेस्सर क परीच्छा में
 नाहीं नावइ चाही।”

व्यवस्था विवरण 6:16

¹³तउ जब सइतान ओकर सबइ तरह क परीच्छा लइके
 हारि गवा तउ दूसरइ समइ तलक ओका तजिके चल
 दिहस।

ईसू का लोगन क उपदेस

(मती 4:12-17, मरकुस 1:14-15)

¹⁴फिन ईसू आतिमा क समर्थ स भरा भवा गलील लौटि आवा अउर उ समूचे पहेँटा मैं ओकर चर्चा फैलि गइ। ¹⁵उ ओनके आराधनालय मैं उपदेस दिहेस। सबइ ओकर प्रसंसा करत रहेन।

¹⁶फिन उ नासरत आवा जहाँ उ पला अउर बड़ा भवा। आपन आदत क मुताबिक सबित क दिन उ आराधनालय मैं गवा। जबहिं उ पाठ बाँचइ खड़ा भवा। ¹⁷तउ यसायाह नबी क किताब ओका दीन्ह गई। जब उ किताब खोलेस तउ ओका उ जगह मिला जहाँ लिखा रहा कि:

¹⁸“पभू क आतिमा मोरे मैं समाइ गइ अहइ काहेकि किहेस ह उ मोर अभिसेक कि दुइनउँ क सुसमाचार सुनाउब मई, उ मोका पठएस ह बंदीयन क इ बतावइ कि उ पचे अजाद अहई। आँधर क आँखिन मैं जोति सरसावइ, अउर दलितन क छुटकारा देवोँवइ; ¹⁹ पभू क अनुग्रह क समइ बतावइ क भेजा अहइ!”

यसायाह 61:1-2

²⁰फिन उ किताब क बंद कइके परिचारक क हथवा मैं दइ दिहेस अउर बैठ गवा। आराधनालय मैं सबइ क आँखिन ओका निहारत रहिन। ²¹तब उ ओनसे कहब सुरु किहेस, “आज इ बचन तोहरे काने मैं पूर भवा!”

²²हर कउनो ओकरे बारे मैं अच्छी बातन कहत रहेन। ओकरे मुँहना स जउन सुन्दर बचन निकरत रहेन, ओन प सबन क अचरज भवा। उ पचे कहेन, “का इ यूसुफ क बेटवा नाहीं अहइ?”

²³फिन ईसू ओनसे कहेस, “तू पचे जरूर मोका इ कहावत सुनउब्बा, ‘अरे बैद्य खुद आपन इलाज करा।’ कफरनहूम मैं तोहरे जउन काजे क बारे मैं हम पचे सुना ह, उ काजे क हिआँ आपन खुद क सहर मैं भी कइ डावा!” ²⁴ईसू तब ओनसे कहेस, “मई तोहसे सच कहत हउँ कि आपन सहर मैं कउनो नबी क स्वागत नाहीं होत। ²⁵मई तोहसे सच कहत हउँ इझ्राएल मैं एलिय्याह क समइ मैं जब अकास जइसे मुँद गवा रहा अउर साढ़े तीन बरिस तलक पूरी धरती मैं खौफनाक अकाल पड़ि गवा, तउ हुवाँ बहुत विधवन रहेन। ²⁶मुला सैदा पहेँटा के सारपत सहर क एक विधवा क तजिके एलिय्याह क कउनो अउर क लगे नाहीं पठवा गवा रहा। ²⁷अउर नबी एलीसा क समइया मैं इझ्राएल मैं ढेर कोढ़ी रहेन मुला ओहमाँ स सीरिया क बसइया नामान क तजिके अउर कउनो क सुद्ध नाहीं कीन्ह गवा रहा।”

²⁸तउ जबहिं आराधनालय मैं मनइयन इ सुनेन तउ सबहिं बहोत क्रोध स भर गएन। ²⁹तउ उ पचे खड़ा भएन अउर ओका सहर स बाहेर ढकेल दिहेन। उ सबइ ओका पहाड़े क उ चोटी प लइ गएन जेह प ओकर सहर बसा रहा जेसे उ पचे हुवाँ तरखाले झोंकि देई। ³⁰मुला उ ओनके बीच स निकरि के कहुँ आपन राहे प चला गवा।

ईसू का एक मनई क दुस्त आतिमा स छुटकारा

(मती 1:21-28)

³¹फिन उ गलील क एक सहर कफरनहूम गवा अउर सबित क दिन मनइयन क उपदेस देइ लाग। ³²मनई ओकरे उपदेस स अचरज मैं पड़ि गएन काहेकि ओकर संदेस मुड्ड विद्वान क तरह रहा। ³³हुवई एक तु मनई आराधनालय मैं रहा जेहमाँ एक दुस्त आतिमा क सवारी रही। उ जोर स चिल्लान, ³⁴“हे नासरत क ईसू! तू हमसे का चाहत बाट्या? का तू हमार नास करइ आइ अहा? मई जानत हउँ तू कउन अहा-तू परमेस्सर क पवित्तर मनई अहा!” ³⁵ईसू झिड़कत भवा ओसे कहेस, “चुप रह। एहमाँ स बाहेर निकरि आवा!” एँह पड़ि दुस्त आतिमा उ मनई क लोगनक समन्वा दइ मारेस अउर ओका बे नसकान किए ओसे बाहेर निकरि गइ।

³⁶सबइ कोउ अचरजे मैं पड़ि गएन। उ सबइ एक दूसर स बतियात कहेन, “इ कइसा सन्देश बा? हक अउर सकती क संग इ दुस्त आतिमन क हुकुम देत ह अउर उ सबइ बाहेर निकरि जात हीं।”

³⁷उ पहेँटा मैं लगे हर ठउरे प ओकरे बारे मैं खबर सँचर गइ।

रोगी स्त्री क चंगा कीन्ह जाब

(मती 8:14-17, मरकुस 1:29-34)

³⁸तब ईसू आराधनालय स समौन क घर चला गवा। समौन क सासे क बहोत बोखार चढ़ा रहा। उ पचे ईसू स मदद बरे बिनती किहेन। ³⁹ईसू ओकरे सिरहाने खड़ा भवा अउर बोखारे क डाटेस। बोखार ओहका छोड़ि दिहेस। उ फउरन खड़ी होइ गइ अउर ओनकर सेवा करइ लाग।

ईसू बहोतन क चंगा किहेस

⁴⁰जब सूरज ओनवबत रहा तउ जेकरे हिआँ किसिम किसिम क बेमारी स पीड़ित रहेन, उ सबइ ओनका ओकरे लगे लइ आएन। अउर उ आपन हथवा ओहमाँ स हर एक पर रखत भए ओनका चंगा किहेस। ⁴¹ओहमाँ बहोतन मैं दुस्त आतिमन चिचियात भइ इ कहत बाहेर निकरि आइन, “तू परमेस्सर क पूत अहा!” मुला उ ओनका डाँटिस अउर बोलइ नाहीं दिहेस, काहेकि उ सबइ जानत रहिन कि उ मसीह अहइ।

ईसू क दूसर सहरन क जात्रा

(मरकुस 1:35-39)

⁴²जब भिनसार भवा तउ हुवाँ स उ कउनो एकांत ठउर चला गवा। मुला भीड़ ओका हेरत हेरत हुवँइ जाइके पहोंच गइ जहाँ उ रहा। उ पचे ओका ओनका छोड़िके जाइ स रोकेन।

⁴³मुला उ ओनसे कहेस, “परमेस्सर क राज्य क बारे में सुसमाचार मोका दूसर सहरन में भी पठवइ क बा काहेकि मोका यह बरे पठवा ग अहइ।”

⁴⁴अउर इ तरह उ यहूदिया क आराधनालय में लगातार उपदेस देत रहा।

ईसू क पहिले चेलन

(मती 4:18-22, मरकुस 1:16-20)

5 अइसा भवा कि भीड़ में मनइयन ईसू क चारिहूँ कइँती स घेरिके जब परमेस्सर क बचन सुनत रहेन अउर उ गन्नेसरत नाउँ क झिलिया क किनारे खड़ा रहा। ²तबहीं उ झीले क किनारे दुइ नाउ देखेस। मछुआरा ओहमाँ स निकरिके आपन जाल साफ करत रहेन।

³ईसू ओहमाँ स एक नाउ प जउन समौन क रही, चढ़ि गवा अउर उ नाउ क किनारे स हटावइ बरे कहेस। फिन उ नाउ प बइठि गवा अउर हुवँई नाउ प स मनइयन क भीड़ क उपदेस देइ लाग।

⁴जब उ उपदेस देब बंद किहेस तउ उ समौन स कहेस, “गहिर पानी कइँती बढ़ा अउर मछरी धरइ क आपन जालि डावा।”

⁵समौन कहेस, “स्वामी हम सारी राति बहोत मेहनत कीन्ह ह, मुला हमका कछु नाहीं मिला। तउ भी तू कहत बाट्या, यह बरे मइँ जालि नाइ देत हउँ।” ⁶जब उ पचे जलिया डारि दिहन तउ बेर मछरी धरी गइन। ओनकइ जालि जइसे फाटत रहिन। ⁷तउ उ पचे दूसर नाउन में बइठन आपन साथी संगी क इसारा कइके मदद बरे बोलाएन। उ सबइ आइ गएन अउर उ सबइ दुइनउँ नाउन प एँतनी बेरि क मछरी लादि दिहन कि माना उ पचे बूड़इ लागेन।

⁸⁻⁹ जब समौन पतरस इ निहारेस तउ उ ईसू क गोड़वा में गिरिके बोला, “मोसे दूर रहा, काहेकि हे पर्भू मइँ एक पापी मनई हउँ।” उ इ यह बरे कहेस कि एँतनी मछरी बटोर पावइ क कारण ओका अउर ओकरे सबहीं साथी क बहोत अचरज होत रहा। ¹⁰जब्दी क बेटवा याकूब अउर यूहन्ना क भी, जउन समौन क साथी रहेन, इ तरह बहोत अचरज भवा।

तउ ईसू समौन स कहेस, “डेराअ जिन, काहेकि अबहिँ स तू मनइयन क बटोर ब्या।”

¹¹फिन उ पचे आपन नाउन क किनारे लइ आएन अउर सब कछु तजिके ईसू क पाछे होइ गएन।

कोढ़ी क सुदध कीन्ह जाब

(मती 8:1-4, मरकुस 1:40-45)

¹²तउ अइसा भवा कि जब ईसू एक सहर में रहा तबहीं हुवाँ कोढ़ स बिआपा एक टु मनई रहा। उ जइसेन ईसू क निहारेस तउ दण्डवत प्रणाम कइके ओसे बिनती किहेस, “पर्भू, जदि तू चाहा तउ मोका चंगा कइ सकत ह।”

¹³एह पइ ईसू आपन हाथ बढ़ाइके कोढ़ी क इ कहत भवा छुएस, “मइँ चाहत हउँ, चंगा होइ जा!” अउर फउरन ओकर कोढ़ जात रहा। ¹⁴फिन ईसू ओका हुकुम दिहेस, “एँकरे बारे में उ कउनो स कछु न कहइ। मुला याजक क लगे जा अउर अपने सुद्ध होइ बरे मूसा क हुकुम क मुताबिक भेंट चढ़ाइ द्या जैसे मनइयन क तोहरे चंगा होइ क प्रमाण मिलइ।” ¹⁵मुला ईसू क बारे में खबर अउर जिआदा रफतार स संचरइ लाग। अउर मनइयन क झुंड क झुंड ऐकट्टा होइके ओका सुनइ अउर आपन बेरामी स जरटुट होइ बरे ओकरे नगिचे आवत रहेन। ¹⁶मुला ईसू अक्सर कहुँ एकान्त जंगल में चला जात रहा अउर उहाँ पराथना करत रहा।

लकवा क रोगी क चंगा करब

(मती 9:1-8, मरकुस 2:1-12)

¹⁷अइसा भवा कि एक दिना जब उ उपदेस देत रहा तउ हुवाँ फरीसियन अउर धरम सास्तिरियन भी बइठा रहेन। उ सबइ गलील अउर यहूदिया क हर सहर अउर यरूसलेम स आए रहेन। मनइयन क चंगा करइ क पर्भू क सक्ती ओकरे साथे रही। ¹⁸तबहीं कछु मनई खटिया प लकवा क एक बेरमिया क ओकरे लगे लइ आएन। उ पचे ओका भितरे लइ आइके ईसू क समन्वा धरइ क जतन करत रहेन। ¹⁹मुला भीड़ क कारण भीतर जाइके रस्ता न मिल पावइ स उ सबइ छत प चढ़ि गएन अउर उ पचे ओका बिछउना क साथ छत क बीचोबीचे स खपरैल टारिके मोर के बीच में ईसू क समन्वा उतार दिहन। ²⁰ओनके बिसवास क लखत भवा ईसू कहेस, “अरे तोहार, पाप छमा होइ गएन।”

²¹तब धरम सास्तिरियन अउर फरीसियन आपन में सोचइ लागेन, “इ कउन बा जउन परमेस्सर बरे अइसे बेजती स बोलत ह? परमेस्सर क तजिके दूसर कउन अहइ जउन पाप छमा कइ सकत ह?”

²²मुला ईसू ओनकइ सोचब बिचारब क ताड़ लिहस। फिन जवाबे में उ ओनसे कहेस, “तू पचे आपन मने में अइसा काहे सोचत अहा? ²³जिआदा असान का बाटइ? इ कहब, ‘तोहार पाप छमा हुआ’ या इ कहब, ‘उठा अउर चला?’ ²⁴मुला यह बरे कि तू जान ल्या कि मनई क पूत क धरती प छमा करइ क हक अहइ।” उ लकवा क बेरमिआ स कहेस, “मइँ तोहसे कहत हउँ, खड़ा हवा! आपन बिछउना उठावा अउर घरे जा।”

²⁵तउ उ तुरंतही खड़ा भवा अउर ओनके लखत लखत जउने बिछउना प उ ओलरा रहा, ओका उठाइके परमेस्सर क स्तुति करत भवा आपन घर चला गवा।
²⁶उ पचे जउन हुवाँ रहेन सब चकित होइके परमेस्सर क बड़कई करइ लागेन। उ पचे म्रद्धा अउर अचरज स भरि गएन अउर बोलेन, “आजु हम पचे कछू अजूवा निहारा ह!”

लेवी क ईसू क बोलावा

(मती 9:9-13, मरकुस 2:13-17)

²⁷एकरे पाछे ईसू चला गवा। तबहीं उ चुंगी (टिक्स) क चौकी पड़े बड़ठा लेवी नाउँ क चुंगी उगहिया* क लखेस। उ ओसे कहेस, “मोरे पाछे चला आवा।”²⁸तउ उ खड़ा भवा अउर सब कछू तजिके ओकरे पाछे होइ गएन।

²⁹फिन लेवी आपन घरे प ईसू क मान बरे एक तु स्वागत जेवनार दिहस। हुवाँ चुंगी क उगहिया अउर दूसर मनइयन क बड़का जमघट मिलिके ओकरे संग जेवंत रहा।³⁰तब फरीसियन अउर धरम सास्तिरियन लोग ओकरे चलन स इ कहत भए सिकाइत किहन, “तू चुंगी उगहिया अउर पापी मनइयन क संग काहे खात पितअत ह?”

³¹जवाबे मैं ईसू ओनसे कहेस, “हिट्ट पुट्ट क नाहीं, मुला बेरमियन क बैदुय (डाक्टर) क जरूरत होत ह।³²मइ मनफिराव बरे धर्मी लोगन क नाहीं मुला पापी मनइयन क बोलावइ आवा हउँ!”

उपास प ईसू क मत

(मती 9:14-17, मरकुस 2:18-22)

³³उ पचे ईसू स कहेन, “यहून्ना क चलन अक्सर उपास राखत हीं अउर पराथना करत हीं। अउर अइसा ही फरीसियन क मनवइयन भी करत ही मुला तोहार मनवइयन तउ खात पितअत रहत हीं।”

³⁴ईसू ओनसे पूछेस, “का दुल्हा क संग मेहमान जब तलक दुल्हा क लगे रहत हीं, उपास करत हीं?”³⁵मुला उ सबइ दिनन अबहीं जबहिं दुल्हा ओनसे छीन लीन्ह जइहीं। फिन उ दिनन मैं उ पचे उपास करिहीं।”

³⁶उ ओनसे एक डिस्तान्त कथा अउर कहेस, “कउनो भी नवा पोसाके स टुकड़ा फाड़िके ओका पुरान पोसाके प नाहीं लगावत अउर जदि कउनो अइसा करत ह तउ ओकर नवा पोसाक तउ फाटि जाई, ओकरे संग उ नवा पड़वंद भी पुरान क साथ मेल न खाई।³⁷कउनो भी

पुरान मसकन मैं नई दाखरस नाहीं भरत अउर जदि भरि देत ह तउ नई दाखरस पुरान मसकन क फोरि देई, उ फैलि जाई अउर मसकन क फोरि देई।³⁸मनई हमेसा नई दाखरस नई मसकन मैं ही धरत ह।³⁹पुरान दाखरस पीके कउनो भी नई का नाहीं चाहत काहेकि उ कहत ह, ‘पुरान उत्तिम अहइ।’”

सबित क पर्भू ईसू

(मती 12:1-8, मरकुस 2:23-28)

6 अब अइसा भवा कि सबित क एक दिन ईसू जब अनाजे क खेतस जात रहा तउ ओनकर चलन अनाजे क बलिया तोड़तेन, हथेली प रगड़ितेन अउर ओनका चबात जात रहेन।²तबहीं कछू फरीसियन कहेन, “जेका सबित क दिन कीन्ह जाब नीक नाहीं बा, ओका तू पचे काहे करत अहा?”

³जवाब देत भवा ईसू ओनसे पूछेस, “का तू पचे नाहीं पढ़्या जब दाऊद अउर ओकर साथी भुखान रहेन, तब दाऊद का किहेस?⁴का तू नाहीं बँच्या कि उ परमेस्सर क घरे मैं घुसिके, परमेस्सर क चढ़ाई गइ रोटिन क उठाइके खाइ लिहस अउर ओनका भी दिहेस जउन ओकरे संग रहेन? जब कि याजकन क तजिके ओकर खाब कउनो बरे नीक नाहीं।”

⁵उ अगवा फिन कहेस, “मनई क पूत सबित क दिन क भी पर्भू अहइ।”

ईसू सबित क दिन रोगी क चंगा किहेस

(मती 12:9-14, मरकुस 3:1-6)

⁶दूसर सबित क दिना अइसा भवा कि उ आराधनालय मैं जाइके उपदेस देइ लाग। हुवाँई एक अइसा मनई रहा जेकर दाहिन हाथ सुखंडी होइ गवा रहा।⁷हुवाँई धरम सास्तिरियन अउर फरीसियन इ ताक मैं रहेन कि उ सबित क दिन कउनो क चंगा किहे होइ तो ओह प दोख लगावइ क कउनो कारण पाइ जाई।⁸उ ओनके बिचारन क जानत रहा। यह बरे उ सुखंडी हथवावाले मनई स कहेस, “उठा अउर सबन क समन्वा खड़ा होइ जा।” उ उठि गवा अउर हुवाँ खड़ा होइ गवा।⁹तब ईसू मनइयन स कहेस, “मई तोहसे पूछत हउँ—सबित क दिन कउनो क भला करब चंगा अहइ या कउनो क नोसकान करब, कउनो क जिन्गी बचाउब नीक बा या कउनो क जिन्गी क नास करबा।”

¹⁰ईसू चारिहुँ कइँती ओन सबन क निहारेस अउर फिन ओसे कहेस, “आपन हथवा सोझ फइलावा।” उ वइसा ही किहेस अउर ओकर हाथ फिन स चंगा होइ ग।

¹¹मुला एँह पइ उ पचे आपुस मैं तहलतुक करत कोहाइ गएन अउर बिचारइ लागेन, “ईसू क का कीन्ह जाइ?”

चुंगी (टिक्स) उगहिया मनइयन स चुंगी उगहिया बरे यहूदियन क पगारे प रखा जात रहा। इ चुंगी क उगहिया मनइयन क उगत रहेन। यह बरे मनई एनका इज्जत स नाहीं देखत रहेन।

ईसू बारह प्रेरितन क चुनेस

(मती 10:1-4, मरकुस 3:13-19)

¹²उ दिनन मँ अइसा भवा कि ईसू पराथना करइ बरे एक पहाड़े प गवा अउर सारी राति परमेस्सर क पराथना करइ मँ बिताएस। ¹³फिन भोर भवा तउ उ आपन मनवइयन क लगे बोलोएस। ओहमँ स उ बारहु क चुनेस, जेनका उ “प्रेरितन” क नाउँ दिहस। ¹⁴समौन जेका उ पतरस का नाउँ दिहस, अउर ओकर भइया अन्द्रियास, याकूब अउर यूहन्ना, फिलिपुस, बरतुलमै, ¹⁵मत्ती, थोमा, हलफई क बेटवा याकूब अउर समौन कनानी, *¹⁶याकूब क बेटवा यहूदा अउर यहूदा इस्करियोती जउन दगाबाज होइ गवा।

ईसू क मनइयन क उपदेस अउर चंगा करब

(मती 4:23-25, 5:1-12)

¹⁷फिन ईसू ओनके संग पहाड़ी स तरखाले उतरिके समथर भुइयाँ प खड़ा भवा। हुँवई ओकरे चलन क भारी जमघट रहा। एकरे साथ समूचइ यहूदिया, यरूसलेम, सूर अउर सैदा क समुदर किनारे स अनगिनत आलम हुँवौं आइके ऐकट्टा भवा। ¹⁸उ पचे ओका सुनइ अउर बेरामी स छुटकारा पावइ हुँवौं आए रहेन। जउन दुस्ट आत्मा स सतावा रहेन, उ पचे भी हुँवौं आइके चंगा भएन। ¹⁹समूची भीड़ ओका छुड़ भरि लेइ क जतन मँ रही काहेकि ओहमँ स सक्ती निकरत रही अउर ओन सबन क बेरामी स दूर करत रही।

²⁰फिन उ आपन चलन क निहारत भवा बोला,

“धन्य अहा तू दीन जनन काहेकि परमेस्सर क राज्य तोहार अहइ।

²¹ धन्य अहा तू जउन अबहीं भूखा अहा काहेकि तृप्ति तउ होइ तोहार, धन्य अहा तू जउन आजु औंसू बहावत अहा, काहेकि तू आगे हँसब्या।

²²धन्य अहा तू जब मनई क पूत क कारण लोग तोहसे घिना करई, अउर तोहका निकारि देई; अउर करई तोहार बुराई, नाउँ तलक क दुस्ट कहिके, काटि देई उ पचे। ²³तब उहइ दिन तू मगन होइके खुसी मँ उछर्या काहेकि सरग मँ तोहार प्रतिफल महान अहइ। काहेकि ओनके पूर्वजन भी नबियन क संग अइसा ही किहन ह।

²⁴“हाय! धिक्कार अहइ तोहका ओ धनी मनइयो। काहेकि तोहका मिल गवा सुख चड़न भरभूर।

कनानी एक ठु कट्टर पंथी राजनीति दल क नाउँ रहा, जेकर उ निअंबर होत रहा।

²⁵ अहइ तोहका धिक्कार, जउन भरपेट अहा अब काहेकि तू भूखा रहब्या। अहइ तोहका धिक्कार, जउन अबहिन हँसत अहा, काहेकि तू औंसू बहउब्या अउर सोक करब्या।

²⁶“बा धिक्कार तोहका, जब सबन दुआरा तोहार बड़कई होइ काहेकि ओनके पूर्वजन भी इही ब्यौहार झूठे नबियन क संग किहे रहेन।

आपन बैरी स पिरेम करा

(मती 5:38-48; 7:12)

²⁷“ओ सुनवइया लोगो, मई तोहसे कहत हउँ आपन बैरी स भी पिरेम करा। जउन तोहसे घिना करत हीं ओनके संग भलाई करा। ²⁸ओनका भी आसीबादि द्या जउन तोहका सरापत हीं। ओनके बरे पराथना करा जउन तोहरे संग नीक ब्यौहार नाहीं करतेन। ²⁹जदि कउनो तोहरे एक गाले प थपड़ियावइ तउ तू दूसर गाल भी ओकरे अगवा कइ द्या, जदि कउनो तोहार कोट तोसे लइ लेइ तउ ओहका कुर्ता भी लइ लेइ द्या। ³⁰जदि कउनो तोसे माँगइ, ओका द्या। जदि कउनो तोहार कछू राखि लेइ तउ ओसे ओका वापस जिन माँगा। ³¹तू आपन बरे जइसा ब्यौहार दूसरन स चाहत बाट्या, तोहका वइसा ही दूसर क संग ब्यौहार करइ चाही। ³²जदि तू बस ओनही क पिआर करत ह, जउन तोहका पिआर करत हीं, तउ एँहमा तोहार कउन बड़कई? काहेकि आपन स पिरेम करइवालन स पिरेम तउ पापी मनई तलक करत हीं। ³³जदि तू बस ओनहीं क भला करत ह, जउन तोहार भला करत हीं, तउ तोहार कउन बड़कई? अइसा तउ पापी तलक करत हीं।

³⁴जदि तू सिरिफ ओनही क उधार देत ह, जेनसे तोहका वापस मिल जाइ क आसा बा, तउ तोहार कउन बड़कई? अइसे तउ पापी भी पापी मनइयन क देत हीं कि ओनका ओनकी पूरी रकम वापस मिलि जाइ। ³⁵मुला आपन दुस्मन स भी पिआर करा, ओनके संग भलाई करा। कछू भी वापस मिलि जाइके आसा तजिके उधार द्या। इ तरह तोहार फल महान होइ जाई अउर तू सर्वोच्च (परमेस्सर) क संतान बनब्या काहेकि परमेस्सर एहसाने क मानइवालन अउर दुस्ट मनइयन प भी दया करत ह। ³⁶जइसे तोहार परमपिता दयालु बा, वइसे ही तू दयालु बना।

आपन क पहिचाना

(मती 7:1-5)

³⁷“कओ क दोखी जिन कहा तउ तोहका भी दोखी नाहीं कहा जाइ। कओ क नोक्ताचीनी जिन करा तउ तोहार भी नोक्ताचीनी नाहीं कीन्ह जाइ। छमा करा, तोहका छमा मिली। ³⁸दया, तोहका भी दीन्ह जाइ। उ पचे

तोहरे झोरी में पूरा नाप दबाइ दबाइ के, हलाइके बाहेर निकसत भइ उड़ेरिहीं काहेकि जउने नापे स तू दूसरन क नापत ह, उहइ स तोहका नापा जाइ।”

³⁹उ ओनसे एक ठु दिस्टान्त कथा अउर कहेस: “का कउनो आँधर कउने दूसरे आँधर क राह देखाइ सकत ह? का उ सबइ दुइनउे ही कउनो गड़हा में नाहीं भहरइहीं?”

⁴⁰कउनो भी पढ़वइया आपन पढ़ावइवालन स बड़वार नाहीं होइ सकत, मुला जबहि कउनो मनई पूरी तरह हुसियार होइ जात ह तउ उ आपन गुरु क नाई होइ जात ह।

⁴¹“तू आपन भाई क आँखी में कउनो ढेंडा काहे लखत ह? अउर आपन आँखी क लट्ठा भी तोहका नाहीं चोंधरात। ⁴²तउ आपन भाई स तू कइसे कहि सकत ह ‘भाई तू आपन आँखी क तिनका मोका निकारइ दिया’ जब तू आपन आँखी क लट्ठा क नाहीं निहरल्या। अरे कपटी, पहिले आपन आँखी क लट्ठा दूर करा, तब तोबका आपन भाई क आँखी क ढेंडे बाहेर निकारइ बरे देखौं पड़ी।

दुइ किसिम क फर

(मती 7:17-20; 12:34-35)

⁴³“कउनो भी अइसा उत्तम बृच्छ नाहीं अहइ जेह पइ बुरा फर लागत होइ। न ही कउनो अइसा बुरा बृच्छ बाटइ, जेह पइ उत्तम फर आवत होइ। ⁴⁴हर बृच्छ आपन फर स पहिचाना जात ह। मनइयन कँटेहरी झारी स अंजोर नाहीं बटोरतेन। न ही कउनो झरबेली स मनई अंगूर बटोरत हीं।

⁴⁵एक नीक मनई क मन में अच्छाइ क भंडार बाटइ। अउर एक खोटा मनई, जउ ओकरे मने में बुराई बाटइ, उहइ स बुराई पइदा करत ह। काहेकि एक मनई मुँहना स उहइ बोलत ह, जउन ओकरे हिरदइ में उफनाइ के बाहेर आवत ह।

आपन क पहिचाना

(मती 7:24-27)

⁴⁶“तू मोका, ‘पर्भू पर्भू’ काहे पुकारत ह अउर जउन मई कहत हउँ, ओह प नाहीं चलत्या। ⁴⁷हर कउनो जउन मोरे लगे आवत ह अउर मोर उपदेस सुनि लेत ह अउर ओह प आचरण करत ह, उ कउने तरह क होत ह, मई तोहका बताउब। ⁴⁸उ उहइ मनई क नाई अहइ जउन मकान बनावत बाटइ। उ गहिर खुदाई किहेस अउर चट्टानें प नेंव डाएसा। फिन जब बाढ़ आइ अउर नदी मकाने प टकरान तउ ओका हलाइ नाहीं पाएस, काहेकि उ बहोत अच्छी तरह स बना रह। ⁴⁹मुला जउन मोर उपदेस सुनत ह अउर ओह प चलत नाहीं, उ ओ मनई क नाई अहइ जउन बे नेंव धरे धरती प

मकान बनाएसा। नदी ओसे टकरान अउर उ फउरन ढहाइ गवा अउर पूरी तरह बरबाद होइ गवा।”

बिसवास क सक्ती

(मती 8:5-13; यूहना 4:43-54)

7 ईसू मनइयन क जउन सुनावा चाहत रहा, ओका कहि चुकइ क पाछे उ कफरनहूम चला गवा। ²हुवौं एक फऊजी नायक रहा जेकर नउकर एतना बेरमिया रहा कि मरइ के नगीचे रहा। उ नउकर ओकर बहोत पियारा रहा। ³फऊजी नायक जब ईसू क बारे में सुनेस तउ उ कछू बुजुर्ग यहूदी नेतन क इ बिनती करइ क ओकरे लगे पठएस कि उ आइके ओकरे नउकर क प्राण बचाइ लेइ। ⁴जब उ पचे ईसू क नगीचे पहुँच गएन तउ उ सबइ सच्चे मने स बिनती करत भए कहेंन, “उ इ जोग अहइ कि तू ओकरे बरे अइसा करा। ⁵काहेकि उ हमरे मनइयन स परिम करत ह। उ हमरे बरे आराधनालय क बनवाएस ह।”

⁶एह पर ईसू ओनके संग चल दिहेस। अबहीं जब उ घरे स जिआदा दूर नाहीं रहा, उ फऊजी नायक ओकरे लगे आपन मीतन क इ कहइ बरे पठएस, “पर्भू आपन क कस्ट जिन द्या काहेकि मई एतना नीक मनई नाहीं कि तू मोरे घरवा आवा। ⁷यह बरे मई तोहरे लगे आवइ तलक नाहीं सोचेउँ। मुला तू बस कहि भर द्या, मोर नउकर नीक होइ जाई।

⁸मई खुद कउनो अधिकारी क मातहत काम करत हउँ अउर मोरे मातहत भी कछू सिपाही अहइँ। मई जब कउनो स कहत हउँ, ‘जा’ तउ उ चला जात ह। अउर जब मई आपन नउकर स कहत हउँ, ‘आवा’ तउ उ आइ जात ह अउर जब मई आपन नउकर स कहत हउँ, ‘इकरा’ तउ उ ओका करत ह।”

⁹ईसू जब इ सुनेस तउ ओका ओह प बहोत अचरज भवा। जउन भारी मनइयन क भीड़ ओकरे पाछे चली आवत रही, ओनके कईती मुड़िके ईसू कहेस, “मई तोहका बतावत हउँ अइसा बिसवास मोका इम्राएल में भी कहुँ नाहीं मिला।”

¹⁰फिन पठए भए उ पचे जब वापस घरे पहुँचेंन तउ उ सबइ उ नउकरे क बेरामी स जरटुट पाएन।

मुर्दा क जिन्गी देब

¹¹फिन अइसा भवा कि ईसू नाइन नाउँ क एक सहर चला गवा। ओकर चलन अउर भारी आलम ओकरे संग रहा। ¹²उ जइसे ही सहर दुआरे क नगिचे आवा तउ हुवौं स एक मुर्दा क लइ जात रहेन। उ आपन विधवा महतारी क इकलौता बेटवा रहा। तउ सहर क अनगिनत मनइयन क भीड़ ओकरे संग रही। ¹³जइसे पर्भू ओका निहारेस तउ ओकार हिरदय दया स भर गवा। उ उससे बोला, “जिन रोवा।” ¹⁴फिन उ अगवा बढ़ा अउर उ

ताबूत क छुड़ लिहस उ पचे जउन ताबूते क लइ जात रहेन, हुवैँ ठहर गएन। ईसू कहैस, “नउ जवान! मईँ तोहसे कहत हउँ खड़ा हवा!”¹⁵ तउ उ मुर्दा मनई बइठ गवा अउर बोलइ लाग। ईसू ओका ओकरी महतारी क वापस लौटाएस।¹⁶ अउर फिन उ सबइ ब्रद्धा अउर अचरज मँ पड़ि गएन! अउर इ कहन भएन परमेस्सर क महिमा बखानइ लागेन, “हमरे बीच एक महान नबी परगट भवा अहइ!” अउर कहइ लागेन, “परमेस्सर आपन मनइयन क मदद करइ बरे आइ ग अहइ।”¹⁷ ईसू क समाचार यहूदिया अउर आस-पास क देसन मँ सब कहुँ कइँती फैलि गइ।

यूहन्ना क सवाल

(मती 11:2-19)

¹⁸इ सबइ बातन क बारे मँ यूहन्ना क मनवइयन ओका सब कछू बताइ दिहन। तउ यूहन्ना आपन दुइ चेलन क बोलाई के ¹⁹ओनका पभू स इ पूछइ बरे पठएस, “का तू उहइ अहा, जउन आवइवाला अहइ या हम पचे कउनो अउर क बाट जोही?”

²⁰फिन उ मनइयन ईसू क लगे पहुँचेन तउ उ पचे कहेन, “बपतिस्मा क देवइया यूहन्ना हमका तोहसे इ पूछइ पठएस ह, ‘का तू उहइ अहा जउन आवइवाला अहइ या हम सबइ कउनो अउर क बाट जोही।’”

²¹उहइ समइ उ बहोत स बेरमिया क नीक किहेन अउर ओनका करुण दुख अउर दुष्ट आतिमन स छुटकारा दियाएस। अउर बहोत स आँधर न क आँखिन दिहेस।²²फिन उ ओनका जवाब दिहस, “जा अउर यूहन्ना स जउन तू निहारया ह अउर सुन्या ह, ओका बतावा कि आँधर फिन स लखत अहइँ, लँगड़ा लूला चलत फिरत अहइँ अउर कोढ़ी सुद्ध होइ ग अहइँ। बहिरन सुनि पावत हीँ अउर मुरदा फिन जिआवा जात अहइँ। गरीब मनइयन क सुसमाचार सुनाई जात अहइ।²³उ मनई धन्य अहइ जेका मोरे क स्वीकार करइ मँ कउनो हिचक नाही।”

²⁴जब यूहन्ना क संदेस लइ आवइवालन चला गएन तउ ईसू भीड़े मँ मनइयन क यूहन्ना क बारे मँ बताउब सुरु किहेस: “तू पचे बियाबान जंगल मँ का लखइ गवा रहया? का हवा मँ झूलत कउनो सरपत लखे गवा रइया? नाही? ²⁵फिन तू का लखइ गवा रहया? का कउनो पुरुस क मँहगा ओढ़ना पहिरे क लखइ गवा रहया? नाही, उ पचे जउन उत्तिम ओढ़ना पहिरत हीँ अउर जउन भोग बिलास क जिन्नगी मँ जिअत हीँ, उ सबइ तउ रजवाड़ा मँ पाइ जात हीँ।²⁶मुला बतावा तू का देखइ गवा रहया? का कउनो नबी? हीँ, मईँ तोहका बतावत हउँ कि तू जेका लख्या ह, उ कउनो नबी स कहीं जिआदा बा।²⁷इ उहइ अहइ जेकरे बारे मँ लिखा अहइ:

‘देखा! तोहसे पहिले मईँ आपन दूत पठवत अही, उ तोहसे पहिले ही राह तइयार करी।’

मलाकी 3:1

²⁸मईँ तोहका बतावत हउँ कि कउनो स्त्रियन स पइदा भएन मँ यूहन्ना स महान कउनो नाही अहइ। मुला फिन भी परमेस्सर क राज्य क छोटा स छोटा मनई भी ओस बड़का बा।”²⁹(तबहीं हर कउनो, हियाँ तलक कि चुंगी (टिक्स) उगहिया भी यूहन्ना क सुनिके ओकर बपतिस्मा लइके इ मान लिहेन कि परमेस्सर क रस्ता सच्चा अहइ।³⁰मुला फरीसियन अउर धरम सास्तिरियन ओकर बपतिस्मा न लइके ओनके बारे मँ परमेस्सर क इच्छा क टारि दिहन।)

³¹“तउ फिन इ पीढ़ी क मनइयन क उपमा मईँ कउनो स करउँ कि उ पचे कइसे बाटेन? ³²उ पचे बजारे मँ बइठेन ओन बचवन क नाई अहइँ जउन एक दूसर क पुकारिके कहत हीँ:

‘हम तोहरे बरे बाँसुरी बजावा मुला तू नाच्या नाही। हम तोहरे बरे सोक गवनिया गावा मुला तू रोया नाही।’

³³काहेकि बपतिस्मा क देवइया यूहन्ना आवा जउन न तउ रोटी खात रहा अउर न ही दाखरस पिअत रहा अउर तू कहत ह, ‘ओहमँ दुष्ट आतिमा समाइ गइ अहइ।’³⁴फिन खात पिअत भवा मनई क पूत आवा, मुला तू कहत अहा, ‘देखा, इ पेटार अहइ। पियककइ अहइ, चुंगी उगहियन अउर पापी मनइयन क मीत अहइ।’³⁵बुद्धि क उत्तिम होब ओकरे फल स सिद्ध होत ह।”

फरीसी समौन

³⁶फरीसियन मँ एक ठु फरीसी आपन संग खइया प ओका न्योत दिहस। तउ उ फरीसी क घर गवा अउर ओकरे हियाँ भोजन करइ बइठा।³⁷हुवैँँ सहर मँ एक पापी स्त्री रही, ओक जब इ पता चलि गवा कि उ एक फरीसी क घर भोजन करत अहइ तउ उ स्फटिक क एक पथरी मँ इतर लइके आइ।³⁸उ ओकरे पाछे ओकरे गोइवा क लगे खड़ी रही। उ रोवत रही। आपन आँसुअन स उ ओकर गोइ भिजवइ लाग। फिन उ गोइवा क आपन बाले स पोछेस अउर गोइवा क चूमिके ओन प इतर उड़ेरेस।³⁹उ फरीसी जउन ईसू क आपन घर बोलाएस, इ लखिके मनवा मँ सोचेस, “जदि इ मनई नबी होत तउ जान लेत कि ओका छुवइवाली स्त्री कउन अहइ अउर कइसी अहइ? उ जान लेत कि इ तउ पापिन अहइ।”⁴⁰जवाबे मँ ईसू ओसे कहेस, “समौन मोका तोहसे कछू कइइ क अहइ।”

उ बोला, “हे गुरु, कहा।”

⁴¹ईसू कहेस, “कउनो साहूकारे क दुइ करजदार रहेन। एक प ओकरे पाँचसौ चानी क सिक्का निकरत रहेन अउर दूसर प पचास। ⁴²काहेकि उ दुइनउँ करजा नाहीं पाट पाएन। यह बरे उ दाया कइके दुइनउँ क करजा माफ कइ दिहस। अब बतावा दुइनउँ मैं स ओका जिआदा पिरेम कउन स करी?”

⁴³समौन जवाब दिहस, “भोर बिचार बा, उहइ जेका उ जिआदा करजा छोड़ दिहस।”

ईसू कहेस, “तू नीक सोच्या ह।” ⁴⁴फिन उ स्त्री कइती मुड़िके उ समौन स कहेस, “तू इ स्त्री क लखत अहा? मई तोहरे घरवा आवा अही, तू मोड़े गोड़वा धोवइ क पानी नाहीं दिहा मुला इ मेरे गोड़वा क अँसुअन स धोइ दिहस अउर फिन आपन बरवा स पोछेस। ⁴⁵तू स्वागत मैं मोका नाहीं चूम्या मुला इ जब तलक मई भितरे गवा हउँ, मोरे गोड़वा क लगातार चमत बाटइ। ⁴⁶तू मोरे मूँड़े प तेल नाहीं मल्या, मुला इ मोरे गोड़वा प इतर छिड़केस। ⁴⁷यह बरे मई तोहका बतावत हउँ कि एँकर अगाध पिरेम दर्सित करत हय कि एँकर पाप छमा कइ दीन्ह ग अहइँ। मुला उ जेका तनिक पापन क छमा मिली, उ थोड़का पिरेम करत ह।”

⁴⁸तब ईसू उ स्त्री स कहेस, “तोहार पाप छमा कइ दीन्ह ग अहइँ।”

⁴⁹फिन जउन ओकरे संग जेवत रहेन, उ सबइ मने मैं सोचइ लागेन, “इ कउन अहइ, जउन पापन क छमा कइ देत ह?”

⁵⁰तब उ स्त्री स ईसू कहेस, “तोहार बिसवास तोहार रच्छा किहेस ह। सांति स जा।”

ईसू आपन चेलन क संग

8 एँकरे बाद अइसा भवा कि ईसू परमेस्सर क राज्य क सुसमाचार मनइयन क सुनावत भवा सहर-सहर अउर गाउँ गाउँ घूमइ लाग। ओकर बारहु प्रेरितन भी ओकरे संग होत रहेन। ²ओकरे संग कछू स्त्रियन भी होत रहीं जेनका उ बेरामी अउर दुस्त आतिमन स छुटकारा दियावत रहा। एनमाँ मरियम मगदलीनी नाउँ क एक स्त्री रही जेका सात दुस्त आतिमन स छुटकारा मिला रहा। ³हेरोदेस क सरंजाम अफसर खोजा क पत्नी योअन्ना भी एनहीं मैं रहिन। साथ ही सूसन्नाह अउर ढेर क स्त्रियन भी रहिन। इ स्त्रियन आपन जतन स ईसू अउर ओकरे प्रेरितन क सेवा क सरंजाम करत रहिन।

बिआ बोवइ क दिस्तान्त कथा

(मती 13:1-17, मरकुस 4:1-12)

⁴जब सहर-सहर स आइके मनइयन क बड़ी भीड़ एकट्ठा होत रही, तउ उ ओनसे एक दिस्तान्त कथा कहेस: ⁵“एक किसान आपन बिआ बोवइ निकर। जब उ बिआ बोएस कछू बिआ राह क किनारे जाइके गिरेन

अउर गोड़े तरे रौंद गएन। अउर चिड़ियाँ ओनका चुग लिहेन। ⁶कछू बिआ पथरही धरती प गिरेन, उ सबइ जब उगेन तउ ओद न होइ स मुरझाइ गएन। ⁷कछू बिआ कँटेहरी झड़िन मैं गिरेन। काँटन क बाइइ क संग संग उ भी बाडेन अउर कँटवन ओनका दबोच लिहेन। ⁸अउर कछू बिआ धरती प गिरेन। उ उगेन अउर उ सबइ सउ गुना फसल दिहेन।”

इ बातन क बतावत भवा उ पुकारिके कहेस, “जेकरे लगे कान अहइँ, उ सबइ सुनि लेई।”

⁹ओकर चेलन ओसे पूछेन, “इ दिस्तान्त कथा क अरथ का अहइ?”

¹⁰तउ उ बताएस, “परमेस्सर क राज्य क भेद जानइ क सुविधा तोहका दीन्ह गइ अहइ मुला दूसर क इ भेद दिस्तान्त कथा स दीन्ह ग अहइँ जेहसे:

‘वे देखते भी न देख पावई अउर सुनते हुए भी न समझ पावई।’

यसायाह 6:9

¹¹“इ दिस्तान्त कथा क अरथ इ अहइ: बिआ परमेस्सर क उपदेस अहइ। ¹²उ बिआ जउन राह क किनारे गिरा रहेन, उ मनइयन उपदेस जउन अब उपदेस सुनत हीं, सइतान आवत ह अउर उपदेस क ओनके मने स निकार लइ जात ह जेहसे उ सबइ पतिआय न पावई अउर ओनकइ उद्वार न होइ सकइ। ¹³उ बिआ जउन पथरही भुइयाँ प गिरा रहेन ओनकइ अरथ अहइ ओन मनइयन स जउन उपदेस सुनत हीं तउ ओका खुसी स तउ अपनावत हीं। मुला बिआ ओनके भितरे जम नाहीं पावत उ सबइ कछू समइ बरे बिसवास करत हीं मुला परीच्छा क घड़ी मैं डुग जात हीं। ¹⁴अउर जउन बिआ काँटन मैं गिरेन ओकर अरथ अहइ, ओन मनइयन स जउन उपदेस सुनत हीं, मुला जब उ पचे आपन राहे प चलइ लागत हीं। तउ फिकिर, धन दौलत अउर जिन्नगी क भोग बिलास ओका दहबोचि लेत हीं, जेहसे ओन प कबहुँ फसल पाकत नाहीं। ¹⁵अउर बढिया भुइयाँ प गिरा भवा बिआ क अरथ अहइ ओन मनइयन स जउन अच्छा अउर सच्चा मन स जब उपदेस क सुनत हीं तउ ओका धारण भी करत हीं। फिन आपन धीरज क संग उ पचे उत्तम फल देत हीं।

आपन सच्चाई क बैपरा

(मती 4:21-25)

¹⁶“कउनो दीया ढकना स ढाकइ बरे नाहीं जलावत। या ओका बिछउना तरे नाहीं धरत। मुला उ ओका डीबट प धरत ह काहेकि जउन भीतर आवई, रोसनी देखि सकई। ¹⁷काहेकि कछू भी अइसा छुपा नाहीं अहइ जउन उजागर न होई अउर कछू भी अइसा छुपा नाहीं

बा जउन जाना न जाई अउर परगट न होई।¹⁸ यह बरे धियान स सुना काहेकि जेकरे लगे बा ओका भी दीन्ह जाई अउर जेकरे लगे नाही अहइ, ओसे भी ओकरे नगिचे देखात ह, उ भी लइ लीन्ह जाई।”

ईसू क मनवइयन ही ओकर सच्चा परिवार

(मती 12:46-50, मरकुस 3:31-35)

¹⁹तबहीं ईसू क महतारी अउर ओकर भाइयन ओकरे लगे आएन मुला उ पचे भीड़ क कारण ओकरे नगिचे नाही जाइ सकेन।²⁰ यह बरे ईसू स इ कहा गवा, “तोहार महतारी अउर तोहार भाइयन बाहेर खड़ा अहई। उ पचे तोसे भेंटइ चाहत हीं।”

²¹मुला ईसू ओनका जवाब दिहस, “मोर महतारी अउर मोर भाइयन तउ इ सबइ अहई जउन परमेस्सर क उपदेस सुनत हीं अउर ओह प चलत हीं।”

चेलन क ईसू क सक्ति क दर्शन

(मती 8:23-27, मरकुस 4:35-41)

²²तबइएक दिन अइसा भवा कि उ आपन चेलन क संग एक नाउ प चढ़ा अउर ओनसे बोला, “आवा, झिलिया क उ पार चली।” तउ उ पचे पाल खोलि दिहना।²³ उ पचे जब नाउ खेवत रहेन, ईसू सोइ गवा। झिलिया प आन्धी अउर तूफान उतर आवा। ओनके नाउ में पानी भरइ लाग। उ पचे खतरा में रहेन।²⁴ एहसे उ सबइ ओकरे लगे आएन अउर ओका जगाइके कहइ लागेन, “स्वामी! स्वामी! हम बूडत अही!”

फिन उ खड़ा भवा अउर उ आन्धी, अउर लहरन क फटकारेस। उ सबइ थम गइन अउर हुवाँ सान्ति होइ गइ।²⁵ फिन उ ओनसे पूछेस, “तोहार बिसवास कहाँ गवा?”

मुला उ पचे डेरान रहेन अउर अचरज में पड़ा रहेन। उ पचे आपुस में एक दूसरे स कहेन, “आखिर इ अहइ कउन जउन हवा अउर पानी दुइनउँ क हुकुम देत ह अउर उ सबइ ओका मानत हीं।”

दुस्ट आतिमन स छुटकारा

(मती 8:28-34, मरकुस 5:1-20)

²⁶फिन उ पचे गिरासेनियन लोगन क पहुँटा में पहुँचेन जउन गलील झीले क समन्वा रहा।²⁷ जइसेन ही उ किनारे प उतरा, सहर क एक मनई ओका मिला। ओहमा दुस्ट आतिमन क स्वारी रहिन। बहोत दिना स उ न तउ ओढना पहिरत रहा, न ही उ घरे में रहत रहा, मुला उ मकबरे में रहत रहा।²⁸ उ जब ईसू क लखेस तउ चिचियात भवा ओकरे समन्वा गिरिके ऊँची अवाज में बोला, “हे सर्वोच्च परमेस्सर क पूत ईसू, तू मोसे का चाहत ह? मई बिनती करत हउँ मोका पीरा जिन द्या।”²⁹ उ दुस्ट आतिमा क उ मनई में स बाहेर निकरइ क

हुकुम दिहस, काहेकि उ दुस्ट आतिमा उ मनई क बहोत दाई पकड़े रही। अइसेन अक्सरन प ओका हथकड़ी बेड़ी स बाँधे के पहरुअन क बीच राखि जात रहा। मुला उ हमेसा जंजीरे क तोरि डावत अउर दुस्ट आतिमा ओका वीरान जगहन में भगावत रहत।”

³⁰तउ ईसू ओसे पूछेस, “तोहार नाउँ का अहइ?”

उ कहेस, “सेना।” (काहेकि बहोत स दुस्ट आतिमन ओहमा समाई रहिन।)³¹ उ सबइ ईसू स बहस मोबहसा क संग बिनती करत रहिन कि ओनका गहिर गड़हा में जाइके हुकुम न देई।³² अब देखा, तबहीं हुआँ पहाड़ी प सुअरन क झुण्ड चरत रहा। दुस्ट आतिमन ओसे बिनती किहेन कि उ ओनका सुअरिअन में जाइ देई। तउ उ ओनका जाइके हुकुम दिहस।³³ एह प उ सबइ दुस्ट आतिमन उ मनई में स बाहेर निकरीं अउर ओन सुअरिअन में घुस गइन। अउर सुअरिअन क झुंड तरखले उ दालू तट स लुडकत पुडकत अउर दउड़त भवा झीले में जाइके गिरि गवा अउर बूड़ गवा।

³⁴सुअरिअन क झुंड क बहोरइया, जउन कछू भवा रहा, ओका निहारिके हुवाँ स परानेन। अउर एकर खबर उ पचे सहर अउर दिहात में सुनाएन।³⁵ फिन हुवाँ क मनइयन जउन कछू में रहा ओका लखइ बाहेर आएन। उ सबइ ईसू स भेटेन। अउर उ पचे उ मनई क जेहमाँ स दुस्ट आतिमन निकरी रहिन, ईसू क गोड़वा प पाएन। उ मनई ओढना पहिरे रहा अउर ओकर दिमाग एकदम सही रहा। एहसे उ सबहि डेराइ गएन।³⁶ जउन निहारेन, उ पचे बताएन कि दुस्ट आतिमन क स्वारीवाला मनई कइसे नीक भवा।³⁷ गिरासेन पहुँटा के सबहीं बसइया ओसे बिनती किहेन कि उ हुवाँ स चला जाइ काहेकि सबहीं बहोत डेरान रहेन। तउ ईसू नाउ में आवा अउर लौटि गवा।³⁸ मुला जउने मनई स दुस्ट आतिमन निकरी रहिन, उ ईसू स आपन क संग लइ जाइके बिनती करत रहा। एह पइ ईसू ओका इ कहत भवा लौटाइ दिहस,³⁹ “घर जा अउर जउन कछू परमेस्सर तोहरे बरे किए अहइ ओका बतावा।”

तउ उ लौटिके ईसू ओकरे बरे जउन कछू किहस ह, ओका सारे सहर में कहत फिरा।

मरी लरकी क जिन्गी देब अउर बेरमिया स्त्री क चंगा होब

(मती 9:18-26, मरकुस 5:21-43)

⁴⁰जब ईसू लौटा तउ मनइयन क भीड़ ओकर अगवानी किहेस, काहेकि उ सबइ ओका जोहत रहेन।⁴¹ तबहीं याईर नाउँ क एक मनई हुवाँ आइ। उ हुवाँ क आराधनालय क मुखिया रहा। उ ईसू क गोड़वा में गिरि गवा अउर ओसे आपन घरे जाइके बिनती करइ लाग।⁴² काहेकि ओकर बार ह बरिस क एक इकलौती बिटिया रही, उ मरइ क रही।

तउ ईसू जब जात रहा तउ भीड़ ओका कुचरि देत रही।⁴³ हुवाँ एक स्त्री रही जेकर बारह बरिस स खून बहत रहा। जउन कछू ओकरे लगे रहा, उ बैद्य (डाक्टर) पर खरिच कइ दिहस, मुला उ कउनो स नीक नाहीं होइ पाइ।⁴⁴ उ ओकरे पाछे आइ अउर ओकरे चोंगा क मोहरी छुएस अउर तुरंतहि ओकर लहू बहब रुकि गवा।⁴⁵ तब ईसू पूछेस, “उ कउन अहइ जउन मोका छुएस ह?”

जब सबहीं मुकरइ लागेन कि उ पचे ईसू क नाहीं छुएन तउ पतरस कहेस, “स्वामी तोहका भिड़िया घेरे अहइ अउर तोहका दबावति अहइ।”

⁴⁶ मुला ईसू कहेस, “कउनो मोका छुएस ह काहेकि मोका लागत अहइ कि मोसे सक्ती निकरी गइ होइ।”⁴⁷ जब उ स्त्री देखेस कि मई छुप नाहीं सकित तउ उ काँपत काँपत आइ अउर ईसू क समन्वा गिरि गइ। हुवाँ सबहीं मनइयन क समन्वा उ बताएस कि मई तोहका कउनो कारण स छुए हउँ अउर कइसे फउरन नीक होइ गइ।⁴⁸ एँह प ईसू ओसे कहेस, “बिटिया तोहरे पतियाये स तोहार उद्धार भवा ह। चइन स जा।”

⁴⁹ उ अबहीं बोलत रहा कि आराधनालय क मुखिया क घरे स कउनो आवा अउर बोला, “तोहार बिटिया मरि गइ अहइ। तउ गुरु क अब अउर कस्ट जिन द्या।”

⁵⁰ ईसू इ सुनि लिहस। तउ उ ओसे बोला, “डेराअ जिन! बिसवास राखा। उ बचि जाई।”

⁵¹ जब ईसू उ घरे मँ आवा उ आपन संगे पतरस, यूहन्ना, याकूब अउर बिटिया क महतारी बाप क तजिके कउनो अउर क आपन संग भितरे नाहीं लइ गवा।⁵² सबहीं मनइयन उ लरकी बरे रोवत रहेन अउर बिलाप करत रहेन। ईसू कहेस, “रोउब बंद कइ द्या। इ मरी नाहीं बा, मुला सोवति अहइ।”

⁵³ एँह पइ मनइयन ओकर हँसी उड़ाएन। काहेकि उ जानत रहेन कि लरकी मरि चुकी बा।⁵⁴ मुला ईसू ओकर हथवा पकड़ैस अउर चिल्लाइके कहेस, “बच्ची, खड़ी होइ जा।”⁵⁵ ओकर आलिमा लौटि आइ, अउर उ फउरन उठि गइ। ईसू हुकुम दिहैस, “एँका कछू खइया क दीन्ह जाइ।”⁵⁶ एँह पइ लरकी क महतारी बाप क बहोत अचरज भवा मुला ईसू ओनका हुकुम दिहैस कि जउन भवा अहइ, ओका उ पचे कउनो क न बतावई।

ईसू बारहु प्रेरितन क पठएस

(मती 10:5-15, मरकुस 6:7-13)

9 फिन ईसू बारहु प्रेरितन क एक साथे बोलाँएस। अउर ओनका दुष्ट आतिमन स छुटकारा दियावइ क सामर्थ अउर हक दिहैस। उ ओनका बेरामी दूर करइके सामर्थ दिहैस।² फिन उ ओनका परमेस्वर क राज्य क सुसमाचार का घोसना किहैस अउर बेरमियन क नीक करइ बाहरे पठएस।³ उ ओनसे कहेस, “आपन

जात्रा बरे कछू संग न लेई, न लाठी, न झोरा, न रोटी, चाँदी अउर न कउनो अउर ओढ़ना।⁴ तू जउन कउनो घरे क भितरे जा, हुवाँइ ठहरा। अउर जब तलक बिदा न हवा, हुवाँइ ठहरा रहा।⁵ अउर जहाँ कहुँ मनई तोहार अगवानी न करई तउ जब तू उ सहर क तजि द्या अउर ओनके खिलाफ सनद क रूप मँ गोड़वा क धूरि झाड़ि द्या।”

⁶ तउ हुवाँ स चलिके उ सबइ हर कतहूँ सुसमाचार क उपदेस देतेन अउर मनइयन क चंगा करत सबहीं गाउँन स फिरत भए जात्रा करइ लागेन।

हेरोदेस क भरम

(मती 14:1-12, मरकुस 6:14-29)

⁷ अब जबहिँ एक चउथाई देस क राजा हेरोदेस, जउन कछू भवा रहा, ओकरे बारे मँ सुनेस तउ उ भरम मँ पड़ि गवा काहेकि कछू मनइयन इ कहत रहेन, “यूहन्ना क मरे हुअन मँ स जिआइ दीन्ह ग अहइ।”⁸ दूसर कहत रहेन, “एलिय्याह परगट भ अहा।” कछू अउर कहत रहेन, “पुरान जुग क कउनो नबी जी उठा बा।”⁹ मुला हेरोदेस कहेस, “मई तउ यूहन्ना क गटइ कटवाइ दिहे रहेउँ। फिन इ अहइ कउन जेकरे बारे मँ मइ अइसी बात सुनत रहत हउँ?” तउ हेरोदेस ओका देखइ क जतन करइ लाग।

पाँच हजार स जिआदा क भोज

(मती 14:13-21, मरकुस 2:30-44; यूहन्ना 6:1-14)

¹⁰ फिन जब प्रेरितन लौटिके आएन तउ उ पचे जउन कछू किहे रहेन, सब ईसू क बताएन। तउ उ ओनका हुवाँ स आपन संग लइके चुप्पे बैसैदा नाउँ क सहर चला गवा।¹¹ मुला भीड़ क पता लग गवा तउ उ भी ओनके पाछे होइ गइ। ईसू ओनकइ सुआगत किहैस अउ परमेस्वर क राज्य क बारे मँ ओनका बताएस। अउर जेनका दवाई क जरूरत रही ओनका नीक किहैस।

¹² जब दिन ओनवइ लाग तउ उ पचे बारहु ओकरे लगे आएन अउर बोलेन, “भीड़ क बिदाई दइ द्या जैसे उ सबइ नगिचे क गाउँन अउर खेतन मँ जाइके ठहरइ क ठिकाना अउर खइया क पाइ सकई काहेकि हम हिआँ बहोत दूर सुनसान जगह मँ अही।”

¹³ मुला उ ओनसे कहेस, “तू ही एँनका खइया क द्या।”

उ पचे बोलेन, “हमरे लगे बस पाँच रोटी अउर दुइ मछरी क छोड़िके अउर कछू भी नाहीं अहइ। या तू इ तउ नाहीं चाहत अहा कि हम पचे जाई अउर इ सबन बरे खइया के मौल क लइ आई।”¹⁴ (हुवाँ करीब पाँच हजार पुधसन रहेन।)

मुला ईसू आपन चेलन स कहेस, “ओनका पचास पचास क दल मँ बइठाइ द्या।”

¹⁵तउ उ पचे वइसा ही किहेन अउर हर कउनो क बइठाइ दिहना। ¹⁶फिन ईसू पाँच रोटी अउर दुइ मछरी क लइके सरोगे कइँती लखत भवा ओनके बरे धन्यबाद दिहेस अउर फिन ओनके टुकड़न मँ तोरत भवा ओनका आपन चेलन क दिहेस कि उ पचे मनइयन क परोस देई। ¹⁷मनइयन खूब जिअरा भरिके खाएन अउर बचा भवा टुकड़न स ओकर चेलन बारह झउआ भरेन।

ईसू ही मसीह अहइ

(मती 16:13-19, मरकुस 8:27-29)

¹⁸इ भवा कि ईसू जब अकेल्ले मँ पराथना करत रहा तउ ओकर चेलन भी ओकरे संग रहेन। तउ ईसू ओनसे पूछेस, “मनइयन का कहत ही कि मई कउन हउँ?”

¹⁹उ पचे जवाब दिहन, “बपतिस्मा देवइया यूहन्ना कछू कहत ही एलिय्याह मुला कछू दूसर कहत ही पुरान जुग क कउनो नबी उठि खड़ा भवा बा।”

²⁰ईसू ओनसे कहेस, “अउर तू का कहत ह कि मई कउन हउँ?”

पतरस जवाब दिहेस, “परमेस्सर क मसीह।”

²¹मुला इ बारे मँ कउनो क भी न बतावइ क चिताउनी देत भवा। ईसू ओनसे कहेस, ²²“इ तइ अहइ कि मनई क पूत ढेरि क कस्ट उठाई अउर उ बुजुर्ग यहूदी नेतन, मुख्ययाजकन अउर धरम सास्तिरियन क मना कइ दिहे स मारि डावा जाई फिन तिसरे दिन जी जाई।”

²³फिन उ ओन सबन स कहेस, “जदि कउनो मोरे साथ चलत चाहत ह तउ ओका खुद आपन क नकारइ क होई। अउर हर दिन ओका आपन क्रूस (यातना) उठावइ क होई। अउर मोर अनुसरन करइ क होइ। ²⁴काहेकि जउन कउनो आपन जिन्गी बचाउब चाहत ह, उ ओका खोइ बइठी मुला जउन कउनो मोरे बरे आपन जिन्गी क तजि देइ, उहइ ओका बचाई। ²⁵काहेकि एँहम कउनो मनई का का लाभ अहइ कि उ समूचे संसार क लइ लेइ मुला खुद आपन क नास कइ देइ या खोइ देइ। ²⁶जउन कउनो भी मोरे या मोरे सबन बरे लजात ह, ओकरे बरे मनई क पूत भी जब आपन महिमा मँ, आपन परमपिता अउर पबित्तर सरगदूतन क महिमा मँ परगट होई तउ ओकरे बरे लजाइ जाई। ²⁷मुला मई तोसे सच कहत हउँ, हिआँ कछू खड़ा अहइँ, जउन जब तलक मउत क सेवाद नाहीं लेइहीं, जब ताई परमेस्सर क राज्य क ना लिखि लेंई।”

मूसा अउर एलिय्याह क संग ईसू

(मती 17:1-8, मरकुस 9:2-8)

²⁸इ सबन के कइइ क लगभग आठ दिना बाद उ पतरस, यूहन्ना अउर याकूब क संग लइके पराथना बरे

पहाड़े प गवा। ²⁹फिन अइसा भवा कि पराथना करत भए ओकरे मुँहना क रूप तनिक अलग होइ गवा अउर ओकर ओढ़ना चमचमात सफेद होइ गएन। ³⁰हुवई ओसे बतियात दुइ मनई परगट भएन। उ सबइ मूसा अउर एलिय्याह रहेन। ³¹जउन आपन महिमा क संग परगट भ रहेन अउर ईसू क मउत क बारे मँ बात करत रहेन जेका ओका यरूसलेम मँ पूरा करइ क रहा। ³²मुला पतरस अउर जउन ओनके संग रहेन ओनका नींद आइ गइ। तउ जब उ पचे जागेन उ पचे ईसू क महिमा क लखेन अउर उ सबइ उ दुइ मनइयन क लखेन जउन ओकरे संग खड़ा रहेन। ³³अउर फिन भवा अइसा कि जइसे ही उ पचे ईसू स बिदाई लेत रहेन, पतरस ईसू स कहेस, “स्वामी अच्छा बा कि हम हिआँ अही, हमका तीन माँइव बनवइ क अहईँ एक तोहरे बरे, एक मूसा बरे अउर एक एलिय्याह बरे।” (उ नाहीं जानत रहा, उ का कहत अहइ।) ³⁴उ इ कहत रहा कि एक बादर उमड़ा अउर उ ओनका आपन छाया मँ घेरि लिहस। जइसे ही ओन प बादर छावा, उ पचइ घबराइ गएन। ³⁵तबहीं बदरे स अकासबाणी भइ, “इ मोर पूत अहइ, एँका मई चुन्यो ह, एकर सुना।”

³⁶जब अकासबाणी होइ गइ तउ उ पचे उहाँ ईसू क अकेल्लन पाएन। उ पचे एँकरे बारे मँ चुप रहेन। उ सबइ जउन कछू लखेन, ओकरे बारे मँ उ समइ कउनो स कछू नाहीं कहेन।

लरिका क दुस्ट आतिमा स छुटकारा

(मती 17:14-18, मरकुस 9:14-27)

³⁷अगवा दिन अइसा भवा कि जब उ पचे पहाड़ी स तरखाले उतरेन तउ ओनका एक बड़ी भीड़ मिलि गइ। ³⁸तबहिं भीड़ मँ स एक मनई चिचियान, “गुरु, मई पराथना करत हउँ कि मोरे बेटवा प दया दृस्टि करा। उ मोर इकलौती संतान अहइ। ³⁹एकदममई एक दुस्ट आतिमा ओका जकरि लेत ह अउर चिचिआत ह। ओका दुस्ट आतिमा अइसे अइँउत ह कि ओकरे मुँहे स झाग निकरइ लागत ह। उ ओका बराबर सतावत रहत ह अउर कउनो तरह नाहीं छोड़त। ⁴⁰मई तोहरे चेलन स पराथना किहा ह कि ओका बाहरे खदेर देईँ मुला उ पचे अइसा नाहीं कइ सकेन।”

⁴¹तब ईसू जवाब दिहेस, “अरे अबिसवासियो अउर भटक गवा मनइयो, मई अउर केँना दिन तोहरे संग रहब अउर कब ताई तोहार सहत रहब?” आपन बेटवा क हिआँ लिआवा।”

⁴²अबहीं उ लरिका अउतइ रहा कि दुस्ट आतिमा ओका पटकनी दिहेस अउर अइँठेसि। मुला ईसू दुस्ट आतिमा क फटकारेस अउर लरिका क रोग स जरटूट कइके बाप क सौँपि दिहेस। ⁴³उ सबइ परमेस्सर क इ बड़कई स अचरजे मँ पड़ि गएन।

ईसू क जरिये आपन मउत क कहब

(मती 17:22-23, मरकुस 9:30-32)

ईसू जउन कछू करत रहा ओखा लखिके मनइयन जब अचरज करत रहेन तबहीं ईसू आपन चलन स कहेस, ⁴⁴“अब मई जउन तोहसे कहत हउँ, ओन बातन प धियान द्या। मनई क पूत मनइयन क हाथे स धरावड़ जाइवाला अहइ।”

⁴⁵मुला उ पचे इ बात क नाही समुझ सकेन। इ ओनसे छुपी रही। तउ उ सबइ ओका पहिचान नाही पाएन। अउर उ पचे उ बात क बारे में ओसे पूछइ स ससान रहेन।

सब स बड़कवा कउन

(मती 18:1-5, मरकुस 9:33-37)

⁴⁶एक दाई ईसू क चलन क बीच इ बाते प झगड़ा भवा कि ओनमों स सब स बड़कवा कउन बाटइ? ⁴⁷ईसू जानि गवा कि ओनके मने में का बिचार अहइ। तउ उ गदला क लिहस अउर ओका अपने लगे ठाड़ कइके ⁴⁸ओनसे बोला, “जउन कउनो इ गदला क मोरे नाउँ में ग्रहण करत ह, उ माना मोर ग्रहण करत बाटइ। अउर जउन कउनो मोर ग्रहण करत ह, उ ओकर (परमेस्सर) ही ग्रहण करत बाटइ जउन मोका पठएस ह। यह बरे जउन तू सबन में सब स नान्ह बाटइ, उहइ सबइ त बड़कवा अहइ।”

जउन तोहार बिरोधी नाही, उ तोहार ही अहइ

(मरकुस 9:38-40)

⁴⁹यूहन्ना आपन प्रतिक्रिया परगट करत भवा कहेस, “स्वामी, हम पचे तोहरे नाउँ प एक तु मनई क दुस्ट आतिमन क निकारत लखा ह। हम सबइ ओखा रोकइ थामइ क जतन कीन्ह ह काहेकि उ हम पचन में स कउनो नाही अहइ, जउन तोहरे पाछे पाछे चलत ही।”

⁵⁰एह पइ ईसू यूहन्ना स कहेस, “ओका जिन रोका काहेकि जउन तोहरे बिरोध में नाही अहइ, उ तोहरे पच्छ में ही बाटइ।”

एकसामरी सहर

⁵¹अब अइसा भवा कि जब ओका ऊपर सरगे में लइ जाइके समइ आइ तउ उ यरूसलेम जाइके मन पक्का कइके चला गवा। ⁵²उ आपन दूनन क पहिले ही पठइ दिहस। उ पचे चलेन अउर ओकरे बरे तइयारी करइ क सामरी लोगन क गाउँ में पहुँचेन। ⁵³मुला सामरी मनइयन हुवाँ ओकर सुआगत मान नाही किहेन काहेकि उ यरूसलेम जात रहा। ⁵⁴जब ओकर चलन याकूब अउर यूहन्ना इ देखेन तउ उ पचे बोलेन, “पभूँ का तू चाहत ह कि हम हुकुम देई कि अकासे स आगी बरिसइ अउर ओनका भसम कइ देइ?”

⁵⁵एह प उ ओनकी कइँती मुड़ा अउर ओनका डाटेस फटकारेस। * ⁵⁶फिन उ सबइ दूसर गाउँ चला गएन।

ईसू क पाछे चलब

(मती 8:19-22)

⁵⁷जब उ सबइ सड़क पा जात रहेन कउनो ओसे कहेस, “तू कतहूँ भी जा मई तोहरे पाछे चलब।”

⁵⁸ईसू ओसे कहेस, “लोखरिन क लगे बिल होत ही अउर अकासे क चिरइयन क घोसला होत हीं मुला मनई क पूत क मूँड़ धरइ क कउनो ठउर नाही।”

⁵⁹उ दूसर स कहेस, “मोरे पाछे होइ जा।”

मुला उ मनई बोला, “पभूँ, पहिले मोका जाइ द्या काहेकि मई आपन बाप क दफनियाइ आवउँ।”

⁶⁰तब ईसू ओसे कहेस, “मरे भवा लोगन क आपन मुर्दा गाइइ द्या, तू जा अउर परमेस्सर क राज्य क एलान करा।”

⁶¹फिन कउनो अउर भी कहेस, “हे पभूँ, मई तोहरे पाछे चलब मुला पहिले मोका आपन घरे क मनइयन स बिदाइ कइ देइ द्या।”

⁶²एह प ईसू ओसे कहेस, “अइसा कउनो भी जउन हरे प हाथ धरे क बाद पाछे देखत ह, परमेस्सर क राज्य क जोग नाही।”

ईसू बहत्तर चलन क पठएस

10 इ सबइ घटि जाइके पाछे पभूँ बहत्तर * अउर मनइयन क तय किहन अउर फिन जउन जउन सहरन अउर ठिकानन प ओका खुद जाइके रहा, दुइ दुइ कइके उ ओनका उ आपन स अगवा पठएस। ²उ ओनसे बोला, “फसल खूब जिआदा बा, मुला काम क करइया मजूर कम अहइ। यह बरे फसल क पभूँ स बिनती करा कि उ आपन फसल में मजूर पठवइ। ³जा अउर सुमिरत रहा, मई तोहका बिगवन क बीच भेड़ क मेमनन क नाई पठवत अहउँ। ⁴कउनो बटुआ आपन संग जिन ल्या, न थैला अउर न ही पनही। राहे में कउनो स पैलगी तलक जिन करा। ⁵जउनो घरवा में जा, सब ते पहिले कहा, ‘इ घरवा क सान्ति मिलइ।’ ⁶जदि हुवाँ कउनो सान्ति क मनई होई तउ तोहार सान्ति ओका मिली। मुला जदि उ मनई सान्ति क न होई तउ तोहार सान्ति लौटि आई। ⁷जउन कछू उ पचे तोहका देई।

पद 55 कछू यूनानी प्रतियन में इ भाग जोड़ा गवा अहइ: “अउ ईसू कहेस, ‘का तू नाही जानत्या कि तू कइसी आतिमा स रिस्ता रखत ह। ⁵⁶मनई क पूत मनइयन क आतिमन क नासय नाही मुला ओनकइ उद्धार करइ आवा अहइ।”

बहत्तर लूका क कछू यूनानी प्रतियन में इ गिनती सत्तर भी मिलत ह।

ओका खात पिअत उहइ घरवा मँ ठहरा। काहेकि मजुरी प मजूर क हक अहइ। घर घर जिन फिरा।⁸ अउर जब कबहूँ तू कउनो सहर मँ जा अउर उ सहर क मनई तोहार सुआगत करई तउ जउन कछू तोहका परसई, बस उहइ खा।⁹ उ सहर क बेरमियन क बीमार स जरटुट करा अउर ओनसे कहा, 'परमेस्सर क राज्य तोहरे नगिचे आइ पहुँचा बा!' ¹⁰ अउर जब कबहूँ तू कउनो अइसे सहर मँ जा जहाँ क मनई तोहार मानसम्मान न करई, तउ हुवाँ क गलियन मँ जाइके कहा, ¹¹ 'इ सहर क उ धूरि तलक जउन हमरे गोड़े मँ चिपकी रही, हम तोहरे खिलाफ हिआँ झार देत अही। फिन भी इ धियान रहइ कि परमेस्सर क राज्य नगिचे आइ गवा बा।' ¹² मई तोहसे कहत हउँ कि उ दिन उ सहर क लोगन स सदोम क लोगन क दसा कहूँ नीक होइ।

बिसवास न करइवालन क चिताउनी

(मती 11:20-24)

¹³ अरे खुराजीन, अरे बैतसैदा, तोहका धिक्कार अहइ काहेकि जउन अद्भुत कारजन तोहमाँ कीन्ह गएन, जदि ओनका सूर अउर सैदा मँ कीन्ह जात तउ न जानी कबहूँ उ टाट क कपरा पहिरि के राखि प बइठिके मनफिराव कइ लेतेन। ¹⁴ कछू भी होइ निआन क दिन सूर अउर सैदा क हालत तोहसे कहूँ नीक होई। ¹⁵ अरे कफरनहूम का तू सरग क ऊँचाई क तरह ऊँचा उठब्बा? तू तउ तरखाले नरक मँ जाब्बा।

¹⁶ 'जउन कउनो तोहका सुनत ह, मोका सुनत ह, अउर जउन कउनो तोहका दुरियावत ह, उ मोका दुरियावत ह जउन मोका पठएस ह। अउर जउन मोका नकारत अह उ उसे नकारत अह जउन मोका पठएस ह।'

सइतान गिरत ह

¹⁷ फिन उ सबइ बहत्तर आनन्द होइके वापस लउटेन अउर बोलन, "हे पभूँ दुस्ट आतिमन तलक तोहरे नाउँ मँ हमार हुकुम मानत ही।" ¹⁸ एह पइ ईसू ओनसे कहेस, "मई सइतान क अकास स बिजरी क नाई गिरत लखा हउँ। ¹⁹ सुना, कीरा अउर बीछी क गोड़े ररे तौदब अउर सइतान क समुची सक्ती प हावी होइ क सामर्थ मई तोहका दिहे अही। तोहका कउनो नसकान नाहीं पहुँचाइ पाई। ²⁰ मुला इ बात प खुस जिन हवा कि आतिमन तोहरे बसे मँ अहई बल्कि एह पइ खुस होइ जा कि तोहार नाउँ सरगे मँ लिखा बाटइ।"

ईसू क परमपिता स पराथना

(मती 11:25-27; 13:16-17)

²¹ उहइ छिन उ पवित्तर आतिमा मँ रहिके आनंद मँ रहा अउर बोला, "हे परमपिता! हे सरग अउर धरती क

पभूँ! मई तोहार स्तुति करत हउँ कि तू इ बातन क चतुर अउर बुदिधमान मनइयन स छुपाइ के राखत भवा भी गदेलन बरे ओनका परगत कइ दिहा ह। हे परमपिता! सचमुच ही तू अइसा ही करब चाहत रह्या।

²² 'मोका मोरे परमपिता क जरिये सब कछू दीन्ह ग अहइ अउर परमपिता क अलावा कउनो नाहीं जानत कि पूत कउन अहइ अउर पूत क अलावा कउनो नाहीं जानत कि परमपिता कउन अहइ या ओकरे अलावा जेका पूत एँका परगत करइ चाहत ह।'

²³ फिन चेलन कइँती मुड़िके ईसू चुपे स कहेस, "धन्य अहई उ आँखिन जउन तू देखत अहा, ओका देखत ही।" ²⁴ काहेकि मई तोहका बतावत हउँ कि उन बातन क बहोत स नबी अउर राजा देखइ चाहत रहिन। जेनका तू देखत रह्या, मुला देखि नाहीं सक्या। जउन बातन क तू सुनत रहत ह, उ सबइ ओनका सुनइ चाहत रहेन, मुला उ पचे सुन नाहीं पाएन।"

नीक सामरी क कथा

²⁵ तब एक धरम सास्त्री खड़ा भवा अउर ईसू क परीच्छा लेइ बरे ओसे पूछेस, "गुरु, अनन्त जीवन पावइ बरे मई का करउँ?"

²⁶ एह पइ ईसू ओनसे कहेस, "व्यवस्था मँ का लिखा बाटइ? तू हुवाँ का पढत ह?"

²⁷ धरम सास्त्री उत्तर दिहस, "तू आपन समुचा मन, सारी आतिमा, सारी सक्ती अउर सारी बुदिध क संग आपन पभूँ स परिमे करा।" * अउर 'आपन पड़ोसी स भी वइसे ही पिआर करा, जइसे तू आपन खुद स करत ह।' *

²⁸ तब ईसू ओसे कहेस, "तू ठीक जवाब दिहा ह। तउ तू अइसा ही करा अउर एँहसे तू जीवित रहब्बा।"

²⁹ मुला उ आपन ताई निआव स जुरा भवा ठहरावइ क इच्छा करत भवा ईसू स कहेस, "अउर मोर परोसी कउन अहइ?"

³⁰ ईसू जवाबे मँ कहेस, "देखा, एक मनई यरूस्लेम स यरीहो जात रहा कि उ डाकुअन स घिरि गवा। उ पचे सब कछू मुच्छ कइ ओका नंगा कइ दिहन अउर मार पीटिके ओका अधमरा छोड़ि के उ पचे चल दिहन।

³¹ अब संजोग स उहइ रस्ता स एक यहूदी याजक जात रहा। जब उ एका निहारेस तउ दूसर कइँती चला गवा।

³² उहइ रस्ता स गुजरत भवा, एक लेवी * भी हुवाँ आवा। उ ओका देखेस अउर उ भी दुसरी कइँती चला गवा।

³³ मुला एक सामरी भी जात भवा हुवाँई आइ गवा जहाँ उ

तू ... करा' व्यवस्था 6:5

'आपन ... ह' लैव्य 19:18

लेवी लेवी परिवार समूह क एक मनई। इ परिवार समूह मंदिर मँ याजक क मदद करत रहा।

माँगत रहा

ओलार दीन्ह ग रहा। उ जब उ मनई क देखेस तउ ओकरे बरे ओकरे मन मँ करुना आइ।³⁴ तउ उ ओकरे नगिचे आवा ओकरे घाउन प तेल अउर दाखरस डाइके पट्टी बाँधेस। फिन उ ओका आपन पसु प लदिके एक तु सराय मँ लइ गवा अउर ओका देखइ भालइ लाग।³⁵ दुसरे दिन उ दुइ दीनार निकारेस अउर ओनका भटियारा क देत भवा कहेस, 'एँकर धियान रख्या अउर एँसे जिआदा जउन कछू खरच होइ, जब मई लौटिहउँ, तोहका चुकाइ देवै।'

³⁶'बतावा तोहरे बिचार स डाकुअन क बीच धिरे भए मनई क पड़ोसी इ तीनउँ मँ स कउन भवा?'

³⁷धरम सास्तरी कहेस, "उहइ जउन ओहँ प दया कियेस।"

एँह पइ ईसू ओनसे कहेस, "जा अउर वइसा ही करा जइसा उ कियेस ह।"

मरियम अउर मार्या

³⁸जब ईसू अउर ओकर चेलन आपन राहे प जात रहेन तउ ईसू एक गाउँ मँ पहुँचा। एक स्त्री, जेकर नाउँ मार्या रहा, दिल खोलिके ईसू क अगवानी अउर सम्मान कियेस।³⁹ मार्या क बहिन मरियम नाउँ क रही जउन ईसू क गोड़वा मँ बैठि गई अउर जउन कछू उ कहत रहा, ओका सुनत रही।⁴⁰ ओहँ तरह तरह क तइयारी मँ लाग मार्या बियाकुल होइके आई अउर बोली, "पभू, का तोहका चिंता नाहीं कि मोर बहिन सारा काम बस मोहे प डाइ दिहे अहइ? यह बरे ओसे मोर मदद करइ क कहा?"⁴¹ पभू ओका जवाब दिहेस, "मार्या अरी मार्या! तू बहोत स बातन क बरे चिंता मँ बूड़ी अउर बियाकुल रहत ह।⁴² मुला बस एक ही बात जरूरी अहइ। मरियम आपन बरे उहइ उत्तिम हीसा क चुने बाटइ, तउ उ ओसे छीना नाहीं जाई।"

पराथना क बारे मँ ईसू क उपदेस

(मती 6:9-15, मरकुस 7:7-11)

11 अब अइसा भवा कि ईसू कहुँ पराथना करत रहा। जब उ पराथना खतम कइ चुका तउ ओकर एक चेला ओसे कहेस, "पभू हमका सिखावा कि हम पराथना कइसे करी। जइसा कि यूहन्ना आपन चेलन क सिखाए रहा।"

²एँह पइ उ ओसे कहेस, "तू पराथना करा, तउ कहा:

'परमपिता, तोहार नाउँ पवित्तर होइ, आवइ तोहार राज्य

³ हर दिन क बरे जरूरी रोटी हमका द्या;

⁴ हमार अपराध छमा करा, काहेकि हमहूँ छमा कीन्ह ह आपन अपराधी क, कठिन परीच्छा मँ हमें जिन डावा।"

⁵⁻⁶फिन ईसू कहेस, "मान ल्या तोहमाँ स कउनो क एक मीत अहइ, तउ तू आधीरात ओकरे लगे आइके कहत ह, 'मीत, मोका तीन रोटी द्या। काहेकि एक मीत अबहीं अबहीं जात्रा प मोरे लगे आवा ह अउर मोरे लगे ओकरे समन्वा परसइ क कछू भी नाहीं बा।'⁷ अउर मान ल्या उ मनई भितरे स जवाब दिहस, 'मोका तंग जिन करा, दुआर बंद होइ चुका अहइ बिछउना प मोरे साथ गदेलन अहइ, यह बरे तोहका कछू देइ मँ खड़ा नाहीं होइ सकिता।'⁸ मई तोहका बतावत हउँ उ अगर न उठी अउर तोहका कछू न देई, मुला फिन भी काहेकि उ तोहार मीत बा, तउ तोहरे लगातार, बे सरमाये क माँगत रहइ स उ खड़ा होई अउर तोहार जरूरत भर तोहका देई।⁹ अउर यह बरे मई तोहसे कहत हउँ माँगा, तोहका दीन्ह जाई।¹⁰ दूँडा तू पउब्या खटखटावा, तोहरे बरे दुआर खोलि दीन्ह जाई।¹⁰ काहेकि हर कउनो जउन माँगत ह, पावत ह। जउन दूँदत ह, ओका मिलत ह। अउर जउन खटखटावत ह, ओकरे खातिर दुआर खोलि दीन्ह जात ह।¹¹ तोहरे मँ अइसा बाप कउन होई जउन जदि ओकर बेटवा मछरी माँगइ, तउ मछरी क जगह प ओका कीरा थमाइ दीन्ह जाइ।¹² अउर जदि उ अण्डा माँगइ तउ ओका बीछी दइ देइ।¹³ तउ बुरा होत भवा जब तू जानत ह कि आपन गदेलन क उत्तिम भेंट कइसे दीन्ह जात हीं, तउ स्वर्गीय पिता जउन उ ओसे माँगत हीं, ओनका पवित्तर आत्मा केतँना ढेरि क देई।"

ईसू की सकती परमेस्सर स मिली

(मती 12:22-30, मरकुस 3:20-27)

¹⁴फिन ईसू जब एक गूँगा बनइ डावइवाली दुस्ट आत्मा क निकारत रहा तउ अइसा भवा कि जइसा ही दुस्ट आत्मा बाहेर निकरी, तउ उ गूँगा बोलइ लाग। भीड़ क मनई एँसे बहोतइ अचरजे मँ पड़ि गएन।¹⁵ मुला ओहमाँ स कछू कहेन, "इ सइतान क सासक बालजबूल क मदद स दुस्ट आत्मान क खदेरत ह।"

¹⁶मुला अउर मनइयन ओका परखइ बरे कउनो सरग क चीन्हा क माँग कियेन।¹⁷ लेकिन ईसू जानत रहा कि ओनके मनवा मँ का बाटइ? उ ओनसे कहेस, "उ राज्य जेहमाँ आपन भीतर ही फूट परि जाइ, ओकर नास होइ जात ह अउर अइसे ही कउनो घरे क फूट परे प नास होइ जात ह।¹⁸ जदि सइतान आपन खिलाफ होइ जाइ तउ ओकर राज्य कइसे टिक सकित ह? इ मई तोहसे यह बरे पूछत हउँ काहेकि तू कहत ह कि मई बालजबूल क मदद स दुस्ट आत्मान क निकारत हउँ।

¹⁹मुला जदि मई बालजबूल क मदद स दुस्ट आत्मान क निकारत हउँ तउ तोहार मनवइयन ओनका केकरी मदद स निकारत हीं? तउ तोहार आपन मनई ही तोहका गलत बतइहीं।²⁰ मुला जदि मई परमेस्सर क

सक्ती स बुरी आतिमा को निकारत हउँ तउ इ साफ बा कि परमेस्सर क राज्य तू ताई आइ गवा अहइ!

²¹जब एक सकत क मनई पूरी तरह हथियार टेङ्के आपन घरे क रच्छा करत ह तउ ओकरे धन दौलत क रच्छा होत ह। ²²मुला जब कबहुँ कउनो ओसे जिआदा बरिआर ओह प हमला कइके ओका हराइ देत ह तउ उ ओकरे सबहीं हथियारन क, जउने प ओका भरोसा रहा, ओसे छीन लेत ह अउर लूट क माल क उ पचे अपने दोस्तन में बाँट लेत हीं।

²³जउन मोर संग नाहीं अहई, मोर खिलाफत में बाटेन। उ जउन मोरे संग बटोरत नाहीं अहइ, छितरइहीं।

बे कामकाजी मनई

(मती 12:43-45)

²⁴जब कउनो दुस्ट आतिमा कउनो मनई स बाहेर निकरत ह तउ अराम क ढूँढत सूखे ठउरन में स होत जात ह अउर जब ओका अराम नाहीं मिलत तउ उ कहत ह, 'मई आपन उहइ जगह लौटब जहाँ स गइ हउँ।' ²⁵अउर वापस जाइके उ ओका साफ सूधर अउर तरकीबे में बसी पावत ह। ²⁶फिन उ जाइके आपन स भी जिआदा दुस्ट दूसर सात जिआदा दुस्ट आतिमान क हुवाँ लइ आवत ह। फिन उ सबइ ओहमाँ जाइके रहइ लागत हीं। इ तरह उ मनई क पाछे क दसा पहिले स जिआदा खराब होइ जात ह।"

उ पचे धन्य अहई

²⁷फिन अइसा भवा कि जइसे ही ईसू इ बातन कहेस, भिरिया में स एक स्त्री उठी चिल्लाइके बोली, "उ गरभ धन्य अहइ, जउन तोहका धारण किहेस ह। अउर उ चूची धन्य अहइ, जेका तू चूस्या ह।"

²⁸एह प उ कहेस, "धन्य तउ मुला उ पचे बाटेन जउन परमेस्सर क बचन सुनत हीं अउर ओह प चलत हीं।"

प्रमान क माँग

(मती 12:38-42; मरकुस 8:12)

²⁹जइसे जइसे भिरिया बढ़त रही, उ कहइ लाग, "इ एक दुस्ट पीढ़ी अहइ। इ कउनो अद्भुत चीन्हा लखइ चाहत ह। मुला एँका योना क चीन्हा क अलावा अउर कउनो चीन्हा नाहीं दीन्ह जाइ। ³⁰काहेकि जइसे निनवे क मनइयन बरे योना चीन्हा बन गवा, वइसे ही इ पीढ़ी बरे मनई क पूत भी चीन्हा बनी। ³¹दक्खिन क रानी*निआव क दिन परगट होइके इ पीढ़ी क मनइयन क देखी ठहराई, काहेकि उ धरती दूसर कोने स सुलैमान

क गियान सुनइ बरे आइ अउर अब लखा हिआँ तउ कउनो सुलैमान स भी बड़कवा अहइ। ³²नीनवे क मनइयन निआव क दिना इ पीढ़ी क मनइयन क खिलाफ खड़ा होइके ओन पइ दोख लगइहीं काहेकि उ पचे योना क उपदेस क सुनिके मनफिराव करि लिहन ह। अउर देखा अब तउ योना स भी महान कउनो हिआँ नाहीं बा!

संसार क ज्योति बना

(मती 5:15; 6:22-23)

³³दिया बारिके कउनो भी ओका कउनो छुपा ठउर या कउनो भाँड़ी क भीतर नाहीं राखत, मुला ओका डीबट प धरत ह जेहसे जउन भितरे आवई, ज्योति लखि सकई। ³⁴तोहरे देह क दिया तोहार आँखिन अहई, तउ जदि आँखी नीक अहई तउ समूची देह ज्योति स भरि गइ बाटइ मुला, जदि इ सबइ खराब अहई तउ तोहार देह आँधियार होइ जात ह। ³⁵तउ धियान राखा! कि तोहरे भीतर ज्योति अहइ, आँधियारा नाहीं। ³⁶यह बरे जदि तोहार समूची देह ज्योति स भरिपूर अहइ अउर एँकरे कउनो भी अंग आँधियारा नाहीं तउ उ पूरी तरह अइसे चमकी मान ल्या कउनो दिया तोह पइ आपन किरण स प्रकासित होत ह।"

ईसू फरीसियन क नुक्ता चीनी करत ह

(मती 23:1-36, मरकुस 12:38-40; लूका 20:45-47)

³⁷ईसू जब आपन बात पूरी किहस तउ एक फरीसी ओसे अपने साथ खाइ बरे हठ किहेस। तउ उ भितरे जाइके खइया क खाइ बैठि गवा। ³⁸मुला उ फरीसी जब इ देखेस कि खइया स पहिले उ आपन हाथ नाहीं धोएस तउ ओका बड़ा अचरज भवा।

³⁹एह पइ फरू ओनसे कहेस, "अब लखा तू फरीसियन टाठी अउर खोरो क बस बाहेर स तउ माँजत ह मुला तोहरे भीतर लालच अउर दुस्टता भरी अहइ। ⁴⁰अरे मूढ मनइयो! का जउन बाहरी अंग क बनाएस ह, उ भीतरी अंग क नाहीं बनाएस। ⁴¹यह बरे जउन कछू भितरे अहइ, ओका दीनन क दइ द्या। फिन तोहरे बरे सब कछू पक्वित्तर होइ जाइ। ⁴²अरे फरीसियन! तोहका धिक्कार अहइ काहेकि तू आपन पुदीना अउर सुदाब बूटी अउर हर कउनो जरी बूटी क दसवाँ हींसा तउ चढ़ाइ देत ह मुला परमेस्सर बरे पिरेम अउर निआव क टारि देत ह। मुला इ बातन क तोहका उ बातन क बगैर टारि देइ क करइ चाही। ⁴³अरे फरीसियन! तोहका धिक्कार अहइ! काहेकि तू सबइ आराधनालय में बहोत ही प्रमुख आसन चाहत बाट्या अउर बजारन में मान मर्जाद क संग पैलगी तोहका सोहात ह। ⁴⁴तोहका धिक्कार अहइ काहेकि तू पचे बिना कउनो चीन्हा क कब्र क नाई अहा जेह प मनई चलत हीं मुला उ सबइ नाहीं जानत हीं।"

दक्खिन क रानी अर्थात् सीना हजार मील चलिके सुलैमान स परमेस्सर क गियान सीखइ आइ रही। राजा 10:1-3

यहूदी धरम सास्तिरियन स ईसू क बतियाब

⁴⁵तब एक धरम सास्तिरि ईसू स कहेस, "गुरु, जब तू अइसी बातन कहत ह तउ हम भी बेजत होइत ह।"

⁴⁶एह प ईसू कहेस, "अरे धरम सास्तिरियो! तोहका धिक्कार अहइ। काहेकि तू सबइ मनइयन प अइसा बोझा लादे बाट्या जेका उठाउब मुस्कल अहइ। अउर तू खुद ओन बोझन क एक ठु अँगुरी भर स छुअइ नाहीं चाहत ह। ⁴⁷तोहका धिक्कार अहइ काहेकि तू नबियन बरे मकबरा क बनवत ह, जेनकइ कतल कीन्ह गवा अउर ओनकर कतल करइया तोहार पूर्वजन रहेन। ⁴⁸ऐसे तू सबइ देखौवत ह कि तू आपन पूर्वजन क उ कामे क अँगीकार करत ह। काहेकि उ पचे तउ ओनका मारेन ह अउर तू पचे ओनकइ मकबरा क बनाया ह। ⁴⁹यह बरे परमेस्सर क गियान भी कहेस, 'मई नबियन अउर प्रेरितन क भी ओनके लगे पठउबा फिन कछू क तो उ पचे मारि डइहीं अउर कछू क सजा देइहीं।' ⁵⁰यह बरे संसार क सुरुआत स जेतेना भी नबियन क लहू बहाइ दीन्ह ग अहइ, ओनकइ हिसाब इ पीढ़ी क मनइयन स चुकाइ जाइ। ⁵¹हाबिल क कतल स लइके जकरयाह क कतल तलक क हिसाब जउन परमेस्सर क मंदिर अउर वेदी क बीच कीन्ह गवा रहा। हाँ, मई तोहसे कहत हई इ पीढ़ी क मनइयन क एकरे बरे लेखा जोखा देइ क होइ।

⁵²ओ धरम सास्तिरियो! तोहका धिक्कार अहइ, काहेकि तू सबइ गियान क कुंजी तउ लइ लिहा ह। मुला ओहमाँ न तउ खुद घुसि पाया अउर न घुसइ क कउनो जतन करत रह्या। ओनका भी तू अडंगा डाय जे अइसा करइ चाहेन।"

⁵³अउर फिन जब ईसू हुवाँ स चला गवा तउ उ सबइ धरम सास्तिरियन अउर फरीसियन ओसे घोर दुस्मनी राखइ लागेन। बहोत स बातन क बारे मँ ओसे सोझ सवाल करइ लागेन।

⁵⁴काहेकि उ सबइ ओका ओकर कही कउनो बात स घात करइ बरे टोहत रहेन।

फरीसियन जइसा जिन बना

12 अउर फिन जब हजारन मनइयन क भारी भीड़ जुटि गइ तउ एक दुसरे क रँदि जात रही तब ईसू पहिले आपन चेलन स कहइ लाग, "फरीसियन क खमीरे स, जउन ओनकइ कपट बा, बचा रहा। ²कछू छुपा नाहीं अहइ जउन परगट नाहीं कइ दीन्ह जाइ। अइसा कछू अनजाना नाहीं अहइ जेका बतावा नाहीं दीन्ह जाइ। ³यह बरे हर उ बात जेका तू अँधियारे मँ कह्या ह, उजिआरे मँ सुनी जाइ। अउर एकांत खोली मँ जउन कछू भी तू चुप्पे स कउनो क काने मँ कह्या ह, घरे क छते स एलान कइ दीन्ह जाइ।"

परमेस्सर स डेराअ

(मती 10:28-31)

⁴मुला मोर मीतो, मई तोहसे कहत हई ओनसे जिन डेराअ जउन तोहरे तन क मारि डाइ सकत हीं अउर ओकरे पाछे अइसा कछू नाहीं अहइ जउन ओनके बस मँ होइ। ⁵मई तोहका देखाउब कि तोहका कउनो स डेराइ चाही। ओसे (परमेस्सर) डेराअ जउन तोहका मारिके नरक मँ नावइ क सकती राखत ह। हाँ, मई तोहका बतावत हई, बस उहइ स डेराअ।

⁶का दुइ पइसा मँ पाँच ठु चिरइयन नाहीं बिकतिन? फिन भी परमेस्सर ओहमाँ स एक क भी नाहीं बिसरत। ⁷अउर लखा तोहरे मूँडे प क एक एक बारि तलक गना भवा अहई। डेराअ जिन तू बहोत सी चिरइयन स कहूँ जिआदा कीमत क अहा।"

ईसू क नाई प जिन सर्मा

(मती 10:32-33; 12:32; 10:19-20)

⁸मुला मई तोहसे कहत हई जउन कउनो मनई सबहीं क समन्वा मोकामानत ह, मनई क पूत भी उ मनई क परमेस्सर क दूनन क समन्वा मानी। ⁹मुला ज जउन मोकामा दुसरे क समन्वा न मानी, ओका परमेस्सर क दूनन क समन्वा इन्कार कइ दीन्ह जाइ।

¹⁰अउर हर उ मनई क तो छमा कइ दीन्ह जाइ जउन मनई क पूत क खिलाफ कउनो सब्ब बोलत ह, मुला जउन पवित्तर आतिमा क बुराई करत ह, ओका छमा नाहीं कीन्ह जाइ।

¹¹तउ जब उ पचे तोहका आराधनालय मँ, राज्य क करइवालन अउर अधिकारियन क समन्वा लइ जाई तउ फिकिर जिन करया काहे तू आपन क कइसे बचउब्बा या तोहका का कछू कहे होइ। ¹²चिंता जिन करा काहेकि पवित्तर आतिमा तोहका सिखाइ कि उ समइया तोहका का बोलइ चाही।"

सुआरथ क खिलाफ चिताउनी

¹³फिन भीड़ मँ स ओसे कउनो कहेस, "गुरु, मोरे भइया स मोरे बाप क धन दौलत क हींसा बाँटइ बरे कहि द्या।" ¹⁴एह प ईसू ओसे कहेस, "अरे भले मनई, मोकामा तोहरे बरे निआववाला या पंच कउन बनएस ह?" ¹⁵तउ ईसू ओनसे कहेस, "होसियारी क संग आपन क लालच स दूर राखा। काहेकि जरूरत स जिआदा धन-दौलत होइ प जिन्नगी क आधार ओकर संग्रह नाहीं होत।"

¹⁶फिन उ ओनका एक दिस्तान्त कथा सुनाएस: "कउनो धनी मनई क धरती प खूब पैदावार भइ। ¹⁷उ आपन मनवा मँ सोचत भवा कहइ लाग, 'मई का करूँ, मोरे लगे फसिल क रखइ बरे ठउर तउ अहइ नाहीं।' ¹⁸फिन उ बोला, 'ठीक अहइ मई इ करब कि आपन

अनाज क कोठिला गिराइके बड़का कोठा बनवाउब अउर आपन समूचा अनाज क अउर सामान हुवाँ रखबा।¹⁹फिन आपन आतिमा स कहब, अरे मोर आतिमा अब बहोत स उत्तिम बस्तु, बहोत स बरिस बरे तोहरे लगे ऐकट्टी अहई। घबरा जिन, खावा, पिआ अउर मउज उडावा!'²⁰मुला परमेस्सर ओसे बोला, 'अरे मूर्ख! इहइ राति मैं तोहार आतिमा तोहसे लइ लीन्ह जाइ। जउन कछू तू तइयार किहे अहा, ओका कउन लेइ?'

²¹'लखा, उ मनई क संग भी कछू अइसा ही भवा ह, उ अपने बरे बटोरत ह मुला परमेस्सर क निगाह मैं उ धनी नाहीं।'

परमेस्सर क राज क महत्ता

(मती 6:25-34; 19:21)

²²तब उ आपन चेलन स कहस, 'यह बरे मई तोहसे कहत हउँ, आपन जिन्नगी क फिकिर जिन करा कि तू का पहिन्ब्या? ²³काहेकि जिन्नगी खइया स अउर तन ओढ़ना स जिआदा जरूरी अहइ। ²⁴कउन क लखा, न उ पचइ बोवत हीं, न ही उ पचे काटत हीं। न ओनके लगे भण्डारा बा अउर न आजु अन्न क कोठिला, फिन भी परमेस्सर ओनका भोजन देत ह। तू तउ चिरइन स केतँना जिआदा कीमती अहा। ²⁵चिन्ता कइके, तू पचन मैं स कउन अइसा अहइ, जउन आपन उमिर मैं एक घड़ी भी अउर जोर सकत ह? ²⁶काहेकि तू जदि छोटका काम क भी नाहीं कइ सकत्या तउ बाकी बरे काहे फिकिर करत ह? ²⁷कोका बेली क लखा, उ कइसे उगत हीं? न उ सबइ मेहनत करत हीं, न कतार्इ, फिन भी मई तोहसे कहत हउँ कि सुलेमान आपन समूचे धन दौलत क संग ओहमाँ स कउनो एक क नाई नाहीं सज पाएस। ²⁸यह बरे जब मैदान क घास क, जउन आज हिआँ बा अउर भियान ही ओका भार मैं झोंक दीन्ह जाइ, परमेस्सर अइसे ओढ़नन स सजावत ह तउ अरे ओ कम बिसवास करइया मनइयो! तोहका तउ उ केतँना अउर जिआदा ओढ़ना पहिराइ। ²⁹अउर फिकिर जिन करा कि तू का खाब्या अउर का पीब्या। एँके बरे जिन सोचा।

³⁰काहेकि संसार क अउर सबहीं मनई इ चीजन्क क पाछे धावत अहई मुला तोहार परमपिता तउ जानत ही आहइ कि तोहका इ चीजन्क जरूरत अहइ। ³¹मुला तू तउ परमेस्सर क राज्य क चिन्ता करा। इ चीजन तउ तोहका दइ दीन्ह जइहीं।

धने प भरोसा जिन करा

³²'हे भोली भेड़ी क झुण्ड! जिन डेराअ, काहेकि तोहार परमपिता तोहका राज्य देइ क तइयार अहइ। ³³तउ आपन धन दौलत बेंचिके धन गरीबन मैं बाँटि द्या। आपन लगे अइसी झोरी राखा जउन पुरान न होई

अरथ बा कबहुँ न टूटइवाला सरगे में खजाना जहाँ ओह तलक कउनो चोर क पहुँच न होइ। अउर न ओका न किरवा नास कइ पावई।

³⁴काहेकि जहाँ तोहार खजाना अहइ, हुवई तोहार मनवा भी रही।

सदा तइयार रहा

(मती 24:45-51)

³⁵'काम करइ क सदा तइयार रहा। अउर आपन दिया बारे रहा। ³⁶अउर ओ मनइयन जइसा बना जउन बियाह क भोज स लौटिके आवत आपन स्वामी क जोहत होई जेहसे उ जब आवइ अउर दुआर खटखटावइ तउ उ पचे फउरन खोलि सकई। ³⁷उ नउकर धन्य अहई जेका स्वामी वापस आइके जागत अउर तइयार पइहीं। मई तोहसे सच कहत हउँ कि उ भी ओनकर सेवा बरे करिहाउँ बाँधि लेइ अउर ओनका खइया क पीढा प जेवई बरे बइठाई। उ आई अउर ओनका जेवाँइ। ³⁸उ चाहे आधी राति स पहिले आवइ अउर चाहे आधी राति क पाछे जदि उ ओनका तइयार पावत ह तउ उ सबइ धन्य अहई। ³⁹इ बात बरे निश्चित रहा कि जदि घरे क स्वामी क इ पता होइ कि घरे कउनो घड़ी आवत अहइ, तउ उ ओका आपन घरे मैं संध नाहीं लगावइ देइ। ⁴⁰तउ तू भी तइयार रहा काहेकि मनई क पूत अइसी घड़ी मैं आई जेका तू सोच नाहीं सकत्या।'

बिसवास क जोग्ग सेवक कउन?

⁴¹तब पतरस पूछस, 'पभू, इ दिस्टान्त कथा तू हमरे बारे कहत अहा या सब बारे?'

⁴²एँह प पभू कहेस, 'तउ फिन अइसा बिसवास क जोग्ग, बुद्धिमान सरंजाम अधिकारी कउन होइ जेका पभू आपन नउकरन क ठीक समइ प खइया क चीज देइ बरे ठहराइ? ⁴³उ नउकर धन्य अहइ जेका ओकर स्वामी जब आवइ तउ ओका वइसा ही करत पावइ। ⁴⁴मई सच कहत हउँ कि उ ओका आपन सबहीं धन दौलत क अधिकारी ठहराइ। ⁴⁵मुला उ नउकर आपन मनवा मैं सोचइ कि मोर स्वामी तउ आवइ मैं देर करत अहइ अउर उ दूसर पुरुस अउर स्त्री नउकरन क मारब पीटब सुरु कइ देइ अउर खाइ पिअइ अउर नसा मैं चूर होइ। ⁴⁶तउ उ नउकर क स्वामी अइसे दिन आइ जाइ जेका उ सोचत नाहीं। एक तु अइसी घरी जेकरे बारे मैं निसाखातिर अहइ। फिन भी ओकर टुकरा टुकरा कइ डाइ अउर ओका न बिसवास करइयन क बीच ठउर देइ।

⁴⁷'उ नउकर जउन आपन स्वामी क इच्छा जानत ह अउर ओकरे बारे तइयार नाहीं होत या जइसा ओकर स्वामी चाहत ह, बइसहु नाहीं करत, तउ नउकर प जमिके मार परी। ⁴⁸मुला उ जेका आपन स्वामी क

मनफिरावा

इच्छा क ज्ञान नाही अउर कउनो अइसा काम कइ डावइ जउन मार खाइ काबिल होइ तउ उ नउकर प हल्की मार परी। काहेकि उ हर मनई स जेका बहोत जिआदा दीन्ह ग अहइ, जिआदा माँगा जाइ। उ मनई जेका ढेर सौंपा ग अहइ ओसे जिआदा ही माँगा जाइ।”

मनइयन क मत ईसू स मेल नाही खात

(मती 10:34-36)

⁴⁹“मई धरती प एक आगी बारइ आवा हउँ। मोर केतनी इच्छा अहइ कि उ साइद अबहुँ ताई बरि जात। ⁵⁰मोरे लगे एक बपतिस्मा अहइ जउन मोका लेब बा जब ताई उ पूर नाही होइ जात, मई केतना बियाकुल हउँ। ⁵¹तू का सोचत बाट्या कि मई इ धरती प सान्ति लइ आवइ क बरे आवा हउँ? नाही, मई तोहका बतावत हउँ, मई अलगावइ आवा हउँ। ⁵²काहेकि अब स आगे एक घरे क पाँच आदमी एक दूसर क खिलाफ बैँटि जइहीं। तीन दुइ क बिरोध मँ अउर दुइ तीन क बिरोध मँ होइ जइहीं।

⁵³ बाप बेटवा क बिरोध मँ, अउर बेटवा बाप क बिरोध मँ। महतारी बिटिया क बिरोध मँ, अउर बिटिया महतारी क बिरोध मँ, सास दुलहिन क बिरोध मँ अउर दुलहिन सास क बिरोध मँ होइ जइहीं।”

समइ क पहिचान

(मती 16:2-3)

⁵⁴फिन उ भीड़ स बोला, “जब तू पच्छू कइँती कउनो बदरे क उठत भइ लखत ह तउ कहि देत ह, ‘बरखा आवति अहइ’ अउर फिन अइसा ही होत ह। ⁵⁵अउर फिन जब दखिनी हवा चलत ह, तू कहत ह, ‘गरमी पड़ी’ अउर अइसा ही होत ह। ⁵⁶अरे कपटी मनइयो! तू धरती अउर अकासे क रूपे क समझाउब तउ जानत बाट्या, फिन अइसा काहेकि इ जुग क बारे मँ समझाउत्या नाही?”

आपन समसिया हल करा

(मती 5:25-26)

⁵⁷“जउन नीक अहइ, ओकर पैसला करइवाला तू खुद काहे नाही बनत्या? ⁵⁸जब तू आपन बैरी क संग न्यायाधीस क लगे जात रहब्या तउ रास्ता मँ ही ओकरे संग समझौला करइ क जतन करया। नाही तउ कहुँ अइसा न होइ कि उ तोहका न्यायाधीस क लगे खँच लइ जाई अउर न्यायाधीस एक अधिकारी क सौंपि देइ। अउर अधिकारी तोहका जेल मँ धौंध देइ। ⁵⁹मई तोहका बतावत हउँ, तू हुवाँ स तब ताई छूटि नाही पउब्या जब तलक आखिरी दमड़ी तक न चुकाइ द्या।”

13 उ समइया हुवाँ हाजिर कछू मनइयन ईसू क ओन गलीलियन क बारे मँ बताएस जेनकइ लहू पिलातुस ओनके बलिदान क संग मिलाइ दिहे रहा। ²तउ ईसू ओनसे कहेस, “तू का सोचत ह कि सबइ गलीलियन दूसर सबइ गलीलियन स जिआदा पापी रहेन काहेकि ओनका इ सबइ बातन भीजे पड़ी? ³नाहीं! मई तोहका बतावत हउँ, जदि तू भी मनफिरावा नाही करब्या तउ तू भी वइसी ही मउत स मरब्या जइसी उ सबइ मरे रहेन! ⁴या ओन अट्टारह मनइयन क बारे मँ तू का सोचत ह जेनके ऊपर सीलोह क बुर्ज गिरिके ओनका मारि डाएस। का सोचत ह, उ सबइ यरूसलेम मँ बसइया दूसर सबइ ही मनइयन स जिआदा अपराधी रहेन? ⁵नाहीं! मई तोहका बतावत हउँ कि जदि तू मनवा न फिरउब्या तउ तू भी वइसे ही मरब्या।”

बँझउ बृच्छ

⁶फिन उ इ दिस्तान्त कथा कहेस: “कउनो मनई आपन अँगरे क बारी मँ एक तु अंजीरे क बृच्छ रोपे रहा। तउ उ ओह पइ फल ढूँडइ आवा पर ओका कछू नाही मिल पावा। ⁷एँह पइ उ माली स कहेस, ‘अब लखा मई तीन बरिस स अँजीरे क बृच्छ प फल टटोरत आवत हउँ मुला मोका एक तु भी नाही मिलि पावा। अब बरे एँका काटि डावा। इ धरती क अइसी ही वृथा काहे करत रहइ?’ ⁸माली ओका जवाब दिहेस, ‘स्वामी एँका इ बरिस तब ताई तजि द्या, जब तलक मई एँकरे चारिहुँ कइँती खनिके एहमाँ पाँस नउबउँ। ⁹फिन जदि उ अगवा बरिस फल देइ तउ नीक बा अउर जदि नाही देत तउ तू एँका काटि डाइ सकत ह।”

सबित क दिन स्त्री क चंगा करब

¹⁰कउनो आराधनालय मँ सबित क दिन ईसू जब उपदेस देत रहा। ¹¹तउ हुवाँई एक अइसी स्त्री रही जेहेमा दुस्त आतिमा समाइ ग रही। जउन ओका अट्टारह बरिस स पंगु बनाइ दिहे रही। उ निहुरिके कुबड़ी होइ गइ अउर तनिकउ सोझ नाही होइ सकत रही। ¹²ईसू ओका जब निहारेस तउ आपन लगे बोलाएस अउर, ‘हे स्त्री, तोहका आपन बेरामी स छुटकारा मिलि गवा।’ इ कहत भवा ¹³ओह पइ आपन हाथ रखेस। अउर उ फउरन सीध होइ गइ। उ परमेस्सर क गुन गावइ लाग।

¹⁴ईसू काहेकि सबित क दिन ओका बेरामी स जरटुट किहेस, यह बरे आराधनालय क नेता किरोध मँ आइके मनइयन स कहेस, “काम करइ क बरे छ: दिन होत हीं तउ ओनही दिनम मँ आवा अउर आपन बेरामी क दूर करावा पर सबित क दिन नीरोग होइ बरे जिन आवा।”

¹⁵पभूँ जवाब देत भवा ओसे कहेस, “अरे कपटियो! का तोहमाँ स हर कउनो सबित क दिन आपन बर्धा

अउर गदहा क बारा स निकारिके कहूँ पानी पिआवइ नाहीं लइ जात ह? ¹⁶अब इ स्त्री जउन इब्राहीम क बिटिया अहइ अउर जेका सइतान अट्टारह बरिस स जकरिके राखे बा, का एँका सबित क दिन एँका बंधन स छुटकारा नाहीं देइ का चाही?” ¹⁷जब उ इ कहेस तउ ओकर खिलाफत करइवालन सबइ समाइ गएन। ओह कइँती समूची भीड़ ओकरे अचरजे स भरे कामन स जेनका उ किहे रहा, खुस होइ गा।”

सरग क राज्य कइसा अहइ

(मती 13:31-33, मरकुस 4:30-32)

¹⁸तउ ईसू कहेस, “परमेस्सर क राज्य का अहइ अउर मइँ ऐँकर तुलना कइसे करउँ?” ¹⁹उ सरसई क दाना क नाई अहइ, जेका कउनो लइके आपन बगिया मँ बोएस। उ बड़ा भवा अउर एक बूच्छ होइ गवा। फिन अकासे क चिरइयन ओकर डारी प घोंसला बनाइ लिहना।”

²⁰उ फिन ईसू कहेस, “परमेस्सर क राज्य क बरोबरी मइँ कइसे करउँ?” ²¹इ उ खमीरे क नाई अहइ जेका एक स्त्री तीन हींसा पिसान मँ सान दिहिस अउर उ समूचा पिसान खमीरे स भरि गवा।”

साँकर दुआर

(मती 7:13-14; 21:23)

²²ईसू जब सहरन अउर गाउँन स होत भवा उपदेस देत भवा यरूसलेम जात रहा। ²³तबहीं ओसे कउनो पूछेस, “पभू क केवल कछू मनइयन क ही उद्धार होइ?”

ईसू कहेस, ²⁴“साँकर दुआरे स घुसइ क होइ सकइवाला जतन करा, काहेकि मइँ तोहका बतावत हउँ कि भीतर जाइ क जतन बहोत स करिहीं प जाइ न पइहीं। ²⁵जब एक दाई घरे क स्वामी उठिके दुआर बंद कइ देत ह, तउ तू बाहरे ही खड़ा दुआर खटखटावत कहब्या, ‘महासय, हमरे बरे खोलि द्या।’ मुला उ तोहका जवाब देइ, ‘मइँ नाहीं जानत तू कहाँ ले आवा बाट्या?’ ²⁶तब तू कहइ लगब्या, ‘हम तोहर संग खावा ह, तोहर संग पिआ ह, तू हमरी गलियन मँ हमका सीख दिहा ह।’

²⁷पर उ तोसे कही, ‘मइँ नाहीं जानत तू कहाँ स आवा अहा? अरे कुकर्मो मनइयो! मोरे लगे स पराइ जा!’ ²⁸जब तू इब्राहीम, इसहाक, याकूब अउर दूसर सबहीं नबियन क परमेस्सरे क राज्य मँ निहरब्या मुला तोहका बाहरे ढकेल दीन्ह जाइ। तउ हुवाँ बस रोउब अउर दाँत पीसब होई। ²⁹फिन पूरब अउर पच्छँ उत्तर अउर दक्खिन स मनइयन परमेस्सर क राज्य मँ आइ आइके खइया क चउकी प आपन आसन ग्रहण करिहीं। ³⁰धियान रहइ कि हुवाँ जउन आखिरी अहइ पहिले होइ जइहीं अउर जउन पहिले अहइँ उ पचे आखिरी होइ जइहीं।”

ईसू क मउत यरूसलेम मँ

(मती 23:27-39)

³¹उहइ समइ ईसू क लगे कछू फरीसियन आपन अउर ओसे बोलेन, “हेरोदेस तोहका मारि डावइ चाहत ह, यह बरे हुवाँ स कहूँ अउर चला जा।”

³²तब उ ओनसे कहेस, “जा अउर उ लोखरी* स कहा, ‘मइँ मनइयन मँ स दुस्ट आतिमन क निकारब, मइँ आज ही चंगा करब अउर भियान भी। फिन तीसर दिन मइँ आपन काम पूरा करब।’ ³³फिन भी मोका आजु, भियान अउर परउँ चलत ही रहइ क अहइ। काहेकि कउनो नबियन बरे इ नीक नाहीं कि उ यरूसलेम स बाहरे प्रान तजि देइ।

³⁴“यरूसलेम अरे ओ यरूसलेम! तू नबियन क कतल करत ह अउर परमेस्सर जेका तोहरे लगे पठएस ह, ओन प पाथर बरिसावत ह। मइँ केतनी दाई तोहरे मनइयन क वइसे ही आपुस मँ बटोरइ चाहा ह जइसे एक तु मुर्गी आपन बचवन क आपन पखना तरे बटोरत ह। मुला तू नाहीं चाह्या। ³⁵लखा तोहरे बरे तोहार घर तोहरे लिये उजरा पड़ा अहइ। मइँ तोहका बतावत हउँ तू मोका उ समइया तलक फिन नाहीं देखब्या। जब ताई उ समइ न आइ जाइ जब तू कहब्या, ‘धन्य अहइ उ, पभू क नाउँ प जउन आवत बा।’*”

का सबित क दिन चंगा करब उचित बा?

14 एक दाई सबित क दिन मुख्य फरीसियन मँ स कउनो क घर ईसू खइया बरे गवा। ओहर उ पचे नगिचे स आँखि गड़ाइके लखत रहेन। ²हुवाँ ओकरे समन्वा जलंधर स दुखी एक तु मनई रहा। ³ईसू धरम सास्तिरियन अउर फरीसियन स पूछेस, “सबित क दिन कउनो क चंगा करब उचित अहइ या नाहीं?” ⁴मुला उ पचे खमोस रहेन। तउ ईसू उ मनई क लइके चंगा कइ दिहस अउर फिन ओका कहूँ पठइ दिहस। ⁵फिन उ ओनसे पूछेस, “जदि तोहमँ स कउनो क लगे आपन बेटवा अहइ या बर्धा अहइ, उ कुआँ मँ गिरि पड़त ह तउ सबित क दिन भी तू ओका फउरन नाहीं निकरिब्या?” ⁶उ पचे एँह पइ ओकर बात नाहीं काटि सकेन।

आपन क मान जिन द्या

⁷काहेकि ईसू इ लखेस कि मेहमान आपन बरे बइठइ क कउनो खास ठउर ढँढत रहेन, तउ उ ओनका एक दिस्टान्त कथा सुनाएस। उ बोला: ⁸“जब तोहका कउनो बियाहे क भोज प बोलावइ तउ हुवाँ कउनो

लोखरी लोखरी चलाक होत ह, यह बरे ईसू हेरोदेस क लोखरी क रूप मँ कहिके ओखा धूर्त कहइ चाहत रहा।

‘धन्य ... बा’ भजन 118:26

सम्मान क ठउर प जिन बइठा। काहेकि होइ सकत ह हुवाँ कउनो तोहसे जिआदा बड़कवा मनई क उ बोलाए होइ।⁹फिन तू दुइनउँ क बोलावइवाला तोहरे लगे आइके तोसे कही, 'आपन इ जगह इ मनई क दइ द्या।' अउर फिन लजाइके तोहका सबन क तले क ठउरे प बइठइ क होइ।¹⁰तउ जब तोहका बोलावा जात ह तउ जाइके सबन त तले क जगह ग्रहण कइ ल्या जइसे जब तोहका न्यौता देइवाला आवइ तउ तोहसे कही, 'मीत उठा, ऊपर बइठा।' फिन उ सबन क समन्वा, जउन तोहरे लगे हुवाँ मेहमान होइहीं, तोहार मान बाढ़ी।¹¹काहेकि हर कउनो जउन आपन क उठाई ओका निहुराई दीन्ह जाई अउर जउन आपन क निहुराई, ओका ऊँचा कीन्ह जाई।"

बदले कफल

¹²फिन जउन ओका बोलाए रहा, ओसे उ बोला, "जब कबहुँ तू कउनो दिन या राति क भोज द्या तउ आपन धनी पड़ोसियन क जिन बोलावा काहेकि ऐँकरे बदले मैं तोहका बोलइहीं अउर इ तरह तोहका ओकर फल मिलि जाई।¹³मुला जब तू कउनो भोज द्या तउ दीन दुखियन, अपाहिजन, लंगइन अउर अँधरन क बोलावा।¹⁴फिन काहेकि ओनके लगे वापस लउटावइ कछू नाहीं अहइ, तउ इ तोहरे बरे आसीबाद बनि जाई। ऐँकर बदले क फल तोहका धर्मी मनई क जी उठइ प दीन्ह जाई।"

बड़वार भोज क डिस्टान्त कथा

(मती 22:1-10)

¹⁵फिन ओकरे संग खइया क खात रहेन मनइयन मैं स एक इ सुनिके ईसू स कहेस, "हर उ मनई धन्य अहइ, जउन परमेस्सर क राज्य मैं जँवत ह!"

¹⁶तब ईसू ओसे कहेस, "एक मनई कउनो बड़के भोज क तइयारी करत रहा, उ बहोत स मनइयन क न्यौत दिहस।¹⁷फिन दावत क समइ जेनका न्यौता दिहस, नउकरे क पठइके इ कहवाएस 'आवा! काहेकि भोजन तइयार अहइ।'¹⁸उ सबइ एक तरह आनाकानी करइ लागेन। पहिला ओसे कहेस, 'मई एक खेत बेसहे अहउँ, मोका जाइके ओका देखब अहइ, कृपा कइके मोका छमा करइँ।'¹⁹फिन दूसर कहेस, 'मई पाँच जोड़ी बर्था मोल लिहे अहउँ, मई तउ सिरिफ ओनका परखइ जात हउँ, कृपा कइके मोका छमा करइँ।'²⁰एक अउर भी बोला, 'मई अबहीं बियाह किए हउँ। इ कारण स नाहीं आइ सकत हउँ।'²¹तउ जब उ नउकर लौटिके आवा तउ उ आपन स्वामी क इ बातन बताइ दिहस, 'एँह पइ उ घरे क स्वामी बहोत कोहाइ गवा अउर आपन नउकरे स कहेस, 'हाली ही! सहर क गली कूचा मैं जा अउर गरीब गुरबा, अपाहिज, अँधर अउर लँगइन क हिआँ लइ आवा।'²²उ नउकर स कहेस, 'स्वामी तोहार हुकुम

पूरी कइ दीन्ह गइ अहइ मुला अबहीं भी उठर बाकी अहइ।'²³फिन स्वामी नउकरे स कहेस, 'सड़कन प अउर खेतन क मेंडे ताई जा अउर हुवाँ स मनइयन स चिरौरी कइके हिआँ बुलाइ लिआवा जेसे मोर घर भरि जाइ।'²⁴अउर मई तोहसे कहत हउँ जउन पहिले बोलाइ गवा रहेन ओहमाँ स एक भी भोज न चिखइ!'"

चेला बनइ का कीमत

(मती 10:37-38)

²⁵ईसू क संग भारी भीड़ जात रही। उ ओनके कइँती मुड़ि गवा अउर बोला, ²⁶'जदि मोरे लगे कउनो आवत ह अउर आपन बाप महतारी, पत्नी अउर बचवा, आपन भाइयन अउर बहिनियन अउर हिआँ ताई कि आपन जिन्गी तलक स मोसे जिआदा पिरेम राखत ह, उ मोर चेला नाहीं होइ सकत।'²⁷जउन आपन क्रूस (यातना) उठाइके मोरे पाछे नाहीं चलत ह, उ मोर चेला नाहीं होइ सकत।²⁸जदि तोहमाँ स कउनो बुर्ज बनावइ चाहइ तउ का उ पहिले स बइठिके ओकरे दामे क, इ लखइ बरे कि ओका पूरा करइके ओकरे लगे काफी कछू बा कि नाहीं, हिसाब उसाब न लगाई?'²⁹नाहीं तउ उ नँव तउ खनि देइ अउर ओका पूरा न कइ पावइ स, जउन ओका सुरु होत लखेन ह, सबहिँ ओकर मसखरी उड़इहीं अउर कइहीं,³⁰अरे लखा इ मनई बनाउब तउ सुरु किहेस ह मुला इ ओका पूरा नाहीं कइ सका!'

³¹"या कउनो राजा अइसा होइ जउन कउनो दूसर राजा क खिलाफ जुद्ध छेड़इ जाइ अउर पहिले बैठिके इ न बिचारइ कि आपन दस हजार सैनिकन क संग का उ बीस हजार सैनिकन आपन बैरी क मुकाबला कइ भी सकी कि नाहीं?'³²अउर जदि उ समर्थ नाहीं होत तउ ओकर बैरी अबहीं राहे मैं होइहीं तबहीं उ आपन प्रतिनिधि मडल क पठइके सांति मिलाप क सुझाई।'³³तउ फिन इहइ तरह तोहमाँ स कउनो भी जउन आपन सबहिँ धन दौलत क तजि नाहीं देत, मोर चेला नाहीं होइ सकत।

आपन सुभाव जिन तजा

(मती 5:13; मरकुस 9:50)

³⁴"नोन उत्तिम अहइ मुला जदि ओकर स्वाद बिगर जाइ तउ ओका फिन स नमकीन नाहीं बनावा जाइ सकत।³⁵न तउ माटी क लायक रही अउर न पाँस क कूड़ा क। मनई सिरिफ ओका यूँ ही बहाइ देइहीं। जेकरे लगे सुनइ क कान अहइँ, ओका सुनइ द्या।"

सरगे मैं खुसी

(मती 18:12-14)

15 अब चुंगी (टिक्स) क उगहिया अउर पापी सबहिँ ओका सुनइ बरे ओकरे लगे आवइ लाग रहेन।²तउ फरिसियन अउर धरम सास्तिरियन बड़बड़ करत

भए कहइ लागेन, “इ मनई तउ पापी मनइयन क अगवानी करत ह अउर ओनके संग जेवंत ह।”³ एहे पइ ईसू ओनका इ डिस्टान्त कथा सुनाएस: ⁴“मान ल्या तोहमाँ स कउनो क लगे 100 भेइ अहई अउर ओहमाँ स कउनो एक हेराइ जाइ तउ उ का 99 क खुली जगह मँ तजिके हेरान भेइ क पाछे न धाई जब ताई उ ओका पाइ न जाइ।⁵ फिन जब ओका भेइ मिलि जात ह तउ उ ओका खुसी क साथ आपन काँधे प उठावत ह।⁶ अउर जब घर लौटत ह तउ आपन मीतन अउर पड़ोसियन क नगिचे बोलाँइके कहत ह, ‘मोर संग खुसी मनाव काहेकि मोका हेरान भेइ मिलि गइ अहइ।’⁷ मई तोहसे कहत हउँ, इहइ तरह कउनो एक क मनफिरावइवाला पापी बरे, ओन 99 धर्मी मनइयन स, जेनका मनफिराव करइ क जरूरत नाहीं, सरगे मँ कहुँ जिआदा खुसी मनाइ जाइ।

⁸“या सोचि ल्या कउनो स्त्री अहइ जेकरे लगे दस चाँदी क सिक्का बाटेन अउर ओकर एक तु सिक्का हेराइ जात ह तउ का उ दिया बारिके घरे क तब ताई न बहारी अउर होसियारी स नाहीं ढँढत रही जब तलक उ ओका न मिलि जाइ?”⁹ अउर जब उ जब ओका पाइ जात ह तउ आपन मीतन अउर पड़ोसियन क लगे बोलाँइके कहत ह, ‘मोरे संग खुसी मनाव काहेकि मोर सिक्का जउन हेराइ ग रहा, मिलि गवा।’¹⁰ मई तोहसे कहत हउँ इ तरह एक पापी बरे जउन मनफिराव ह, परमेस्सर क दूतन क हाजरी मँ हुआँ खुसी मनाइ जाइ।”

भटक गवा बेटवा क पावइ क डिस्टान्त कथा

¹¹फिन ईसू कहेस, “एक मनई क दुइ बेटवा रहेन।¹² तउ छोटका बेटवा आपन बाप स कहेस, ‘पिताजी, जउन धन दौलत मोरे हींसा मँ आवइ, ओका मोका दइ द्या!’ तउ बाप उन दुइनउँ क आपन धन बाँट दिहिस।¹³ अबहीं कउनो जिआदा समइ नाहीं बीता रहा, कि छोटका बेटवा आपन समूचा धन दौलत बटोरेस अउर कउनो दूर देस क चला गवा। अउर हुवाँ जंगली क तरह रहत भवा आपन सारा धन बबांद कइ डाएस।¹⁴ जबहिँ ओकर समूचा धन खतम होइ गवा तबहीं उ देस मँ सबहिँ कइँती एक तु भयानक अकाल पड़ि गवा अउर ओका जरूरत क चीजन क कमती पड़इ लाग।¹⁵ यह बरे उ देस क कउनो मनई क हिआँ जाइके उ मजूरी करइ लाग। उ ओका आपन खेते मँ सुअर चरावइ पठइ दिहिस।¹⁶ हुवाँ उ सोचत साइद कैरब क फरी पेट भरइ बरे मिलि जाई जेका सुअरन खात रहन मुला कउनो ओका एक फरी नाहीं दिहिस।¹⁷ फिन जब ओकर होस ठिकाना मँ आइ गवा तउ उ बोला, ‘मोरे बाप क लगे केर्तना ही अइसे मजूर अहई जेनके लगे खाइ क पाछे भी भोजन बचा रहत ह। अउर मई हियाँ भूख स मरत हउँ।¹⁸ तउ मई हियाँ स उठिके आपन बाप क लगे

जाब अउर ओनसे कहब: पिताजी, मई परमेस्सर अउर तोहरे खिलाफ पाप किहे हउँ।¹⁹ अब अगवा स तोहार बेटवा कहवावइ क जोगग नाहीं अहउँ। मोका आपन रोजिन्दा क मजूर क नाई बनइ ल्या।²⁰ तउ उ उठिके आपन बाप क लगे चला गवा।

“अबहीं उ जिआदा दूरी प ही रहा कि ओकर बाप ओका निहारेस अउर ओकरे बाप क दाया आइ। तउ दौड़िके उ ओका आपन बाँहे मँ गहियाइ लिहस अउर चूमेस।²¹ बेटवा बाप स कहेस, ‘पिताजी, मई तोहरी निगाहे मँ अउर परमेस्सर क खिलाफ पाप किहे हउँ, मई अब अउर जिआदा तोहार बेटवा कहवावइ क जोगग नाहीं हउँ।’²² मुला बाप आपन नउकरन स कहेस, ‘हाली! उत्तम ओढुना निकारि लइ आवा अउर ओनका एँका पहिरावा। एँकरे हाथे मँ अँगूठी अउर गोड़वा मँ जूतियाँ पहिरावा।²³ कउनो मोट बछवा लइ आइके मारि डावा अउर आवा ओका हम पचे खाइके खुसी मनाई।²⁴ काहेकि मोर इ बेटवा जउन मरि गवा रहा अब जइसे फिन स जिउ उठा बा। इ हेराइ गवा रहा, मुला अब इ मिलि गवा अहइ।’ तउ उ पचे खुसी मनावइ लागेन।

²⁵“अब ओकर बड़का बेटवा जउन खेते मँ रहा, जब आवा अउर घरे क लगे पहुँच गवा तउ उ गावइ नाचइ क सुर सुनेस।²⁶ उ आपन एक इ नउकर क बोलाँइके पूछेस, ‘इ सब का होत अहइ?’²⁷ नउकर ओसे कहेस, ‘तोर भाई आइ गवा अहइ अउर तोर बाप ओका हिफाजत मँ अउर मोटमर्दा पाइके एक तु मोट बछवा कटवाएस ह!’²⁸ बड़का भाई कोहाइ गवा, उ भितरे जाइ तलक नाहीं चाहत रहा। तउ ओकर बाप बाहेर आइके ओका समझाएस बुझाएस।²⁹ मुला उ बाप क जवाब दिहिस, ‘देखा बरिसन स तोहार सेवा मई करत रहेउँ। मई तोहरे कउनो हुकुम क खिलाफत नाहीं किहेउँ, मुला तू मोका तउ कबहुँ एक बकरी तलक नाहीं दिहा कि मई आपन मीतन क संग कउनो खुसी मनाइ सकित।³⁰ मुला जब तोहार इ बेटवा आवा जउन वेस्यन मँ तोहार धन फूँकेस, ओकरे बरे तू मोट बछवा कटवाया।’³¹ बाप ओसे कहेस, ‘मोर बेटवा, तू हमेसा ही मोरे लगे अहा अउर जउन कछू मोरे लगे बा, सब तोहार अहइ।³² मुला हमका खुस होइ चाही अउर जलसा मनावइ चाही काहेकि इ भाई, जउन मरि ग रहा, अब फिन जिन्ना होइ ग अहइ। इ हेराइ ग रहा, अब मिलि गवा बा।”

साँच धन

16 फिन ईसू आपन चेलन स कहेस, “एक धनी मनई रहा। ओकर एक प्रबन्धक रहा। उ प्रबन्धक प लाँछन लगाइ गवा कि उ ओकर धन दौलत क नासत रहा।¹ तउ उ ओका बोलाएस अउर कहेस, ‘तोहरे बारे मँ इ मई का सुनत रहत हउँ? आपन संरजाम क हिसाब किताब द्या काहेकि अब अगवा तू प्रबन्धक नाहीं रहि

सकत्या।' ३^एह पड़ प्रबन्धक मन ही मन में कहेस, 'मोर स्वामी मोसे मोर प्रबन्धक क नउकरी छीनत अहा, तउ अब मई का करउँ? मोहमँ अब एतनी ताकत भी नाहीं बा कि मई खेते खोदाई अउर गोंडाई क काम तलक कइ सकउँ। अउर मॉंगइ मँ तउ मोका लाज आवति बाटइ। ४^{ठीक}, मोरी समझ मँ आइ गवा कि मोका का करइ चाही जेहसे जब मई प्रबन्धक क ओहदा स हटाइ दीन्ह जाउँ तउ मनई आपन घरे मँ मोर सुआगत करइ।' ५^{तउ उ स्वामी क हर देनदार क बोलाएस। पहिले मनई स उ पूछेस, 'तोहका मोरे स्वामी क केतना देब अहइ?' ६^{उ कहेस, '3,000 लीटर जैतून क तेल।' एह पड़ उ ओसे बोला, 'इ ल्या आपन बही खाता अउर बैठिके हाली 1,500 लीटर कइ द्या।' ७^{फिन उ दूसर स कहेस, 'अउर तोह प केतनी देनदारी अहइ?' उ बताएस, 270 क्विंटल गोहूँ।' उ ओसे बोला, 'इ ल्या आपन बही अउर 225 क्विंटल कइ द्या।'}}}

८^{एह प ओकर स्वामी उ बेइमान प्रबन्धक क सरहेस काहेकि उ होसियारी स काम लिहे रहा। संसारे मँ रहइवाला मनई आपन जइसे मनइयन स ब्यौहार करइ मँ परमेस्सर क जोति वाला स जिआदा चालाक अहइ।}

९^{मई तोहसे कहत हउँ संसारे क धन दौलत स आपन बरे मीत बनावा। काहेकि जब उ धन दौलत खतम होइ जाइ, उ पचे अनंत निवासे मँ तोहार सुआगत करिहीं। १०^{उ सबइ जेनँ पड़ तनिक बरे बिसवास कीन्ह जाइ सकत ह, ओन पड़ जिआदा बरे भी बिसवास कीन्ह जाइ अउर इहइ तरह जउन तनिक बरे बेइमान होइ सकत हीं उ जिआदा बरे बेइमान होइहीं। ११^{इ तरह जदि तू संसारे क धन दौलत बरे तू बिसवासनीय नाहीं रहया तउ साँच धने क बारे मँ तोह पड़ कउन भरोसा करी? १२^{जदि जउन कउनो दूसर क अहइ, तू ओकरे बरे बिसवास क जोग नाहीं, बाटया, तउ जउन तोहार अहइ, ओका तोहरा कउन देइ? १३^{कउनो भी नउकर दुइ मालिक क सेवा नाहीं कइ सकत। उ या तो एक स घिना करी अउर दूसर स पिरेम या उ एक क बरे न्यौछावर करी अउर दूसर क दुरियाई। तू धने अउर परमेस्सर दुइनउँ क सेवा एक संग नाहीं कइ सकत्या।"}}}}}

परमेस्सर क व्यवस्था अटल बा

(मती 11:12-13)

१४^{अब फरीसियन जउन धन क लोभी रहेन, जब इ सब सुनेन तउ उ पचे ईसू क बहोत बुराई कियेन। १५^{एह पड़ उ ओनसे कहेस, 'तू पचे उ सबइ अहा जउन मनइयन क इ जताइ देइ चाहत ह कि तू बहोत नीक अहा मुला परमेस्सर तोहरे मन क जानत ह। मनई जेका बहोत कीमती समझत हीं, परमेस्सर बरे उ चुच्छ अहइ।}}

१६^{यूहन्ना तलक व्यवस्था अउर नबियन क समइ रहा। ओकरे पाछे परमेस्सर क राज्य क सुसमाचार क}

प्रचार होत रहा अउर हर कउनो बड़ी तेजी स एकर कइती हईचा आवत रहा। १७^{फिन सरग अउर धरती क डुग जाब तउ सहल बा मुला व्यवस्था क एक एक बिन्दु का अमान्य होब नाहीं।}

तलाक अउर दुहेजा बियाह

१८^{उ हर कउनो जउन आपन पत्नी क तजत ह अउर दूसर स्त्री क बियाहत ह, व्यभिचार करत ह। अइसे ही आपन पति स तलाकी गइ, कउनो मनई स बियाहत ह, उ भी व्यभिचार करत ह।"}

धनी मनई अउर लाजर

१९^{अब देखा एक मनई रहा जउन बहोत धनी रहा। उ बैजनी रंग क ओढ़ना पहिरत रहा अउर हर रोज अमीरी ठाट बाट स रहत आनन्द लेत रहा। २०^{हुँवई लाजर नाउँ क दीन दुखिया ओकरे दुआरे ओलरा रहत रहा। ओकर देह घाउन स भरि गइ रही। २१^{उ धनी मनई क जुटे स ही उ आपन पेटवा भरइ क तरसत रहा। हिआँ तलक कि कूकुर भी अउतेन अउर ओकरे घाउ क चाट जातेन। २२^{अउर फिन अइसा भवा कि उ दीन हीन मनई मरि गवा। तउ सरगदूतन लइ जाइके ओका इब्राहीम क गोदी मँ बइठाइ दिहिन। फिन उ धनी मनई भी मरि गवा अउर ओका दफनियावा गवा। २३^{नरके मँ तड़पत भवा उ जब आँखी खोलिके लखेस तउ इब्राहीम ओका बहोत दूर देखाइ गवा मुला लाजर उ ओकरी गोदी मँ लखेस। २४^{उ तब्बइ पुकारके कहेस, 'बाप इब्राहीम, मोहे प दया करा अउर लाजर क पठवा कि उ पानी मँ अगुरि क नोक बोरिके मोर जीभ ठंडी कइ देइ, काहेकि मई इ आगी मँ तड़पत हउँ! २५^{मुला इब्राहीम बोला, 'मोर बेटहना, याद राखा, तू आपन जिन्नगी मँ आपन नीक चीजन्क पाइ गया मुला लाजर क बुरी चीज मिलि पाई। तउ अब हिआँ उ आनन्द भोगत बा अउर तू दारुण दुःख। २६^{अउर इ सब क अलावा हमरे अउर तोहरे बीच एक बड़की खाई डाइ दीन्ह ग अहइ काहेकि हिआँ स जदि कउनो तोहरे लगे जाइ चाहइ, उ जाइ नाहीं सकत अउर हुवाँ स कउनो हिआँ आइ न सकइँ। २७^{उ धनी मनई कहेस, 'अइ बाप! मई तोहसे पराथना करत हउँ कि तू लाजर क मोरे बाप क घर पठइ द्या २८^{काहेकि मोरे पाँच भाइयन अहइँ। उ ओनका चिताउनी देइ ताकि ओनका इ दारुण दुःख क ठउर मँ न आवइ क होइ।' २९^{मुला इब्राहीम कहेस, 'ओनके लगे मूसा क व्यवस्था अहइ अउर नबियन क लिखा अहइँ। ओ पचेन क ओनका सुनइ द्या।' ३०^{धनी मनई कहेस, 'नाहीं बाप इब्राहीम, जदि कउनो मरे हुअन मँ स ओनके लगे जाइ तउ उ पचे मनफिराव करिहीं।' ३१^{इब्राहीम ओसे कहेस, 'जदि उ सबइ मूसा अउर नबियन क नाहीं अनकतेन तउ, जदि कउनो मरे हुअन मँ स उठिके ओनके लगे}}}}}}}}}}}}}

आवइ तउ भी कोउ काम क ना होई, काहेकि उ ओनका भी न सुनिहीं।”

17 ईसू आपन चेलन स कहेस, “जेनेसे मनइयन भटकत हीं, अइसी बातन तउ होइहीं ही मुला धिक्कार उ मनई क अहइ जेकरे जरिये उ सबइ होई।² ओकरे बरे जिआदा नीक इ होत कि बजाय एँकरे कि उ इन छोटकन मँ स कउनो क पाप करइ क हुस्कारि देइ, ओकरे गटइया मँ चकरी क पाट टाँगिके ओका समुद्दर मँ ढकेल दीन्ह जात।³ होसियार रहा!

“जदि तोहार भाई पाप करइ तउ ओका डाटा अउर जदि उ आपन किहे प पछताइ तउ ओका छमा कइ द्या।⁴ अगर हर दिना उ सात दाई पाप करइ अउर सातहु दाई लौटिके तोहसे कहइ कि मोका पछतावा अहइ तो तू ओका छमा कइ द्या।”

तोहार बिसवास केरौना बड़वार अहइ

⁵ एँह पइ प्रेरितन पभू स कहेन, “हमरे बिसवास क बढ़ोतरी करा!”⁶ पभू कहेस, “जदि तोहमाँ सरसों क दाना क तरह बिसवास होत तो तू इ सहतूत क वृच्छ स कहि सकत ह ‘उखड़ि जा अउर उ समुद्दर मँ जाइके लगा।’ अउर उ तोहार बात मान लेत।

उत्तिम सेवकन बनि जा

⁷ “मान ल्या तोहमाँ स कउनो क लगे एक दास अहइ जउन हर जोतत या भेड़न क चरावत ह। उ जब खेते स लौटिके आवइ तउ का ओकर स्वामी ओसे कही, ‘तुरन्त आवा अउर खइया क खाइ बैठि जा?’⁸ मुला बजाय एँकरे का उ ओसे न कही, ‘मोर भोजन तइयार करा, आपन ओढना पहिरा अउर मोर खात पिअत क खइया परसा, तबहि एँकरे पाछे तू भी खाइ पी सकत ह।’⁹ का उ आपन हुकुम पूरा करइ प का उ सेवक क बिसेस धन्यवाद देत ह? नाहीं।¹⁰ तोहरे संग भी अइसा ही अहइ। जउन कछू करइ क तोहसे कहा ग अहइ, ओका कइ डाए क पाछे तोहका कहइ चाही, ‘हम नालायक दास अही हमका कउन बड़कई न चाही। हम तउ आपन कर्तब कीन्ह ह।”

आभारी रहा

¹¹ फिन जब ईसू यरूसलेम जात रहा तउ उ सामरिया अउर गलील क बीच क चउहददी क लगे स निकरा।¹² उ जब एक गाउँ मँ जात रहा तबहीं दस कोढ़ी ओका मिलने। उ सबइ कछू दूरी प खड़ा रहेन।¹³ उ पचे ऊँच आवाज मँ बोलेन, “हे ईसू! हे स्वामी! हम प दाया करा!”¹⁴ फिन जब उ ओनका लखेस तउ उ बोला, “जा अउर आपन खुद क याजकन क देखावा।”

उ सबइ जात ही रहेन कि कोढ़ स छुटकारा पाएन।¹⁵ मुला ओहमाँ स एक जब इ देखेस कि उ चंगा होइ ग

अहइ, तउ उ वापस लौटा अउर ऊँच आवाज मँ परमेस्सर क गुन गावइ लाग।¹⁶ उ मुँहना धकेके ईसू क गोड़वा पर गिरि गवा अउर ओकर एँहसान मानेस। (उ एक सामरी रहा।)¹⁷ ईसू ओसे पूछेस, “का सबहिँ दस क दसउ कोढ़ स छुटकारा नाहीं पाएन? फिन उ सबइ नौ कहाँ बाटेन?¹⁸ का केवल सामरी क तजिके ओहमाँ स कउनो भी परमेस्सर क स्तुति करइ वापस नाहीं लौटा?”¹⁹ फिन ईसू ओसे कहेस, “खड़ा हवा अउर चला जा, तोहार बिसवास तोहका चंगा किहेस ह।”

परमेस्सर क राज्य तोहरे भीतर बा

(मती 24:23-28, 37:41)

²⁰ एक दाई जब फरीसियन ईसू स पूछेन, “परमेस्सर क राज्य कब आई?” तउ उ ओनका जवाब दिहस, “परमेस्सर क राज्य अइसे परगट होइके नाहीं आवत।²¹ मनइयन इ न कइहीं, ‘उ हिआँ अहइ!’ या ‘उ हुवाँ अहइ!’ काहेकि परमेस्सर क राज्य तउ तोहरे भीतर ही अहइ।”

²² मुला चेलन उ बोलाएस, “अइसा समइ आइ जब तू मनई क पूत क दिनन मँ स एक दिन क भी तरसब्या मुला, ओका नलख पउब्या।²³ अउर मनइयन तोहसे कइहीं, ‘देखा, हिआँ!’ या ‘देखा, हुवाँ!’ तू हुवाँ जिन जा या ओकर पाछे जिन जा।

जब ईसू लौटी

²⁴ वइसे ही जइसे बिजुरी चमकिके एक छोर स दूसर छोर मँ चमकत ह, वइसे ही मनई क पूत भी आपन दिन मँ परगट होइ।²⁵ मुला ओका पहिले बहोत स दारुण दुःख झेलइ क होइ अउर इ पीढी क जरिए उ जरूर ही न मान्न होइ।²⁶ वइसे ही जइसे नूह क दिनन मँ भवा रहा, मनई क पूत क दिनन मँ भी होइ।²⁷ उ दिना तलक जब नूह नाउ मँ बइठा, मनई खात पिअत रहेन, बियाह करत रहेन, अउर बियाह मँ दीन्ह जात रहेन। फिन जल परलइ आइ अउर उ सबन क नास कइ दिहस।²⁸ इइ तरह होइ जइसे लूत क दिना मँ भी भवा रहा। मनइयन खात पिअत रहेन, बेसहत रहेन, बेचत रहेन अउर खेती अउर घर बनवत रहेन।²⁹ मुला उ दिन जब लूत सदोम स बाहरे निकरा तउ अकास स आगी अउर गंधक बरसइ लाग अउर उ सबइ बर्बाद होइ गएन।³⁰ उ दिना भी जब मनई क पूत परगट होइ, ठीक अइसे ही होइ।

³¹ उ दिन जदि कउनो मनई छते प होइ अउर ओकर सामान घरे क भीतर होइ तउ ओका उठावइ बरे तरखाले न उतरइ। इइइ तरह जदि कउनो मनई खेते मँ होइ तउ उ पाछे न लौटइ।³² लूत क पत्नी क याद करा,³³ जउन कउनो आपन जिन्गी बचावइ क जतन करी, उ ओका खोइ देइ अउर जउन आपन

जिनगी खोड़, उ ओका बचाइ लेइ।³⁴मई तोहका बतावत हउँ, उ राति एक खटिया प जउन दुइ मनई होइहीं, ओहमाँ स एक उठाइ लीन्ह जाइ अउर दूसर छोर दीन्ह जाइ।³⁵दुइ स्त्रियन एक संग चकरी चलावत होइहीं, ओहमाँ स एक उठाइ लीन्ह जाइ अउर दूसर स्त्री छोर दीन्ह आइ।”³⁶*

³⁷फिन ईसू क चेलन ओसे पूछेन, “हे परभू, अइसा कहाँ होइ?”

उ ओनसे कहेस, “जहाँ ल्हास पड़ी होइ, गिद्ध भी हुवई एकट्ठा होइहीं।”

परमेस्सर आपन मनइयन क जरूर सुनी

18 फिन ईसू चेलन क इ बतावइ बरे एक दिस्टान्त कथा सुनाएस कि उ पचे लगातर पराथना करत रहई अउर निरास न होई। उ इ दिस्टान्त कथा कहेस: ²“कउनो सहर मैं एक न्यायाधीस होत रहा। उ न तो परमेस्सर स डेरात रहा अउर न ही मनइयन क परवाह करत रहा।³उहइ सहर मैं, अब लखा एक तु विधवा भी रहत रही। अउर उ ओनके लगे बार बार आवत अउर कहत, ‘देखा, मोरे बरे कीन्ह गवा अनिआउ क खिलाफ निआउ मिलइ चाही।’⁴तउ एक लम्बा समइ तलक तउ उ न्यायाधीस नाहीं चाहत रहा मुल आखिर मैं उ आपन मने मैं सोचेस, ‘चाहे मई परमेस्सर स न डेरात हउँ अउर न मनइयन क परवाह करत हउँ।’⁵तउ भी काहेकि इ विधवा स मोर कान पक ग अहई तउ मई देखिहउँ कि ओका निआउ मिलि जाइ जेहसे इ मोरे लगे कइउ दाई आइके कहुँ मोरे नाक मैं दम करि देइ।”

⁶फिन परभू कहेस, “देखा! उ दुस्ट न्यायाधीस का कहे रहा।⁷तउ का परमेस्सर आपन चुना भए मनइयन प धियान न देइ कि ओनका, जउन ओका राति दिन टेरत हीं, निआव मिलइ? का उ ओनकइ मदद करइ मैं देर लगाई? ⁸मई तोहसे कहत हउँ कि उ ओनका जल्दी निआव देई। फिन भी जब मनई क पूत आइ तउ का उ धरती प बिसवास पाई?”

दीन होइके परमेस्सर क आराधना

⁹फिन ईसू ओन मनइयन बरे जउन आपन क नेक तउ मानत रहेन, अउर कउनो क कछू नाहीं समझतेन, इ दिस्टान्त कथा सुनाएस।¹⁰मंदिर मैं दुइ मनई पराथना करत रहेन, एक फरीसी रहा अउर दूसर चुंगी (टिक्स) क उगहिया।¹¹उ फरीसी अलग खड़ा होइके इ पराथना करइ लाग, ‘हे परमेस्सर मई तोहार धन्यवाद करत हउँ कि मई दूसर मनइयन जउन डाकू, ठग अउर व्यभिचार

नाहीं हउँ अउर न ही इ चुंगी उगहिया जइसा हउँ।¹²मई हफता मैं दुइ दाई उपास राखत हउँ अउर आपन समूची आमदनी क दसवाँ हिंसा दान मैं दद देत हउँ।’

¹³मुला उ चुंगी उगहिया जउन दूर खड़ा रहा अउर हिंसा तलक कि सरगे कइती आपन आँखिन उठाइके नाहीं लखत रहा, आपन छतिया पीटत भवा बोला, ‘हे परमेस्सर, मोहे पापी प द्या कर!’¹⁴मई तोहका बतावत हउँ, इहइ मनई धर्मी कहवाइके आपन घरे लौट गवा, न कि उ दूसर। काहेकि हर उ मनई जउन आपन खुद क बड़का समझी, ओका छोटका बनइ दीन्ह जाइ अउर जउन दीन मानी, ओका बड़का बनइ दीन्ह जाइ।”

गदेलन परमेस्सर क सच्चा हकदार अहई

(मती 19:13-15 मरकुस 10:13-16)

¹⁵मनई आपन गदेलन तलक ईसू क लगे लइ आवत रहेन कि उ ओनका छू भरि देइ। मुला जब ओकर चेलन इ लखेन तउ ओनका झड़पेन।¹⁶मुला ईसू गदेलन क लगे बोलाएस अउर चेलन स कहेस, “इ नान्ह गदेलन क मोरे लगे आवइ द्या, एँनका जिन रोका, काहेकि परमेस्सर क राज्य अइसन क अहइ।¹⁷मई सच कहत हउँ कि जउन परमेस्सर क राज्य इ गदेलन क नाई ग्रहण नाहीं करत ह, ओहमाँ कबहुँ घुसि न पाई।”

एक धनी मनई क ईसू स सवाल

(मती 19:16-30 मरकुस 10:17-31)

¹⁸फिन कउनो यहूदी नेता ईसू स पूछेस, “उत्तिम गुरु, अनन्त जीवन क हक पावइ बरे मोका का करइ चाही?”¹⁹ईसू ओसे कहेस, “तू मोका उत्तिम काहे कहत अहा? सिरिफ परमेस्सर क तजिके अउर कउनो भी उत्तिम नाहीं अहइ।²⁰तू परमेस्सर क हुकुम क तो जानत अहा: ‘व्यभिचार जिन करा, कतल जिन करा, चोरी जिन करा, झूठी साच्छी जिन द्या, आपन बाप अउर महतारी क आदर करा।’*”

²¹उ यहूदी नेता बोला, “मई इन बातन क आपन लरिकाई स मानत आवा हउँ।”

²²ईसू जब इ सुनेस तउ उ ओसे बोला, “अबहीं एक बात अहइ जेकर तोहमाँ कमी अहइ। तोहरे लगे जउन कछू अहइ, सब कछू क बेचि डावा अउर फिन जउन मिलइ, ओका गरीबन मैं बाँटा। एहसे तोहका सरगे मैं भण्डारा मिली। फिन आवा अउर मोरे पाछे होइ जा।”²³तउ जब यहूदी नेता सुनेस तउ उ बहोत दुःखी भवा, काहेकि उ बहुत अमीर रहा।

²⁴ईसू जब ई देखेस कि उ बहोत दुःखी अहइ तउ उ कहेस, “ओन मनइयन बरे जेनके लगे धन वा, परमेस्सर क राज्य मैं घुसि पाउब केतना मुस्किल अहइ!²⁵हाँ,

पद 36 कछू यूनानी प्रतियन मैं पद 36 जोड़ा गया अहइ: “दुइ तु पुरुसन जउन खेतवा मैं होइहीं, ओहमाँ स एक उठाइ लीन्ह जाइ अउ दूसर छोड़ दीन्ह जाइ।”

कउनो ऊँट बरे सुई क नोक स निकरि जाब तउ सहज बा मुला कउनो धनी मनई क परमेस्सर क राज्य में घुस पाउब सहल नार्ही अहइ!"

केकर उद्धार होइ?

²⁶उ मनइयन जउन इ सुनेन, बोलेन, "फिन भला उद्धार केकर होइ?"

²⁷ईसू कहेस, "उ बातन जउन मनइयन बरे नार्ही होइ सकती, परमेस्सर बरे होइ सकत ही!"

²⁸फिन पतरस कहेस, "देखा, तोहरे पाछे चलइ बरे हम उ सब कछू तजि दीन्ह ह जउन हमरे पास रहा!"

²⁹तब ईसू ओनसे बोला, "मई तोहसे सच कहत हउँ, अइसा कउनो नार्ही जउन परमेस्सर क राज्य बरे घर-बार, पत्नी या भाइयन या महतारी बाप या संतान क तजि दिहे होइ, ³⁰अउर ओका इहइ जुग मैं कइउ कइउ गुना जिआदा न मिलइ अउर आवइवाला समइ मैं उ अनन्त जीवन क न पाइ जाइ।"

ईसू मरि के जी उठी

(मती 20:17-19; मरकुस 10:32-34)

³¹फिन ईसू ओन बारहु क एक कईती लइ जाइके ओनसे बोला, "सुना, हम यरूसलेम जात अही। मनई क पूत क बारे मैं नबियन क जरिये जउन कछू लिखा गवा अहइ, उ पूर होइ। ³²हैं, उ गैर यहूदियन क सौप दीन्ह जाइ, ओकर मसखरी उड़ाइ जाइ, उ कोसा जाइ अउर ओह पइ थूक दीन्ह जाइ। ³³फिन उ सबइ ओका पिटिहीं अउर मारि डइहीं अउर तीसर दिन फिन जी जाई।" ³⁴एहमाँ स कउनो भी बात उ सबइ नार्ही समुझ सकेन। इ कहब ओनसे छुपा ही रहि गवा कि उ कउनो बारे मैं बतावत रहा।

आँधर क आँखिन

(मती 20:29-34; मरकुस 10:46-52)

³⁵ईसू जब यरीहो क लगे पहुँचा रहा तउ भीख माँगत भवा एक आँधर, हुवई राह किनारे बइठा रहा। ³⁶आँधर जब मनइयन क जाइ क आवाज सुनेस तउ उ पूछेस, "का होत अहइ?"

³⁷तउ मनइयन ओसे कहेन, "नासरत क ईसू हिआँ स जात अहइ।"

³⁸तउ आँधर इ कहत भवा पुकार उठा, "दाऊद क पूत, ईसू! मोहे प दया करा!"

³⁹उ जउन अगवा चलत रहेन उ पचे ओसे खमोस रहइ क कहेन, मुला उ अउर जिआदा पुकारइ लाग, "दाऊद क पूत मोहे प दया करा!"

⁴⁰ईसू थम गवा अउर उ हुकुम दिहेस कि आँधर क ओकरे लगे लइ आवा जाइ! तउ जब उ नगिचे आवा तउ ईसू ओसे पूछेस, ⁴¹"तू का चाहत ह? मई तोहरे बरे का

करउँ?" उ कहेस, "परभू, मई फिन स देखइ चाहत हउँ।" ⁴²एह पइ ईसू कहेस, "तोहका जोति मिलइ, तोहार बिसवास स तोहार उद्धार भवा ह।"

⁴³अउर फउरन ही ओका आँखिन मिल गइन। उ परमेस्सर क महिमा क बखान करत भवा ईसू क पाछे होइ गवा। जब सब मनइयन इ देखेन तउ उ पचे परमेस्सर क स्तुति करइ लागेन।

जकई

19 फिन ईसू यरीहो में घुसिके जब हुवाँ स जात रहा। ²तो हुवाँ जकई नाउँ क एक मनई भी हाजिर रहा। उ चुंगी (टिक्स) उगहियन मुखिया रहा। तउ उ बहोत धनी रहा। ³उ इ देखइ क जतन करत रहा कि ईसू कउन अहइ, मुला भिडिया क कारण उ देख नार्ही पावत रहा काहेकि ओकर कद छोटवार रहा। ⁴तउ उ सबन क अगवा धावत भवा एक ठु गुलरी क बूच्छ प जाइ चढ़ा जेहसे, उ ओका निहारि सकइ काहेकि ईसू क उहइ रास्ता स होइके निकरइ क रहा। ⁵फिन जब ईसू उ ठउरे प आवा तउ उ ऊपर लखत भवा जकई स कहेस, "जकई, हाली स नीचे उतरी आवा काहेकि मोका आजु तोहरे ही घरे प रुकइ चाही।"

⁶तउ तइफइ नीचे उतरिके खुसी क संग ओकर अगवानी किहेस। ⁷जब सर्बहि मनइयन इ लखेन तउ उ पचे बड़बड़ाइ लागेन अउर बोलेन, "अरे इ एक पापी क घर मेहमान बनइ जात अहइ।"

⁸मुला जकई खड़ा भवा अउर परभू स बोला, "हे परभू देखा, मई आपन सारी धन दौलत क आधा हींसा गरीब गुरबन क दइ देब अउर जदि मई कउनो क छल कइके कछू भी छीना ह तउ ओका चौगुना कइके लौटाइ देब।"

⁹ईसू ओसे कहेस, "इ घरे प आज उद्धार आइ गवा ह, काहेकि इ मनई भी इब्राहीम क ही संतान अहइ! ¹⁰काहेकि मनई क पूत भी जउन कउनो हेराइ गवा अहइ, ओका ढँडइ अउर ओकर उद्धार करइ आवा ह।"

परमेस्सर जउन देत ह ओका बैपरा

(मती 25:14-30)

¹¹जब उ मनइयन इ बातन क सुनत रहेन तउ ईसू ओनका एक दिस्तान्त कथा सुनाएस काहेकि ईसू यरूसलेम क नगिचे रहा अउर उ पचे सोचत रहेन कि परमेस्सर क राज्य तुरंत ही परगट होइ जात अहइ। ¹²तउ ईसू कहेस, "एक ऊँच कुल क मनई राजा क पद पावइ बरे कउनो परदेस मैं गवा। ¹³तउ उ आपन दस नउकरन क बोलाएस अउर ओनमाँ स हर एक क एक एक थैली दिहस अउर ओनसे कहेस, 'जब ताई मई लौटउँ, एसे कउनो बियापार करा।' ¹⁴मुला सहर क दूसर मनई

ओसे घिना करत रहेन, यह बरे उ पचे ओकर पाछे इ कहइ क एक प्रतिनिधि मण्डत पठएस, 'हम नाहीं चाहित कि इ मनई हम पइ राज करइ।'

¹⁵मुला उ राजा क पदवी पाइ गवा। फिन जब उ वापस लौटा तउ जउन नउकरन क उ धन दिहे रहा ओनका इ जानइ बरे कि उ सबइ कउन लाभ कमाइ लिहन ह, उ बोलावा पठएस। ¹⁶पहिला आइ अउर बोला, 'स्वामी, तोहार थैलियन स मई दस अउर थैली कमाउँ ह।' ¹⁷एह पइ ओकर स्वामी ओसे कहेस, 'उत्तिम नउकर तू नीक किहा ह। काहेकि तू इ छोटकी सी बात प बिसवास क जोगग रहा। तू दस सहरन क अधिकारी होब्या।' ¹⁸फिन दूसर नउकर आवा अउर बोला, 'स्वामी तोर थैलियन स मई पाँच अउर थैली कमायउँ ह।' ¹⁹फिन उ एसे कहेस, 'तू पाँच सहरन क ऊपर राज करब्य।' ²⁰फिन एक दूसर नउकर आवा अउर बोला, 'स्वामी इ रही तोहार थैली जेका मई अँगौछा मँ बाँधिके कहूँ रख दिहे रहेउँ।' ²¹मई तोहसे डेरात रहत हउँ, काहेकि तू एक कठोर मनई अहा। तू जउन रख्या नाहीं ह तू ओका भी लइ लेत ह अउर जउन तू बोया नाहीं ओका काटत ह।' ²²मालिक ओसे कहेस, 'अरे दुस्ट नउकर! मई तोहरे आपन सबदन क ऊपर तोहार निआव करबा तू तो जानत ही ह कि मई जउन राखत नाहीं हउँ, ओका भी लइ लेइवाला अउर जउन बोवत नाहीं ओका भी काटइवाला कठोर मनई हउँ?' ²³तउ फिन तू मोर धन बियाज प काहे नाहीं लगाया ताकि मई अबहुँ वापस आवत होतउँ तउ बियाज क साथ ओका लइ लेतउँ।' ²⁴फिन लगे खड़ा मनइयन स उ कहेस, 'एकर थैली एसे लइ ल्या अउर जेकरे लगे दस थैली अहई ओका दइ द्या।' ²⁵एह पइ उ सबइ ओसे बोलेन, 'मालिक, ओकरे लगे तउ दस थैली अहई।' ²⁶मालिक कहेस, 'मई तोहसे कहत हउँ हर एक उ मनई क जेकरे लगे अहइ अउर जिआदा दीन्ह जाइ अउर जेकरे पास नाहीं अहइ, ओसे जउन ओकरे लगे अहइ, उ भी छीन लीन्ह जाइ।' ²⁷मुला मोर उ बैरी जउन नाहीं चाहतेन कि मई ओन पइ हुकुमत करउँ जेनका हिआँ मोरे समन्वा लावा अउर मारि डाला।"

ईसू क यरूसलेम मँ घुसब

(मती 21:1-11; मरकुस 11:1-11; यूहन्ना 12:12-19)

²⁸इ बातन कहि चुके क पाछे ईसू अगवा चलत भवा यरूसलेम कईती बड़इ लाग। ²⁹अउर फिन जब उ बैतफगे अउर बैतनिय्याह मँ उ पहाड़ी क नगिचे पहुँचा जउन जैतून क पर्वतन कही जात रही तउ उ आपन दुइ चेलन क इ कहिके पठएस कि ³⁰इ जउन गाउँ तोहरे समन्वा अहइ, हुवाँ जा। जइसे ही तू हुवाँ घुसब्या, तोहका गदही क बच्चा हुवाँ बाँधा भवा मिली। जेहँ पइ कउनो कबहूँ सवारी नाहीं किहे होइ, ओका खोलिके हिआँ

लिआवा। ³¹अउर जदि कउनो तोहसे पूछइ तू एँका काहे खोलत अहा, तो तोहका ओसे इ कहब अहइ, 'परभू क चाही।' ³²फिन जेनका पठवा ग रहा, उ पचे गएन अउर ईसू जइसा ओनका बताए रहा, ओनका बइसा ही मिला। ³³तउ जब उ सबइ बचवा क खोलत ही रहेन, ओकर मालिक लोगन ओनसे पूछेन, 'तू इ बचवा क काहे खोलत बाट्या?' ³⁴उ पचे कहेन, 'इ परभू क चाही।' ³⁵फिन उ पचे ओका ईसू क लगे लइ आएन। उ पचे आपन ओढ़ना उ बच्चा प ओढ़ाइ दिहेन अउर ईसू क ओह पइ बइठाइ दिहन। ³⁶ईसू जब जात रहा तउ मनइयन आपन ओढ़ना सड़क पइ बिछावत जात रहेन।

³⁷अउर फिन जब उ जैतून क पर्वतन स तलहटी क लगे आवा तउ चेलन क समूची भीड़ ओन सबहि अजुबा कामे बरे, जउन उ पचे लखे रहेन, ऊँच आवाज मँ खुसी स परमेस्सर क स्तुति करइ लागेन। उ पचे पुकारेन:

³⁸“राजा उ धन्य अहइ, आवत ह जउन नाउँ मँ परभू (परमेस्सर) क!

भजन संहिता 118:26

सरगे मँ सान्ति होइ, अउर अकास मँ महिमा होइ परमेस्सर क!”

³⁹भिड़िया मँ खड़ा भएन कछू फरीसियन ओसे कहेन, “गुरु, चेलन क मना करा।”

⁴⁰तउ उ जवाब दिहस, “मई तोहसे कहत हउँ जदि इ सबइ खमोस होइ जाई तउ इ सबइ पाथर चिचियइहीं।”

⁴¹जब उ नगिचे आइके सहर क लखेस तउ उ ओह प रोइ पड़ा। ⁴²अउर बोला, “जदि तू बस आनु इहइ जानत होत्या कि कउन तोहका सान्ति देइ मुला अब उ तोहरी आँखी स ओझर होइ गवा बा। ⁴³उ दिनन तोहे प अइहीं जब तोहरे बैरी चारिहुँ कईती अडुवन खड़ी कइ देइहीं। उ सबइ तोहका घेरि लेइहीं अउर सब कईती स तोह पइ दबाव डइहीं। ⁴⁴उ सबइ तोहका धूरी मँ मिलइहीं। तोहका अउर तोहरे दीवार क भीतर रहइवालन गदेलन क। तोहरी चहरदीवारे क भीतर उ सबइ तोहरे मकाने क एक पथरा भी ना छोड़िहइँ। काहेकि जब परमेस्सर तोहरे लगे आइ, तू उ घड़ी क नाहीं पहिचान्या।”

ईसू मंदिर मँ

(मती 21:12-17; मरकुस 11:15-19 यूहन्ना 2:13-22)

⁴⁵फिन ईसू मंदिर मँ घुसा अउर जउन हुवाँ दुकानदारी करत रहेन ओनका बाहेर निकारइ लाग। ⁴⁶उ ओनसे कहेस, “पवित्र सास्तर मँ लिखा ग अहइ, ‘मोर घर पराथना घर होइ।’* मुला तू पचे एँका ‘डाकुअन क

‘मोर ... होइ’ यसा 56:7

अड्डा* बनाए अहा।”⁴⁷ अब तो हर दिन मंदिर में उपदेस देइ लाग। मुख्ययाजकन, धरम सास्तिरियन अउर मुखिया मनइयन ओका मार डावइ क ताकि मैं रहइ लागेन।⁴⁸ मुला ओनका अइसा कइ डावइ क कउनो अउसर न मिल पावा काहेकि मनइयन ओकरे बचन क बहोत मान्ता देत रहेन।

ईसू स यहूदियन क सवाल

(मती 21:23-27; मरकुस 11:27-33)

20 एक दिन जब ईसू मंदिर में मनइयन क उपदेस देत भवा सुसमाचार सुनावत रहा तउ मुख्ययाजकन अउर धरम सास्तिरियन, बुजुर्ग यहूदी नेतन क संग ओकरे लगे आएन।² उ पचे ओसे पूछेन, “हमका बतावा तू इ काम कउनो अधिकार स करत अहा? उ कउन अहइ जउन तोहका इ अधिकार दिहे अहइ?”

³ ईसू ओनका जवाब दिहस, “मई भी तोहसे एक सवाल पूछत हउँ, तू मोका बतावा⁴ यहून्ना क बपतिस्मा देइ क अधिकार सरग स मिला रहा या मनई स?”

⁵ एह पइ आपुस मैं बिचार क चर्चा करत भवा उ पचे बोलेन, “जदि हम कहित ह, ‘सरग स’ तउ इ कही, ‘तउ तू ओह प बिसवास काहे नाहीं किहा?’⁶ अउर अगर हम कही, ‘मनई स’ तउ सबहीं मनई हम पइ पाथर फेंकिहीं। काहेकि उ सबइ इ मानत हीं कि यहून्ना एक नबी रहा।”⁷ तउ उ सबइ जवाब दिहेन कि उ पचे नाहीं जानतेन कि उ अधिकार कहाँ स मिला।⁸ फिन ईसू ओनसे कहेस, “तउ मई भी तोहका नाहीं बताउब कि इ चीज मई कउनो अधिकारे स करत हउँ।”

परमेस्सर आपन पूत क पठवत ह

(मती 21:33-46; मरकुस 12:1-12)

⁹ फिन ईसू मनइयन स आपन दिस्टांट कथा कहइ लाग: “कउनो मनई अंगूरे क बगिया लगाइके ओका कछू किसानन क लगाने प दिहस अउर उ बहोत दिना तक कहूँ चला गवा।¹⁰ जब फसल काटइ क समइ आइ, तउ उ एक नउकर क किसानन क लगे पठएस ताकि उ पचे ओका अंगूरे क बगिया क कछू फल दइ देई। मुला किसानन ओका मार पीटके खाली हाथ लौटाइ दिहना।¹¹ उ तब एक नउकर हुवाँ पठएस। मुला उ पचे ओकर ठोंकाइ कइ डाएन। उ सबइ ओकरे संग बहोत बुरा ब्यौहार किहेन। अउर ओका भी खाली हाथे लौटाइ दिहना।¹² एह पइ उ एक तिसरा नउकर पठएस मुला उ पचे एक भी घायल कइके बाहेर ढकेल दिहना।¹³ तब तउ बगिया क मालिक कहइ लाग, ‘मोका का करइ चाही? मई आपन पियारे बेटवा क पठउब साइद वे ओकर इज्जत करिहई।’

¹⁴ मुला किसानन जब ओकरे बेटवा का लखेन तउ आपुस मैं सोच बिचारि करत भए बोलेन, ‘इ तउ वारिस अहइ, आवा एँका मारि डाइ जेहसे वारिस हमार होइ जाइ।’¹⁵ अउर उ पचे ओका बगिया स बाहेर खदेरके मारि डाएन।

“तउ फिन बगिया क मालिक ओनके संग का करी?”

¹⁶ उ आइ अउर ओन किसानन क मारि डाई अउर अंगूरे क बगिया अउरन क सौंपि देइ।” उ पचे जब इ सुनेन तउ उ सबइ बोलेन, “अइसा कबहूँ न होइ चाही।”

¹⁷ तब ईसू ओनकइ कईती निहारत भवा कहेस, “तउ फिन इ जउन लिखा अहइ ओकर अरथ का अहइ:

‘जउने पाथर क राजगीर बेकार समझ लिहे रहेन उहइ कोनवा क प्रमुख पाथर बन गवा?’

भजन संहिता 118:22

¹⁸ हर कउनो जउन उ पाथर प गिरी चूर चूर होइ जाइ अउर जेह पइ उ गिरी चकनाचूर होइ जाइ।”

¹⁹ धरम सास्तिरियन अउर मुख्ययाजकन कउनो रस्ता ढूँढिके ओका पकड़ि लेइ चाहत रहेन काहेकि उ ताइ ग रहेन कि उ इ दिस्टांट कथा ओनके खिलाफ कहेस ह। मुला उ पचे मनइयन स डेरात रहेन।

यहूदी नेतन क चाल

(मती 22:15-22; मरकुस 12:13-17)

²⁰ तउ उ पचे होसियारी स ओह प निगाह राखइ लागेन। उ पचे अइसे खुफिया पठएन जउन ईमानदार होइ क सुआंग रचत रहेन। (ताकि उ सबइ ओकर कही भइ कउनो बातन मैं फँसाइके राज्यपाल क सक्ती अ अधिकारे क मातहत कर देई।)²¹ तउ उ पचे ओसे पूछत भए कहेन, “गुरु, हम जानित ह कि जउन नीक अहइ अउर उहइ क तू कहत अउर उपदेस देत अहा अउर न ही कउनो क पच्छ लेत ह। मुला तू सचाई स परमेस्सर क रास्ता क उपदेस देत अहा।²² तउ बतावा कैसर क हमका चुंगी (टिक्स) देब नीक बा या नाहीं चुकाउब?”

²³ ईसू ओनकइ चाल क ताइ गवा रहा। तउ उ ओनसे कहेस, ²⁴ “मोका एक दीनार देखावा, एह पइ मूर्ति अउर लिखाइ केकर अहइ?”

उ सबइ कहेन, “कैसर का।”

²⁵ एह पइ उ ओनसे बोला, “तउ फिन जउन कैसर क अहइ, ओका कैसर क द्या। अउर जउन परमेस्सर क अहइ ओका परमेस्सर का।”

²⁶ उ पचे ओकरे जवाब प चकित होइके चुप रहि गएन अउर उ मनइयन क सम्मवा जउन कछू कहे रहा, ओह पइ ओका पकड़ि नाहीं पाएन।

ईसू क धरइ बरे सद्कियन क चाल

(मती 22:23-33; मरकुस 12:18-27)

²⁷अब देखा कछू सद्कियन ओकरे लगे आएन। (इ सबइ सद्कियन उ रहेन जउन फिन स जी उठब का नाहीं मनतेन।) उ पचे ओसे पूछत भए कहेन, ²⁸“गुरु, मूसा हमरे बरे लिखा बा कि जदि कउनो क भाई मरि जाइ अउर ओकरे कउनो बचवा न होइ अउर ओकर पत्नी होइ तउ ओकर भाई विधवा स बियाहिके आपन मरे भए भाई बरे, ओसे संतान पड़दा करइ। ²⁹अब देखा, सात भाइयन रहेन। पहिला भाइ कउनो स्त्री स बियाह किहेस अउर उ बे संतान क ही मरि गवा। ³⁰फिन दूसर भाई ओसे बियाहा, ³¹अउर अइसे ही तीसर भाई ओसे बियाहा। सबन क संग एक जइसा ही भवा। उपचे बे संताने क मर गएन। ³²पाछे उ स्त्री भी मरि गइ। ³³अब बतावा, फिन स जी उते प उ केकर पत्नी होइ काहेकि ओसे तउ सातहु ही बियाहे रहेन?” ³⁴तब ईसू ओसे कहेस, “इ जुग क मनई बियाह करत हीं अउर बियाह कइके बिदा होत हीं। ³⁵मुला उ मनइयन जउन मरे भएन में स जी जाइ बरे अउर आवइवाले जुग में भाग लेइ क जोग्य ठहराइ दीन्ह ग अहई, उ पचे न तउ बियाह करिहीं अउर न ही बियाह कइके बिदा कीन्ह जइहीं। ³⁶अउर उ फिन कबहुँ मरिहीं भी नाहीं, काहेकि उ पचे सरगदूतन क नाई अहई, उ पचे परमेस्सर क संतान अहई काहेकि उ पचे पुनरुत्थान क पूत अहई। ³⁷मुला तलक झाड़ी स जुड़ा भवा अनुच्छेद में देखाएस ह कि उ पचे मरे भएन में स जिआवा ग अहई, जबकि उ कहेस पभू, ‘इब्राहीम क परमेस्सर, इसहाक क परमेस्सर अउर याकूब क परमेस्सर’ अहइ। * ³⁸उ मरे भएन क नाहीं, मुला जिअत क परमेस्सर अहइ। उ सबइ मनइयन जउन ओकर अहई, जिआ अहई।”

³⁹कछू धरम सास्तिरियन कहेन, “गुरु, नीक कहया।” ⁴⁰काहेकि फिन ओसे कउनो अउर सवाल पूछइ क हिम्मत नाहीं कइ सकेन।

मसीह का दाऊद क पूत अहइ?

(मती 22:41-46; मरकुस 12:35-37)

⁴¹ईसू ओसे कहेस, “उ पचे कहत हीं कि मसीह दाऊद क पूत अहइ। इ कइसे होइ सकत ह? ⁴²काहेकि भजन संहिता क किताब में दाऊद खुद कहत ह:

‘पभू (परमेस्सर) मोरे पभू (मसीह) स कहेस: मोरे दाहिन हाथ बइठा,

⁴³ जब तलक कि मई तोहरे बैरियन क तोहरे गोड़ धरइ क चउकी न बनाइ देईं।

भजन संहिता 110:1

⁴⁴इ तरह जब दाऊद मसीह क ‘पभू’ कहत ह तउ मसीह दाऊद क पूत कइसे होइ सकत ह?”

धरम सास्तिरियन क खिलाफ ईसू क चिताउनी

(मती 23:1-36; मरकुस 12:38-40 लूका 11:37-54)

⁴⁵सबहीं मनइयन क सुनत उ आपन मनवइयन स कहेस, ⁴⁶“धरम सास्तिरियन स होसियार रहा। उ लम्बा चोगा पहिरिके इज्जत क संग बाजारन में सुआगत सम्मान पावइ चाहत हीं। अउर आराधनालय में ओनका सबस जिआदा प्रमुख आसन क ललक रहत ह। दाउतन में उ सबइ इज्जत स भरा आसन चाहत हीं। ⁴⁷उ पचे विधवन क अकसर धोखा देत हीं अउर ओनकर मकान लइ लेत हीं। देखोवा बरे उ पचे बड़ी बड़ी पराथना करत हीं। इन मनइयन क कड़ी स कड़ी सजा भुगतइ पड़ी।”

सच्चा दान

(मती 12:41-44)

21 ईसू आपन अँखिया उठाइके देखेस कि धनी लोग दान पात्र में आपन आपन भेंट चढ़ावत अहई। तबहीं उ एक गरीब विधवा क ओहमाँ ताँबे क दुइ नान्ह सिक्का नावत भइ लखेस। ³उ कहेस, “मई तोहसे सच कहत हूँ कि दूसर सबहीं मनइयन स इ विधवा जिआदा दान दिहेस ह। ⁴इ मई ह बरे कहत हउं काहेकि इ सबहीं मनइयन आपन उ धने में स जेकर ओनका जरूरत नाहीं रही, दान दिहे रहेन मुला इ विधवा गरीब होत भइ जिन्ना रहइ बरे जउन कछू ओकरे लगे रहा, सब कछू दइ डाएस।”

मंदिर क बिनास

(मती 24:1-14; मरकुस 13:1-13)

⁵कछू चेलन मंदिर क बारे में बतियात रहेन कि उ मंदिर सुन्नर पथरन अउर परमेस्सर की दीन्ह गइ मनौती क भेंट स कइसे सजाना ग बा।

‘तबहीं ईसू कहेस, “अइसा समइ आइ जब, इ जउन कछू तू देखत अहा, ओहमाँ एक पाथर दूसर पाथर टिक न रह पाइ। उ सबइ दहाइ दीन्ह जइहीं।”

⁷उ पचे ओसे पूछत भए बोलेन, “गुरु, इ बातन कब होइहीं? अउर इ बातन जउन होइवाली अहई, ओकर कउन चीन्हा होइहीं?”

⁸ईसू कहेस, “होसियार रहा, कहुँ कउनो तोहका छल न लेइ। काहेकि मोरे नाउँ स बहोत मनइयन अइहीं अउर कइहीं, ‘मई मसीह अहउँ’ अउर ‘समइ आइ पहुँचा अहइ!’ ओनके पाछे जिन जा। ⁹परन्तु जब तू जुद्ध अउर दंगा क बात सुना तउ जिन डेराअ काहेकि इ बातन तउ पहिले घटि जइहीं। अउर ओनकइ अंत फउरन न होइ।” ¹⁰उ ओनसे फिन कहेस, “एक जाति दूसर जाति क खिलाफ खड़ी होइ अउर एक राज्य दूसर राज्य

क खिलाफ। ¹¹बड़ा-बड़ा भूईं डोल अइहीं अउर अनेक जगहन प अकाल पड़िहीं अउर महामारी आइ। अकासे में खौफनाक घटना घटिहीं अउर भारी चीन्हा परगट होइहीं।

¹²मुला इ सबन घटना स पहिले तोहका बंदी बनइ डइहीं अउर तोहका दारुण दुःख देइहीं। उ सबइ तोह प जुर्म लगावइ बरे तोहका आराधनालय क सौपिहीं अउर फिन तोहका जेल पठइ दीन्ह जाइ। अउर फिन मोरे नाउँ क कारण उ पचे तोहका राजा लोग अउर राज्यपाल क समन्वा लइ जइहीं। ¹³ऐसे तोहका मोरे बारे में साच्छी देइ क अउसर मिली। ¹⁴यह बरे पहिले स ही एँकर फिकिर न करइ कि आपन बचाव कइसे करब्या। ¹⁵काहेकि अइसी बुद्धि अउर सब्द तोहका मई देब कि तोहार कउनो भी बैरी तोहार सामना अउर तोहार खण्डन नाहीं कइ सकी।

¹⁶मुला तोहार महतारी-बाप, भाई, बन्धु, नातेदार अउर मीत भी तोहका धोखा स पकड़वइहीं अउर तोहमाँ स कछू क तउ मरवाइ ही डइहीं। ¹⁷मोरे कारण सब तोसे बैर रखिहीं। ¹⁸मुला तोहरे मूँडे क एक बार बाँका नाहीं होइ। ¹⁹तोहार सहइ क सक्ती, तोहरे प्रान क रच्छा करी।

यरूसलेम क नास

(मती 24:15-21; मरकुस 13:14-19)

²⁰अब लखा जब यरूसलेम क तू फऊज स घिरा देखब्या तउ समुझ लिहा कि ओकर तहस नहस होइ जाव नगिचे अहइ। ²¹तब तउ जउन यहूदिया में होइँ, ओनका चाही कि उ पचे पहाड़न प पराइ जाइँ अउर उ सबइ जउन सहर क भीतर होइँ, बाहेर निकर आवइँ अउर उ पचे जउन गाउँ में होइँ ओनका सहर में नाहीं जाइ चाही।

²²काहेकि उ दिनन सजा क होइहीं। एँहसे जउन लिखा ग बाटइ, उ सबहीं पूर होइँ। ²³उ स्त्रियन बरे, जउन पेटवा स भारी होइहीं अउर ओनके बरे जउन दूध पिआवत होइहीं, उ दिनन केतँना खौफनाक होइहीं। काहेकि उ दिनन धरती प बहोत बड़की बिपत आइ इ मनइयन प परमेस्सर कोहाइ जाइ। ²⁴उ सबइ तरवारे क धार स गिरा दीन्ह जइहीं अउर कैदी बनाइके सब देसन में पहुँचाइ दीन्ह जइहीं। अउर यरूसलेम बे यहूदियन क गोड़वा तरे तब तलक रौँद जाइ जब तलक गैर यहूदियन क समइ पूर नाहीं होइ जात।

डेराअ जिन

(मती 24:29-31; मरकुस 13:24-27)

²⁵सूरज, चाँद अउर तारन में चीन्हा परगट होइहीं अउर धरती प क सबहीं रास्टन प बिपत आई अउर उ सबइ समुद्दर क आवाज अउर उथर-पुथर स घबराइ

उठिहीं। ²⁶मनइयन डर अउर संसार प आवइ वाली बिपत क भय से बेहोस होइ जइहीं काहेकि आकास क सक्ती हलोर दीन्ह जाइ। ²⁷अउर तबहीं उ पचे मनई क पूत क आपन सक्ती अउर महान महिमा क एक बादर आवत भवा देखिहीं। ²⁸अब देखा, इ बातन जब घटइ लागइँ तउ खड़ा होइके तू आपन मूँड ऊपर उठाइ ल्या। काहेकि तोहार छुटकारा नगिचे आइ रही होइ।"

मोर बचन अमर बा

(मती 24:32-35; मरकुस 13:28-31)

²⁹फिन एक ठु दिस्टान्त कथा कहस: "अउर सबहीं बृच्छन अउर अंजीरे क बिरवा लखा। ³⁰ओहमाँ स जइसे ही कोंपर फूटत हीं, तू आपन आप जान जात ह कि गर्मी क रितु बस आइ ग अहइ। ³¹वइसे ही तू जब इ बातन क घटतइ देख्या तउ जान लिहा कि परमेस्सर क राज्य नगिचे अहइ।

³²मई तोहसे सच कहत हउँ कि जब तलक इ सब बातन घटि नाहीं जातिन, इ पीढ़ी क अंत नाहीं होइ! ³³धरती अउर अकास बरिबाद होइ जइहीं, पर मोर बचन हमेसा अटल रही।

हमेसा तइयार रहा

³⁴आपन धियान राखा जेहसे तोहार मन कहुँ पीने पिआवइ अउर संसारे क फिकिर स पाथर न होइ जाइ। अउर उ दिन एक फंदा क तरह तोह प एकाएक न आइ पड़इ। ³⁵सचमुच ही उ इ सारी धरती क बसइयन पइ अइसे ही आइ गिरी। ³⁶हर छिन होसियार रहा, अउर पराधना करा कि तोहक इ सब बातन स, जउन घटइवाली अहइँ, बचइ क ताकत मिलइ अउर तू मनई क पूत क समन्वा खड़ा होइ सका।"

³⁷हर रोज मंदिर में उपदेस देत रहा मुला, राति बीति जाइ प हर सौँझ जैतून पर्वत प चला जात रहा। ³⁸सबहीं मनई भिन्सारे क तड़के उठत रहेन अउर मंदिर में ओकरे लगे जाइके, ओका सुनत रहेन।

ईसू क मार डावइ क कुचाल

(मती 26:1-5, 14:16; मरकुस 14:1-2, 10-11;

यूहना 11:45-53)

22 अब फरसइ नाउँ क बे खमीरे क रोटी क त्योंहार आवइ क रहा। ²ओहँर मुख्ययाजकन अउर धरम सास्तिरियन काहेकि मनइयन स डेरात रहेन। यह बरे कउनो अइसे चाल क ताक मैं रहेन जेहसे उ ईसू क मारि डावइँ।

यहूदा क कुचाल

³फिन इस्करियोती कहावइवाला उ यहूदा मैं, जउन उन बारहु मैं एक रहा, सइतान समाइ गवा। ⁴

मुख्ययाजकन अउर सैनिकन क लगे गवा अउर ओनसे ईसू क कइसे पकड़वाइ सकत ह, इ बारे में बातचीत कियेस।⁵उ सबइ बहोत खुस भएन अउर ओका एँकरे बरे धन देइ क राजी होइ गएन।⁶उ भी राजी होइ गवा अउर उ अइसे अउसरे क ताड़ मँ रहइ लाग जब भीड़-बड़ि न होइ अउर उ ईसू का ओकरे हथवा मँ धराइ देइ।

फसह क तइयारी

(मती 26:17-25; मरकुस 14:12-21; यूहन्ना 13:21-30)

⁷फिन बे खमीर क रोटी क उ दिन आवा जब फसह क मेमने क बलि दीन्ह जात ह।⁸तउ उ इ कहत भवा पतरस अउर यूहन्ना क पठएस, “जा अउर हमरे बरे फसह क भोज तइयार करा जेसे हम पचे ओका खाइ सकीं।”

⁹उ सबइ ओसे पूछेन, “तू हम पचन स ओकर तइयारी कहाँ करावइ चाहत ह?” उ ओनसे कहेस, ¹⁰“तू जइसे ही सहर मँ घुसब्या तोहका पानी क गगरी लइ जात भवा एक मनई मिली, ओकरे पाछे होइ जाया अउप जउन घरे मँ उ जाइ तू भी पाछे चला जाया।¹¹अउर घरे क स्वामी स कहया ‘गुरु, तोहसे पूछेस ह कि उ मेहमान क कमरा कहाँ बा जहाँ मइ आपन चेलन क संग फसह क भोज क खइया क खाइ सकउँ।’¹²फिन उ मनई सिढियन क ऊपर तोहका सजा सजावा एक बड़ा कमरा देखोई, हुवई तइयारी करया।”

¹³उ पचे चल पड़ेन अउर वइसा ही पाएन जइसा उ ओनका बताए रहे। फिन उ पचे फसह क भोज क तइयार कियेन।

पभू भोज

(मती 26:26-30; मरकुस 14:22-26;

1 कुरिन्थियन 11:23-25)

¹⁴फिन उ घड़ी आइ तब ईसू खाइ बरे बइठा अउर प्रेरितन ओनके साथ बइठेन।¹⁵उ ओनसे कहेस, “यातना झेलइ स पहिले इ फसह क भोज संग करइ क मोर प्रबत इच्छा रही।¹⁶काहेकि मइँ तोहसे कहत हउँ कि जब तलक परमेस्सर क राज्य मँ फसह क भोज का पूरा मतलब न समझ लिया तब तलक मइँ एँका दूसरी दाई न खाबा।”

¹⁷फिन उ खोरा उठाइके धन्यवाद दिहसे अउर कहेस, “ल्या एँका आपुस मँ बाँटि ल्या।¹⁸काहेकि मइँ तोहसे कहत हउँ आजु क पाछे जब ताई परमेस्सर क राज्य नाहीं आइ जात मइँ कइसी भी दाखरस कबहुँ न पिअबा।”

¹⁹फिन उ तनिक रोटी लिहस अउर धन्यवाद दिहस। उ रोटी का तोड़ेस अउर ओनका देत भवा कहेस, “इ मोर देह अहइ जउन तोहरे बरे दीन्ह ग अहइ। मोरे याद मँ अइसा ही करया।”²⁰अइसे ही जब उ पचे भोजन कइ चुकेन तउ उ खोरा उठाएस अउर कहेस, “इ दाखरस

मोरे उ लह क रूप मँ एक नवा करार क प्रतीक अहइ जउन तोहरे बरे उड़ेला गवा अहइ।”

ईसू क बैरी कउन

²¹“मुला देखा, मोका जउन धोखा स पकड़वाइ, ओकर हाथ हिअँइ मेजे प मोर संग अहइ।²²काहेकि मनई क पूत तउ मारा ही जाइ जइसा कि तइ अहइ मुला धिक्कार उ मनई क अहइ जेकरे जरिए उ पकड़वाइ जाइ।”

²³एँह पइ उ आपुस मँ एक दुसरे स सवाल करइ लागेन, “ओहमों स उ कउन होइ सकत ह जउन अइसा करइ जात अहइ?”

सेवक बना

²⁴फिन ओहमों इ बात भी उठी कि ओहमों स सब स बड़कवा केका समुझा जावइ²⁵मुला ईसू ओनसे कहेस, “गैर यहूदियन क राजा ओन प रुतवा राखत हीं अउर उ सबइ जउन ओन प हुकुम चलावत हीं, खुद मनइयन क ‘उपकारी’ कहवावत हीं।²⁶मुला तू वइसे नाहीं अहा तउ भी तोहमों स सब स बड़कवा सब ते छोटकवा जइसा होइ चाही अउर जो राज करत ह ओका चाकर क नाई होइ चाही।²⁷काहेकि बड़कवा कउन अहइ: उ जउन खाइ क मेज प बइठा अहइ या उ जउन परसत ह? का उहइ नाहीं जउन मेज प अहइँ मुला तोहरे बीच मइँ वइसा हउँ जउन परसत ह! ²⁸मुला तू उ सबइ अहा जउन मोरी परीच्छा मँ मोर साथ दिहा ह।²⁹अउर मइँ तोहका वइसे ही एक राज्य देत अही जइसे मोर परमपिता एँका मोका दिहे रहेन।³⁰काहेकि मोरे राज्य मँ तू मोरे मेज प खा अउर पिआ अउर इम्राएल क बारहु जनजालिन क निआव करत भवा सिंहासने प बइठा।

बिसवास बनाइ राखा

(मती 26:31-35; मरकुस 14:27-31; यूहन्ना 13:36-38)

³¹“समौन, ओ समौन! सुना, तू सबन क गोहूँ क तरह फटकइ बरे सइतान चुन लिहे बा।³²मुला मइँ तोहरे बरे पराथना कीन्ह ह कि जेसे की परमेस्सर पर तोहार बिसवास खतम न होइ अउर जब तू वापस आवा तउ तोहरे भाइयन क ताकत बइइ।”

³³मुला समौन ओसे कहेस, “पभू, मइँ तोहरे संग जेल जाइ अउर मरइ तलक तइयार अहउँ।”

³⁴फिन ईसू कहेस, “पतरस मइँ तोहसे बतावत हउँ कि आजु तब तलक मुर्गा बाँग न देइ जब ताई तू तीन दाई मना नाहीं कइ लेब्या कि तू मोका जानत ह!”

दारुण दुख झेलइ क तइयार रहा

³⁵फिन ईसू आपन चेलन स कहेस, “मइँ तोहका जब बे बटुआ, बे थैली या बे चप्पल क पठए रहे तउ का तोहका कउनो चीजे क कमी रही।”

उ पचे कहेन, “कउनो चीजे क नाहीं।”

³⁶उ ओनसे कहेस, “मुला अब जउन कउनो क लगे भी कउनो बटुआ अहइ, उ ओका लइ लेइ अउर उ थैला भी लइ लेइ अउर उ थैला क भी लइके चलइ। जेकरे लगे तरवार न होइ, उ आपन चोगा तलक बेचिके ओका बेसहि लेइ। ³⁷काहेकि मई तोहका बतावत हउँ कि पवित्तर सास्तर क इ लिखा मोह प सचमुच ही पूरा होइ जाइ:

‘उ एक अपराधी माना गवा।’

यसायाह 53:12

हाँ मोरे बारे मैं लिखी गइ इ बात पूरा होइ जाइ प आवति अहइ।”

³⁸उ सबइ कहेन, “पभू, देखा, हिआँ दुइ तरवार अहइ।”

एँह प ओनसे कहेस, “बस बहोत अहइ।”

प्रेरितन क पराथना क हुकुम

(मती 26:36-46; मरकुस 14:32-42)

³⁹⁻⁴⁰फिन उ हुवाँ स उठिके रोज क तरह जैतून पर्वत प चला गवा। अउर ओकर चेलन भी ओकरे पाछे पाछे होइ गएन। उ जब उ ठउरे प पहुँचा तउ उ ओनसे कहेस, “पराथना करा कि तोहका परीच्छा मैं न पड़इ क होइ।”

⁴¹फिन उ ओनसे पाथर फेंकई क तरह पूरी दूरी तक चला गवा। फिन उ घुटना क सहारे निहुरा अउर पराथना करइ लाग, ⁴²हे परमपिता, अगर तोहार इच्छा होइ इ यातना क कटोरा मोहसे दूर हटावा मुला फिन भी नाहीं, बल्कि तोहार इच्छा पूर होइ। ⁴³तबहीं एक सरगदूत हुवाँ परगट भवा अउर ओका सक्ती देइ लाग। ⁴⁴ओहर ईसू ब्याकुल होय कर बड़े आग्रह पूर्वक पराथना करइ लाग। ओकर पसीना लोहू क बूँदे क नाई धरती पड़ फिरत रहा। ⁴⁵अउर जब उ पराथना स उठिके आपन चेलन क लगे आवा तउ उ ओनका दुखे मैं थकि के सोवत पावा। ⁴⁶तउ उ ओनसे कहेस, “तू पचे सोवत काहे अहा? उठा अउर पराथना करा कि तू कउनो परीच्छा मैं न पड़ा।”

ईसू क बंदी बनाउब

(मती 26:47-56; मरकुस 14:43-50; यूहन्ना 18:3-11)

⁴⁷उ अबहीं बोलत ही रहा कि एक भीड़ जमा होइ गइ। यहूदा नाउँ क एक मनई जउन बारहु मैं स एक रहा, ओनकइ अगुवाई करत रहा। उ ईसू क चुम्मा लेइ ओकरे लगे आवा।

⁴⁸मुला ईसू ओनसे कहेस, “अरे यहूदा, का तू एक चुम्मा स मनई क पूत क धोखा दइके पकड़वावइ जात

अहा?” ⁴⁹जउन घटइ जात रहा, ओका लखिके ओकरे नगिचे क मनइयन कहेन, “पभू, का हम पचे तरवारि क वार करी?” ⁵⁰अउर ओहमाँ स एक तउ महायाजक क नउकर प वारि कइके ओकर दाहिन कान काट डाएस। ⁵¹मुला ईसू फउरन कहेस, “ओनका इ भी करइ द्या।” फिन ईसू ओकर कनवा छुड़के चंगा किहेस।

⁵²फिन ईसू ओह प चढ़ाई करइ आएन मुख्ययाजकन, मंदिर क सैनिकन अउर बुजुर्ग यहूदी नेतन स कहेस, “का तू तरवारि अउर लाठिन लइके कउनो डाकू क मुकाबला करइ निकरा अहा? ⁵³मंदिर मैं मई हर दिन तोहरे ही संग रहेउँ, मुला तू मोह पइ हाथ नाहीं राख्या। मुला इ समइ तोहार अहइ-अंधियारे (पाप) क हुकुम क काल।”

पतरस क इन्कार

(मती 26:57-58; मरकुस 14:53-54, 66-72;

यूहन्ना 18:12-18, 25-27)

⁵⁴उ पचे ओका कैदी बनाइ लिहन अउर हुवाँ स लइ गएन। फिन उ सबइ ओका महायाजक क घर लइ गएन। पतरस कछू दूरी प ओकरे पाछे पाछे आवत रहा। ⁵⁵अँगेने क बीच उ पचे आगी सुलाएन अउर एक साथे खाले बैठि गएन। पतरस भी हुवाँ ओनही मैं बड़ठा रहा। ⁵⁶आगी क रोसनी मैं एक नउकरानी ओका हुवाँ बड़ठे लखेस। उ ओह पइ आँखी गड़ावत भइ कहेस, “इ मनई तउ ओकरे साथे भी रहा।”

⁵⁷मुला पतरस इन्कार करत भवा कहेस, “हे स्त्री, मई ओका नाहीं जानत हउँ।” ⁵⁸तनिक दरे पाछे एक तु दूसर मनई ओका लखेस अउर कहेस, “तू भी ओनही मैं स एक अहइ।” मुला पतरस बोला, “भल मनई, मई उ नाहीं हउँ।”

⁵⁹कउनो लगभग एक घड़ी बीत भइ होइ कि कउनो अउर भी जोर स कहइ लाग, “सचमुच ही इ मनई ओकरे संग भी रहा! काहेकि लखा उ गलील वासी भी अहइ।”

⁶⁰मुला पतरस बोला, “भल मनई, मई नाहीं जानत हउँ तू केकरे बारे मैं बतियात अहा!”

उहइ घड़ी, उ अबहीं बातन करत ही रहा कि एक तु मुर्गा बाँग दिहस। ⁶¹अउर पभू मुड़िके पतरस मैं आँखी गड़ाएस। तबहीं पतरस क पभू क उ बचन याद आवा जउन उ ओसे कहे रहा: “आजु मुर्गा क बाँग देइ स पहिले मोक़ा तीन दाई मुकरि जाब्या।” ⁶²तब उ बाहेर चला गवा अउर फूटि फूटि को रोवइ लाग।

ईसू क मसखरी

(मती 26:67-68; मरकुस 14:65)

⁶³⁻⁶⁴जउन मनइयन ईसू क धइ राखे रहेन उ पचे ओकर मसखरी अउर ओका ठाँकइ लागेन। ओकरे

आँखी प पट्टी बाँधि दिहन अउर ओसे इ कहत भए पूछइ लागेन, “भविस्सबाणी करा! उ कउन अहइ जउन तोहका मारेस!”⁶⁵ उ सबइ ओका बेजत करइ बरे ओसे अउर भी बातन कहेन।

ईसू यहूदी नेतन क समन्वा

(मती 26:59-66; मरकुस 14:55-64; यूहन्ना 18:19-24)

⁶⁶जबहिं दिन भवा कि मुख्ययाजकन अउर धरम सास्तिरियन संग मनइयन क बुजुर्ग नेतन क एक सभा भइ। फिन उ पचे ओका आपन महा सभा में लइ गएन।⁶⁷ उ सबइ पूछेन, “हमका बतावा का तू मसीह अहा?”

ईसू ओनसे कहेस, “जदि मई तोहसे कहउँ तउ तू मोर बिसवास नाहीं करब्या।⁶⁸ अउर जदि मई पूछउँ तउ तू जवाब नाहीं देब्या।⁶⁹ मुला अब स मनई क पूत सबन स सक्तीवाला परमेस्सर क दाहिन कईती बइठइ जाइ।”

⁷⁰ उ पचे बोलेन, “तब तउ का तू परमेस्सर क पूत अहा?” उ कहेस, “हाँ, मई हउँ।”

⁷¹ फिन उ पचे कहेन, “अब हमका कउनो अउर प्रमाण क जरूरत नाहीं अहइ? हम पचे खुद एकरे आपन मुँहना स इ सुन तउ लिहा ह!”

पिलातुस ईसू स पूछताछ किहेस

(मती 27:1-2, 11-14; मरकुस 15:1-5; यूहन्ना 18:28-38)

23 फिन सारा जमघट खड़ा होइ गवा अउर ओका पिलातुस क समन्वा लइ गवा² अउर उ पचे ओह पइ इ दोख लगावइ लागेन। उ सबइ कहेन, “हम पचे इ मनई का हमरे मनइयन क बहकावत भए धरा ह। इ कैसर क चुंगी (टिक्स) चुकावइ बरे खिलाफत करत ह अउर कहत ह इ खुद मसीह अहइ, एक राजा।”³ एँह पइ पिलातुस ओहसे पूछेस, “का तू यहूदियन क राजा अहा?”

ईसू ओका जवाब दिहस, “तू ठीक कहत रहया कि मई उहइ हउँ।”

⁴ एँह पइ पिलातुस मुख्ययाजकन अउर भीड़ स कहेस, “मोका इ मनई प कउनो दोख लगावइ क कउनो प्रमाण नाहीं देखॉइ देता।”

⁵ मुला उ पचे इ कहत भए दबाव डावत रहेन, “इ समूचइ यहूदिया में मनइयन क आपन उपदेस स भइकाएस ह। इ एँका गलील में सुरू किहे रहा अउर समूचइ रस्ता पार कइके हिं अँ तलक आइ पहुँचा अहइ।”

ईसू क हेरोदेस क लगे पठउब

⁶ पिलातुस इ सुनिके पूछेस, “का इ मनई गलील क अहइ?”⁷ फिन जब ओका इ पता लाग कि उ हेरोदेस क अधिकार पहुँटा क मातहत अहइ तउ उ ओका हेरोदेस क लगे पठएस जउन उ समइ यरूसलेम में ही रहा।⁸ उत हेरोदेस जब ईसू क निहारेस तउ उ बहोत खुस भवा

काहेकि बरिसन स ओका लखइ चाहत रहा। काहेकि उ ओकरे बारे सुनि चुका रहा अउर ओका कउनो अद्भुत कारज करत भवा लखइ क आसा करत रहा।⁹ उ ईसू स ढेर सवाल किहेस मुला ईसू ओका कउनो जवाब नाहीं दिहेस।¹⁰ मुख्ययाजकन अउर धरम सास्तिरियन हुवँ खड़ा रहेन अउर उ सबइ ओह प बुरी तरह स जुर्म लगावत रहेन।¹¹ हेरोदेस भी आपन सैनिकन क संग ओकर बेजत ब्यौहार किहेस अउर ओकर मसखरी उड़ाएस। फिन उ सबइ ओका एक उत्तिम चोगा पहिराइ के पिलातुस क लगे वापस पठइ दिहेस।¹² उ दिन हेरोदेस अउर पिलातुस एक दूसर क मीत होइ गएन। एँसे पहिले तउ एक दूसर क बैरी रहेन।

ईसू क मरब रहा

(मती 27:15-26; मरकुस 15:6-15; यूहन्ना 18:39, 19:16)

¹³ फिन पिलातुस मुख्ययाजकन, यहूदी नेतन अउर मनइयन क एक संग बोलाएस।¹⁴ उ ओनसे कहेस, “तू इ मनइयन क बहकावइ वाला मनई क रुप में हिंओ मारे लगे लइ आए अहा। अउर मई हिंओ अब तोहरे समन्वा ही एँकर जांच पड़ताल कइ लीन्ह ह अउर तू एँह पइ जउन दोख लगाया ह ओकर न तउ कउनो ठोस सबूत मिलि पावा ह।¹⁵ नाहीं हेरोदेस ने काहेकि उ एँका वापस हमरे लगे पठइ दिहा ह। जइसा कि तू लखत अहा कि इ अइसा कछू नाहीं किहे अहइ कि इ मउत क काबिल अहइ।¹⁶ यह बरे मई एँका कोड़ा स पिटवाइ क छोड़ देबूँ।”¹⁷*

¹⁸ मुला उ सबइ एक संग चिल्लायन, “इ मनई क लइ जा। हमरे बरे बरअब्बा क तजि द्या।”¹⁹ (बरअब्बा क सहर में मार धाइ अउर कतल बरे जेल में धाँधा गवा रहा।)

²⁰ पिलातुस ईसू क तजि देइ चाहत रहा, तउ उ ओनका समझाएस।²¹ मुला उ पचे नारा लगावत रहेन “एँका क्रूस प चढ़ाइ द्या, एँका क्रूस प चढ़ाइ द्या।”

²² पिलातुस ओनसे तिसरी दाई पूछेस, “मुला इ मनई जुर्म का किहे अहइ? मोका एँकरे खिलाफ कछू नाहीं मिला बाटइ जउन एँका मउत क सजा दीन्ह जाइ। यह बरे मई कोड़ा लगावइ के एँका छोड़ि देइहउँ।”

²³ मुला उ सबइ ऊँच आवाज में नारा लगाइके माँग करत रहेन कि ओका क्रूसे प चढ़ाइ दीन्ह जाइ। अउर ओकइ नारा क कुलाहल पतना बाँधि गवा कि²⁴ पिलातुस फैसला किहेस कि ओनकइ माँग मान लीन्ह जाइ।²⁵ पिलातुस उ मनई क छोड़ि दिहस जेका मार धाइ अउर कतल बरे जेल में धाँधा ग रहा (इ उहइ रहा जेकरे

पद 17 लूका क कछू यूनानी प्रतिथन में पद 17 जोड़ा गवा अहइ: “हर बरिस फसह क त्यौहार प पिलातुस क जन्ता बरे एक कैदी क छोड़ि देइ पड़त रहा।”

तजि देइ क उ पचे माँग करत रहेन।) अउर ईसू क ओकरे हाथन में सौँपि दिहन कि उ सबइ जइसा चाहई, करई।

ईसू क क्रूस प चढ़ावा जाब

(मती 27:32-44; मरकुस 15:21-32; यूहन्ना 19:17-27)

²⁶जब उ सबइ ईसू क लइ जात रहेन तउ उ पचे कुरेनी क बसइया समोन नाउँ क एक मनई क, जउन आपन खेते स आवत रहा, धइ लिहन, अउर ओह पइ क्रूस लादिके ओका ईसू क पाछे पाछे चलइ क मजबूर कइ दिहन।

²⁷मनइयन एक भारी भीड़ ओकरे पाछे चलत रही। एहमाँ कछू स्त्रियन भी रहिन जउन ओकरे बरे रोवत रहिन अउर बिलापत रहिन। ²⁸ईसू ओनके कइँती मुड़ि गवा अउर बोला, "यूरूसलेम क स्त्रियो, मोरे बरे जिन बिलापा बल्कि तू पचे आपन बरे अउर आपन बचवन बरे बिलाप कर। ²⁹काहेकि अइसे दिनन आवत अहई जब मनइयन कइँही, 'उ सबइ स्त्रियन धन्य अहई, जउन बाँझ बाटिन अउर धन्य अहई, उ सबइ कोख जउन कउनो क कबहूँ जनम ही नाहीं दिहन। उ सबइ चूची धन्य अहई कबहूँ दूध नाहीं पियाएन।' ³⁰फिन उ पचे पहाड़िन स कइँही, 'हम पइ फाटि पड़ा।' अउर पहाड़ियन स कइँही, 'हमका ढँकि ल्या!' * ³¹काहेकि मनइयन जब बृच्छ हरियर बाटइ, ओकरे संग तब अइसा करत ही तउ जब पेड़ झुराइ जाइ तब का होइ?"

³²दुइ अउर मनई, जउन दुइनुँ ही अपराधी रहेन, ओकर संग मउत क सजा दिये बरे लइ जावा जात रहेन। ³³फिन जब उ पचे उ ठउरे प आएन जउन खोपड़ी कहवावत ह तउ उ पचे ओन दुइनुँ अपराधियन क संग ओका क्रूस प चढ़ाइ दिहन। एक अपराधी क ओकरे दाहिन कइँती अउर, दूसर क बाई कइँती।

³⁴एह पइ ईसू बोला, "हे परमपिता, एँनका छमा करया काहेकि इ पचे नाहीं जानतेन कि इ सबइ का करत अहई।"

फिन उ सबइ पाँसा फेंकि के ओकरे ओढ़ना क बाँटि लिहन। ³⁵हुवाँ खड़ा भएन मनइयन लखत रहेन। यहूदी नेतन ओकर मसखरी करत भएन बोलेन, "इ दूसरन क उद्धार किहे अहइ। अगर उ परमेस्सरे क चुना भवा मसीह अहइ तउ एँका आपन खुद क रच्छा करइ द्या।"

³⁶सैनिकन भी आइके ओकर मसखरी उड़ाएन। उ पचे ओका दाखरस पिअइ क दिहेन ³⁷अउर कहेन, "जदि तू यहूदियन क राजा अहा तउ आपन खुद क बचाइ ल्या।" ³⁸(ओकरे ऊपर इ खबर छपी गइ "इ अहइ यहूदियन क राजा।")

³⁹हुवाँ लटकावा भवा अपराधियन में स एक ओका बेजत करत भवा कहेस, "का तू मसीह नाहीं अहइ? हमका अउर आपन खुद क बचाइ ल्या!"

⁴⁰मुला दूसर उ पहिले अपराधी क फटकारत भवा कहेस, "का तू परमेस्सर स नाहीं डेराल्या? तोहका भी उहइ सजा मिलति अहइ ⁴¹मुला हमार सजा तउ उचित निआव स भरी अहइ काहेकि हम जउन कछू कीन्ह, ओकरे बरे जउन हमका मिलइ चाही रहा, उहइ मिलत बा मुला इ मनई तउ कछू भी बुरा नाहीं किहेस।" ⁴²फिन उ बोला, "ईसू जब तू आपन राज्य में आवा तउ मोका याद राख्या।"

⁴³ईसू ओसे कहेस, "मई तोहसे सच कहत हउँ, आज ही तू सरगलोक में मोरे संग होब्या।"

ईसू क मउत

(मती 27:45-56; मरकुस 15:33-41; यूहन्ना 19:28-30)

⁴⁴उ समइ दिना क बारह बजा होइ तबहीं तीन बजे तलक समूची धरती प गहिर आँधियारा छाइ गवा। ⁴⁵सूरज भी नाहीं चमकत रहा। ओहर मंदिर में परदे क फटे क दुइ टूका होइ गएन। ⁴⁶ईसू ऊँच आवाज में पुकारेस, "हे परमपिता, मई आपन आत्मा तोहरे हाथे में सौँपत हउँ।" इ कहिके उ आखिरी सौँस लिहस।

⁴⁷जब रोम क फऊजी नायक, जउन कछू घटि गवा रहा, उ लखेस तउ परमेस्सर क गुन गावत भवा उ कहेस, "इ सचमुच ही एक नीक मनई रहा।"

⁴⁸जब हुवाँ देखइ आएन एकट्ठा मनइयन, जउन कछू भवा रहा, ओका देखेन तउ आपन छती पीटत लौँटि गएन। ⁴⁹मुला उ सबइ जउन ओका जानत रहेन, ओन स्त्रियन संग, जउन गलील स पाछे पाछे आवत रहिन, इ बातन क लखइ कछू दूरी प खड़ा रहेन।

अरमलियाह क यूसुफ

(मती 27:57-61; मरकुस 15:42-47; यूहन्ना 19:38-42)

⁵⁰⁻⁵¹अब हुवाँ यूसुफ नाउँ क मनई रहा जउन यहूदी महासभा क निअम्बर रहा। उ एक नीक धर्मी पुरुस रहा। उ ओनके फैसला अउर ओका काम में लावइ बरे राजी नाहीं रहा। उ यहूदियन क एक सहर अरमलिया क बसइया रहा। उ परमेस्सर क राज्य क बात जोहत रहा। ⁵²उ मनई पिलातुस क लगे गवा अउर ईसू क लहास माँगिस। ⁵³उ लहास क क्रूस पइ स नीचे उतरा अउर सने क उत्तिम रेसा क बना कपड़ा में ओका लपेट दिहस। फिन उ ओका चट्टान में काटी गइ एक कन्न में धइ दिहस, जेहमाँ पहिले कबहूँ कउनो क भी नाहीं राखा गवा रहा। ⁵⁴उ सुकरवार क दिन रहा, अउर सबित सुरू होइ क रहा। ⁵⁵उ सबइ स्त्रियन जउन गलील स ईसू क साथे आइ रहिन, यूसुफ क पाछे होइ चलिन. उ पचे उ कन्न देखिन अउर लखेन कि ओकर

लहास कन्न मँ कइसे धरी गइ।⁵⁶फिन उ पचे घर लौटिके खुसबूदार सामग्री अउर लेप तइयार कियेन।

सबित क दिन व्यवस्था क मुताबिक उ पचे आराम कियेन।

ईसू क फिन जी उठब

(मती 28:1-10; मरकुस 16:1-8; यूहन्ना 20:1-10)

24 हफता क पहिले दिन बहोत भिन्सारे उ सबइ स्त्रियन कन्न पइ खुसबूदार सामग्री क, जेका उ पचे तइयार कियेन, लइके आइन।²ओनका कन्न पइ स लुढ़कि गवा पाथर मिला।³तउ उ पचे भीतर चली गइन मला हुवाँ पभू ईसू क लहास नाही मिली।⁴उ सबइ एँह पइ अबहीं अरमजस मँ ही पड़ी रहिन कि, ओनके लगे चमचमात ओढ़ना पहिरे दुइ मनई (सरगदूतन) खड़ा भएन।⁵डर स उ पचे धरती कइँती मुँहना लटकाए रहिन। उ दुइ मनइयन ओनसे कहेन, “जउन जिअत अहइ, ओका तू मुर्दवन क बीच काहे हेरति अहा?⁶उ हिआँ नाही अहइ। उ जिउ उठा बा। याद कर जब उ अबहीं गलील मँ रहा, उ तोहसे का कहे रहा।⁷उ कहे रहा कि मनई क पूत क पापी मनइयन क हाथ सौप दीन्ह जाब तय अहइ। फिन उ क्रूस पइ चढ़ाइ दीन्ह जाइ अउर तिसरे दिन ओका फिन स जीवित कइ देब तय अहइ।”⁸तब ओन स्त्रियन क ओकर सब्ब याद होइ गएन।⁹उ पचे कन्न स लौटि आइन अउर उ सबइ सब बातन ओन ग्यारहु चेलन अउर दूसर सबन क बताएन।¹⁰इ पचे स्त्रियन रहिन, मरियम मगदलीनी, योअन्ना अउर याकूब क महतारी मरियम। उ सबइ अउर ओनके साथे क दूसर स्त्रियन इ बातन क प्रेरितन स कहत रहिन।¹¹मुला ओनके सब्ब प्रेरितन क बुथा जानि पड़ेन। तउ उ सबइ ओनका बिसवास नाही कियेन।¹²मुला पतरस खड़ा भवा अउर कन्न कइँती पराइ गवा। उ खाले निहुरिके लखेस मुला ओका सन क उत्तम रेसन स बना कफन क अलावा कछू नाही देखेँइ दिहे रहा। फिन आपन मन ही जउन कछू भ रहा, ओहँ प अचरज करत भवा उ चला गवा।

इम्माऊस क रस्ते प

(मरकुस 16:12-13)

¹³उहइ दिना ओकर चेलन मँ स दुइ, यरूसलेम स कउनो सात मीत दूर बसा भवा इम्माऊस नाउँ क गाउँ क जात रहेन।¹⁴जउन घटना घटी रहिन, ओन सब प उ सबइ आपुस मँ बतियात रहेन।¹⁵जबहिँ उ सबइ ओन बातन प बातचीत अउर सोच विचार करत रहेन तबहीं खुद ईसू हुवाँ हाजिर भवा अउर साथे साथे चलइ लाग।¹⁶(मुला ओनका ओका पहिचानइ स टोका गवा।)¹⁷ईसू ओनसे कहेस, “चलत चलत एक दुसरे स तू कउनो बातन प बतियात रह्या?”

उ पचे चलत चलत थम गएन। उ पचे दुख्खी देखेँइ देत रहेन.¹⁸ओहमाँ स क्लियोपास नाउँ क एक मनई ओसे कहेस, “यरूसलेम मँ रहइवाला अकेल्ला तू ही अइसा मनई होब्या जउन पिछले दिनन जउन बातन घटी अहइँ, ओका नाही जानत्या।”

¹⁹ईसू ओनसे पूछेस, “कउन सी बातन?”

उ पचे ओसे कहेन, “सब नासरत क ईसू क बारे मँ अहइँ। इ एक अइसा मनई रहा जे जउन कियेस अउर कहेस ओहसे परमेस्सर अउर सबहीं मनइयन क समन्वा इ देखेँइ दिहस कि उ एक महान नबी रहा।

²⁰अउर हम इ बारे मँ बातन करत रहेन कि हमरे मुख्ययाजकन अउर नेतन ओका कइसे मउत क सजा देइ बरे सौपि दिहेन। अउर उ पचे ओका क्रूस प चढ़ाइ दिहिन।²¹हमार आसा रही कि इहइ रहा उ जउन इब्राएल क अजाद करावत। अउर इ सब कछू क अलावा इ घटना क भाए आजु तीसर दिन अहइ²²अउर हमरी टोली क कछू स्त्रियन हमका अचरजे मँ डाइ दिहिन ह। आजु भोर मँ भिन्सारे उ पचे कन्न प गइन।²³मुला ओनका लहास नाही मिली। उ सबइ लौटि आइन अउर हमका बताएन कि उ पचे सरगदूतन क दर्सन पाइ गइन ह जउन कहे रहेन कि उ जीवित अहइ।²⁴फिन हम पचन मँ स कछू कन्न प गएन अउर जइसा स्त्रियन बताए रहिन, उ पचे हुवाँ वइसा ही पाएन उ सबइ ओका नाही देखेन।”

²⁵तब ईसू ओनसे कहेस, “तू पचे केतँना मूरख अहा अउर नबियन जउन कछू कहेन, ओह प बिसवास करइ मँ केतँना धीमे अहा।²⁶का मसीह बरे इ जरूरी नाही रहा कि उ इ दारुण दुःखन क झेलइ अउर इ तरह आपन महिमा मँ घुसि जाइ?”²⁷अउर इ तरह मूसा स सुरु कइके सबहीं नबियन तलक अउर पवित्तर सास्तरन मँ ओकरे बारे मँ जउन कहा गवा रहा, उ ओका खोलिके ओनका समझाएस।

²⁸उ पचे जब उ गाउँ क लगे आएन, जहाँ जात रहेन, ईसू अइसा बताव कियेस, जइसे ओका अगवा जाइके होइ।²⁹मुला उ पचे ओसे जबरदस्ती हठ करत भए कहेन, “हमरे साथ ठहर जा काहेकि करीब करीब साँझ होइ गइ अहइ अउर अब दिन ओनवइ क रहा।” तउ उ ओकरे संग ठहरइ भीतर आइ गवा।

³⁰जब ओनके संग उ खइया क मेजे प रहा तबहीं उ रोटी उठाएस अउर धन्यवाद दिहस। फिन ओका तोड़िके जब उ ओनका देत रहा³¹तबहीं ओनकइ आँखी खोलि दीन्ह गइ अउर उ पचे ओका पहिचान लिहिन। मुला उ ओनके समन्वा स अन्तर्धान होइ गवा।³²फिन उ आपुस मँ बोलेन, “रास्ता मँ जब उ हमसे बात करत रहा अउर हमका पवित्तर सास्तरन क समझावत रहा तउ का हमरे हिरदइ क भीतर आगी भी नाही भड़क गइ?”³³फिन उ तुरंत खड़ा भएन अउर वापस यरूसलेम क

चल दिहेन। हुवाँ ओनका ग्यारहवाँ प्रेरित अउर दूसर ओनके संग एकट्ठा मिलेन, ³⁴जउन कहत रहेन, “पभू, असल में जिउ उठा अहइ। उ समौन (पतरस) क दर्सन दिहेस ह।” ³⁵फिन उ दुइनउँ राह मँ जउन भवा रहा, ओकर ब्यौरा दिहेन अउर बताएन कि जब उ रोटी क कउर लिहेस, तब उ सबइ ईसू क पहिचान लिहना।

ईसू क आपन चेलन क समन्वा परगट होब

(मती 28:16-20; मरकुस 16:14-18; यूहन्ना 20:19-23; प्रेरितन क काम 1:6-8)

³⁶अबहीं उ पचे ओनका इ बातन बताइ ही रहत रहेन कि उ खुद ओनके बीच आइ खड़ा भवा अउर ओनसे बोला, “तोहका सान्ति मिलइ।”

³⁷मुला उ पचे चौँकि के सहम गएन। उ पचे सोचेन जइसे उ सबइ कउनो भूत लखत होई। ³⁸मुला उ ओनसे बोला, “तू अइसे घबरान काहे अहा? तोहरे मनवा मँ सन्देह काहे उठति अहइ? ³⁹मोरे हाथन अउर मोरे गोड़े क लखा। तू देख सकत ह कि इ सच मँ मई अहउँ। मोका छुआ, अउर लखा कि कउनो भूत क माँस अउर हाइ नार्हीं होती अउर जइसा कि तू लखत अहा कि, मोर उ सबइ अहई।”

⁴⁰इ कहत भवा उ हाथ अउर गोड़ ओनका देखाएस। ⁴¹मुला आपन आनन्द क कारण उ पचे अब भी ओह पइ बिसवास नार्हीं कइ सकेन। उ पचे भउचक्का रहेन। तउ ईसू ओनसे कहेस, “हिआँ तोहरे पास कछू खाइ क अहइ।” ⁴²उ पचे पकाइ गइ मछरी क एक टुकड़ा

ओका दिहेन। ⁴³अउर उ ओका लइके समन्वा खाएस। ⁴⁴फिन उ ओनसे कहेस, “इ बातन उ सबइ अहई जउन मई तोहसे तब कहे रहेउँ, जब मई अबहीं तोहरे संग हउँ। हर उ बात जउन मोरे बारे मँ मूसा क व्यवस्था मँ, नबियन क किताबन अउर भजन संहिता मँ लिखी अहइ, पूरी होब ही अहइ।” ⁴⁵फिन पक्वित्तर सास्तरन क समझइ बरे उ ओनकइ बुद्धि क दुआर खोल दिहेस।

⁴⁶अउर उ ओनसे कहेस, “इ उहइ अहइ, जउन लिखा अहइ कि मसीह दारुण दुख भोगी अउर तिसरे दिन मरे हुअन मँ स जी उठी। ⁴⁷अउर पापे क छमा बरे मनफिराव क इ संदेस यरूसलेम स सुरू होइके सब देसन मँ प्रचार कीन्ह जाइ। ⁴⁸तू इ बातन क साच्छी अहा। ⁴⁹अउर अब मोरे परमपिता मोसे जउन सपथ किहेस ह, ओका मई तोहरे बरे पटउव। मुला तोहका इ सहर मँ उ समइ तलक ठहरे रहइ क होइ जब तक तू सरगे क सक्ती स जुरा न हवा।”

ईसू क सरग क वापसी

(मरकुस 16:19-20; प्रेरितन क काम 1:9-11)

⁵⁰ईसू फिन ओनका बैतनिय्याह तलक बाहेर लइ गवा अउर उ हथवा उठाइके आसीबाँद दिहेस। ⁵¹ओनका आसीबाँद देत देत उ ओनका तजि दिहेस अउर फिन ओका सरगे मँ उठाइ लीन्ह गवा। ⁵²तब उ पचे ओकर आराधना किहेन अउर असीम आनन्द लइके यरूसलेम लौटि आएन। ⁵³अउर मंदिर मँ परमेस्सर क स्तुति करत भएन उ पचे आपन दिन काटइ लागेन।

License Agreement for Bible Texts

World Bible Translation Center

Last Updated: September 21, 2006

Copyright © 2006 by World Bible Translation Center

All rights reserved.

These Scriptures:

- Are copyrighted by World Bible Translation Center.
- Are not public domain.
- May not be altered or modified in any form.
- May not be sold or offered for sale in any form.
- May not be used for commercial purposes (including, but not limited to, use in advertising or Web banners used for the purpose of selling online ad space).
- May be distributed without modification in electronic form for non-commercial use. However, they may not be hosted on any kind of server (including a Web or ftp server) without written permission. A copy of this license (without modification) must also be included.
- May be quoted for any purpose, up to 1,000 verses, without written permission. However, the extent of quotation must not comprise a complete book nor should it amount to more than 50% of the work in which it is quoted. A copyright notice must appear on the title or copyright page using this pattern: "Taken from the HOLY BIBLE: EASY-TO-READ VERSION™ © 2006 by World Bible Translation Center, Inc. and used by permission." If the text quoted is from one of WBTC's non-English versions, the printed title of the actual text quoted will be substituted for "HOLY BIBLE: EASY-TO-READ VERSION™." The copyright notice must appear in English or be translated into another language. When quotations from WBTC's text are used in non-saleable media, such as church bulletins, orders of service, posters, transparencies or similar media, a complete copyright notice is not required, but the initials of the version (such as "ERV" for the Easy-to-Read Version™ in English) must appear at the end of each quotation.

Any use of these Scriptures other than those listed above is prohibited. For additional rights and permission for usage, such as the use of WBTC's text on a Web site, or for clarification of any of the above, please contact World Bible Translation Center in writing or by email at distribution@wbtc.com.

World Bible Translation Center

P.O. Box 820648

Fort Worth, Texas 76182, USA

Telephone: 1-817-595-1664

Toll-Free in US: 1-888-54-BIBLE

E-mail: info@wbtc.com

WBTC's web site – World Bible Translation Center's web site: <http://www.wbtc.org>

Order online – To order a copy of our texts online, go to: <http://www.wbtc.org>

Current license agreement – This license is subject to change without notice. The current license can be found at: <http://www.wbtc.org/downloads/biblelicense.htm>

Trouble viewing this file – If the text in this document does not display correctly, use Adobe Acrobat Reader 5.0 or higher. Download Adobe Acrobat Reader from: <http://www.adobe.com/products/acrobat/readstep2.html>

Viewing Chinese or Korean PDFs – To view the Chinese or Korean PDFs, it may be necessary to download the Chinese Simplified or Korean font pack from Adobe. Download the font packs from: <http://www.adobe.com/products/acrobat/acrrasianfontpack.html>